

Ezequiel

Se tanextili ten itatanex TOTECO

¹⁻³ Quema na, niEzequiel, nijpiyayaya 30 xihuit, niquitac se tanextili ten Toteco Dios. Elqui ipan 5 itequi nopa najpa metzti ipan toisraelita calendario * quema yahuiyaya para macuili xihuit quiqxijtijtoyaj Tanahuatijquet Joaquín ipan total huan quihuicatoyaj Babilonia. Na, niEzequiel se niisraelita totajtzi cati niicone Buzi, niitztoya inihuaya nopa sequinoc israelitame cati techquixtijtoyaj ten total huan techhuicaque Babilonia. Huan tiitztoyaj iteno nopa hueyat Quebar ipan nopa tali quema ilhuicacti tapojtihuetzqui, huan niquitac se tanextili ten TOTECO huan nijmatqui TOTECO techitzqui ica imax.

⁴ Ipan ni tanextili, niquitac para taajacayaya ica norte huan nopa hueyi ajacat monechcahuiyaya campa na. Huan iixpa hualayaya se hueyi mixti cati petaniyaya huan taahuiyaya quej se hueyi tit. Huan ijtic nopa mixti quipixtoya se tit cati petaniyaya quej quema tata nopa teposti bronce.

⁵ Teipa tatajco ten nopa mixti monextijque nahui cati yoltoque cati nesiyayaj quej se masehuali.

⁶ Sesen ten inijuanti quipiyayaya nahui ixayac huan nahui ieltapal. ⁷ Huan inimetz eliyaya xitahuac quej masehualme inimetz. Pero inicixi quipiyayaya iniisti huan elqui quej iniicxi becerros. Huan iniicxi petaniyaya quej nopa

* **1:1-3** 1:1-3 Elqui 31 itequi julio ipan tocalendario ten ama.

teposti bronce. ⁸ Huan itantita ten sese inieltapal, quipiyayaj inimax quej masehualme inima. Sesen ten ni cati yoltoque, quipiyayaya nahui ixayac huan nahui ieltapal. ⁹ Nochi nopa nahui cati yoltoque mosajsalohuayayaj ica inieltapal se ica se seyoc. Huan yon se amo monequi moicancuepas para nemise pampa ica nahui inixayac campa hueli yahuiyayaj elqui iixmelac se ixayac. ¹⁰ Sesen ten inijuanti quipiyayaya ixayac se tacat. Huan sesen ica inejmat ten itzonteco quipiyayaya ixayac se león. Huan ica iarraves ten itzonteco sesen quipiyayaya ixayac se toro. Huan iica sesen itzonteco quipiyayaya ixayac se cuatojti. ¹¹ Quej nopa elqui inixayac. Huan sesen quipixqui nahui ieltapal. Ome ieltapal quipatahuayaya para ica mosajsalos ica seyoc cati yoltoque ipan sesen ilado. Huan ica nopa seyoc ome inieltapal cati sesen quipiyayaya quitzacuayayaj inintacayo. ¹² Huan campa nopa cuali tonaltzi quintaniyaya, masque ica norte, ica sur, ica campa hualquisa tonati o ica campa oncalaque, npona yahuiyayaj san xitahuac ica iniiexpa, yon amo monequi moicancuepase.

¹³ Huan inintachiyalis nopa nahui cati yoltoque eliyaya quej ticoli cati xahuantoc o quej ticiuhuit. Elqui quej tit quisayaya ten sesen huan yahuiyaya para seyoc tatajco ten inijuanti. Huan nopa tit petaniyaya nelchicahuac. Huan tatajco ten nopa tit quisayaya tapetanilot. ¹⁴ Huan nopa nahui cati yoltoque yahuiyayaj canajya huan mocuepayayaj quej tapetanilot.

¹⁵ Quema noja niquintachilijtoya nopa nahui cati yoltoque, niquitac nahui ruedas cati

motalijtoyaj talchi huan sesen eltoya nechca se ten nopa nahui cati yoltoque. ¹⁶ Nopa nahui ruedas nesiyaya san se huan nesiyaya quej elisquía tachijchihuali ica nopa yejectzi tet crisólito. Sesen ten nopa ruedas quipixqui seyoc rueda cati calactoya iijtic huan quicruzmacatoya. ¹⁷ Huan hueliyayaj yahuij ica campa hueli ten nopa nahui lados huan amo monequiyaya moicancuepase. ¹⁸ Huan yahualtic ten sesen nopa nahui ruedas quipiyayaj inintencuayo inintejteno seyoc rueda cati huejcapantic hasta temajmati. Huan campa hueli ipan itejteno sesen rueda quipiyayaya miyac ixteyolme.

¹⁹ Huan quema nopa nahui cati yoltoque nemiyayaj, nopa ruedas yahuiyayaj inihuaya. Huan quema motananayayaj ten talchi, nopa ruedas nojquiya motananayayaj. ²⁰ Huan campa nopa cuali tonaltzi yahuiyaya, nopa nahui cati yoltoque yahuiyayaj huan nojquiya yahuiyayaj nopa ruedas. Elqui pampa itonal ten sesen nopa nahui cati yoltoque eltoya ipan nopa ruedas. Huan yeca campa yahuiyaya sesen itonaltzi ipan nopa ruedas, nojquiya yahuiyayaj nopa nahui cati yoltoque. ²¹ Huan quema nopa nahui cati yoltoque mijcueniyayaj, nopa ruedas nojquiya mijcueniyayaj. Huan quema inijuanti moquetzayayaj, nopa ruedas nojquiya moquetzayayaj. Huan quema nopa nahui cati yoltoque tejcoyayaj ten ni taltipacti, nojquiya tejcoyayaj nopa ruedas pampa itonal sesen ten nopa cati yoltoc itztoya ipan nopa ruedas. ²² Huan inintzonta inijuanti cati yoltoque, nesiyaya se tamanti quej ilhuicacti. Huan petaniyaya

quej nopa yejyectzi tet cristal. Huan nopa tamanti quej ilhuicacti patajtoya inintzonta. ²³ Huan itantita nopa tamanti cati patajtoc quej ilhuicacti, ieltapal sesen nopa nahui cati yoltoque mopatajtoya para ica quiajsis ieltapal nopa seyoc cati itztoya ipan ilado. Huan ica nopa seyoc ome inieltapal, sesen ten inijuanti quitzacuayaya ten ya itacayo. ²⁴ Huan quema nopa nahui patantiyahuiyaya, inieltapal chicahuac caquistiyaya quej quema mocojcoxonía nopa hueyi at ipan xali. O caquistiyaya quej itoscac Toteco Cati Quipiya Nochi Chicahualisti. O caquistiyaya quej tzajtziyayaj miyac soldados cati tahuel quipiyayayaj tetili. Huan quema moquetzayayaj nopa nahui cati yoltoque, quitemhuiyaya inieltapal. ²⁵ Huan quema moquetzayayaj huan quitemhuiyaya inieltapal, camanaltiyaya se cati itztoya más huejcapa ten nopa tamanti cati patajtoc quej ilhuicacti inintzonta.

²⁶ Huan más huejcapa ten nopa tamanti cati patajtoc quej ilhuicacti cati eltoya inintzonta, nesiyaya se yejyectzi siyaj quej campa mosehuía se Tanahuatijquet. Huan nesiyaya quej elisquía tachijchihuali nopa siyaj ica nopa yejyectzi tet cati azultic cati itoca zafiro. Huan ipan nopa siyaj cati eltoya huejcapa itztoya se cati nesiyaya quej se tacat. ²⁷ Huan ten itzinquechta para huejcapa nesiyaya quej nopa teposti bronce cati cahuaniyaya quej tit. Huan ten itzinquechta para tatzinta nesiyaya quej se tilemecti cati cahuaniyaya tahuel chicahuac. ²⁸ Huan yahualtic ten ya chicahuac cahuaniyaya se tamanti quej

nopaacosamalot cati monextía quema huetzi at. Quej nopa nesiyaya itatanex TOTECO. Huan quema niquitac, nihuetsqui talchi ica noxayac huan nijcajqui itoscac cati nechcamanalhuiyaya.

2

TOTECO quinojnotzqui Ezequiel huan quite-quimacac

¹ Huan TOTECO techilhui: “Tacat, ximoquetza huan nimitzcamanalhuis.” ² Huan quema noja nechcamanalhuiyaya, Itonal calajqui ipan na huan techchijqui ma nimoquetza. Huan nijta-caquili cati nechcamanalhuiyaya. ³ Huan TOTECO techilhui: “Tacat, na nimitztitani campa itztoque nopa israelitame. Inijuanti tahuel techixpan-toque huan mosisiniptoque ica na. Ten huejca-jquiya, intatahua tajtacolchijque noixpa huan ama hasta ni tonali iniixhuihua quisenhuiquilíaj moicancuepaj ten na. ⁴ Inijuanti nelía tetic inixayac huan tahuel yoltetique. Pero na nimitztitantoc para xiquinpoohuiliti nocamanal. Xiquinilhuiti para quej ni na, niDIOS Cati Más Nijpiya Tanahuatili, niquijtohua, huan teipa xiquinilhui nopa camanali cati nimitzilhuijtoc. ⁵ Huan tijpantis para inijuanti tahuel mosisiniáj, pero masque quitacaquilise o amo quitacaquilise, para nochipa quielnamictose para oncac se tajtolpanextijquet tatajco inijuanti.

⁶ “Tacat, amo xiquinimacasi nopa masehualme, yon amo xiquimacasi inincamanal masque mitz-cocosquía quej se huitzti o quej inintencococa

colome. Amo xiquimacasi inincamanal yon inincualancayo pampa ya tijmati para tahuel mosisisiníaj. ⁷ Monequi tiquinilhuis nocamanal nochi nopa masehualme masque quitacaquilise o amo pampa nelía mosisisiníaj. ⁸ Huajca, tacat, xijtacaquili cati nimitzilhuía ama. Amo xipehua ximosisisini quej inijuanti. Ta xijtapo mocamac huan xijcua cati nimitzmacas.”

⁹ Huajca nitachixqui huan niquitac se cati quixtajtoya imax campa na huan imaco quipixtoya se amat mimilijtoc. ¹⁰ Huan yaya quitapo nopa amat mimilijtoc huan niquitac para ica iijtic huan ipani ijcuilijtoc miyac mijcahuicat huan camanali cati teyolmelahua ten tequipacholi huan ten tatzaicultili cati huala.

3

¹ Huan yaya techilhui: “Tacat, xijcua cati nimitzmaca. Xijcua ni amat mimilijtoc huan teipa xiya huan xiquinilhuiti israelitame ni camanali.”

² Huajca na nijtapo nocamac huan techchihualti ma nijcua nopa amat mimilijtoc. ³ Huan techilhui: “Tacat, xijcua nochi nopa amat hasta temis nochimoihti huan nochi mocuitaxcol.” Huajca na nijcuaqui. Huan ipan nocamac nijmatqui tzopelic quej sayolnecti.

⁴ Huan teipa techilhui: “Tacat, xiya campa nopa israelitame cati inihuaya tiitztoc huan xiquinyolmelahuati nochi nocamanal. ⁵ Na amo nimitztitani ica seyoc tamanti masehualme ipan setali cati mopantía huejca o campa amo huelis tijmachilis inincamanal. Nimitztitani campa israelitame. ⁶ Yon amo nimitztitani campa miyac

tamanti inieso masehualme cati camanaltij camanali cati tahuel ohui. Pero sintia nimitztitanisquia ica masehualme quej nopa, inijuanti, quena, quineltocasquiaj nocamanal. ⁷ Pero nimitztitani campa israelitame, huan inijuanti amo quinequise mitztacaquilise pampa amo quinequij techneltocase. Nelia tetic inixayac huan tahuel yoltetique. ⁸ Pero xiquita, na nojquiya nijchijtoc moxayac tetic quej inijuanti huan nimitzchijtoc tiyoltetic quej inijuanti. ⁹ Na nimitzchijtoc titetic quej tet. Huajca amo xiquinimacasi. Masque inijuanti nesisquiaj ixcualantoque pampa nelia tahuel mosisiniaj, amo xiquinimacasi.”

¹⁰ Teipa TOTECO techilhui: “Tacat, achtohui xijcahuili para nochia ni nocamanal ma calaqui ipan moyolo. Huan xijtacaquili cuali. ¹¹ Teipa xiya campa moisraelita icnihua nopona cati quinquixtijtoque ipan inintal, huan xiquinilhuiti para quej ni na, niDIOS Cati Más Nijpiya Tanahutili, niquijtohua. Huan elis ipan inijuanti sintia quitacaquilise o amo.”

¹² Teipa Itonal TOTECO techtananqui huan noica nijcajqui tacaquisti quej quema mojmolinia tali. Huan nopa ten caquistiyaya quiijtohuayaya: “Ma tijhueyichihuaca TOTECO huan ihueyitis nopona campa yaya itztoc.” ¹³ Nojquiya nijcajqui tacaquistiyaya pampa nopa cati yoltotoque moajsiyayaj se ica seyoc ica inieltapalhua huan mojmolinayaj nopa ruedas cati eltoyaj iniixmelac. Huan cati caquistiyaya eliyaya chicahuac quej quema mojmolinia tali.

¹⁴ Huan Itonal TOTECO techtananqui huan techhuicac. Huan niyajqui achi niyolquentzi huan

nicualantoc, pero TOTECO techitzuiyaya chicahuac ica imax. ¹⁵ Huan techhuicac altepet Tel Abib ipan tali Babilonia hasta campa itztoyaj nopa israelitame cati quinquixtijtoyaj ten inintal. Ni altepet mopantiyaya nechca nopa hueyat Quebar. Huan nimosehui campa inijuanti mosehuijtoyaj huan nopona nimocajqui chicome tonati. Nimomajmatiyaya huan amo njimatiyaya taya monequi njichihuas.

*TOTECO quitali Ezequiel quej tamocuitahuijquet para israelitame
(Ez 33:1-9)*

¹⁶ Huan quema tanqui nopa chicome tonati, TOTECO techilhui: ¹⁷ “Tacat, na nimitztalijtoc quej titamocuitahuijquet ten israelitame. Huajca quema tijtacaquilis se camanali ten na, monequi nimantzi tiquinyolmelahuas por na. ¹⁸ Quema niquinilhuis masehualme cati fiero ininemilis para temachti monechcahuía para miquise; pero ta amo tiquinilhuis nocamanal para ma moyolcuepaca ten inintajtacol para noja itztose, huajca inijuanti miquise por inintajtacolhua, pero elis ta mocahuil quema nimitztajtanis cuenta por inimiquilis. ¹⁹ Pero sinta ta tiquinyolmehahuas para fiero ininpantis sinta amo moyolcuepase huan inijuanti quisenhuiquilise tajtacolchihuase, yon amo quinequise moyolcuepase, huajca temachti miquise por inintajtacol, pero ta tijmanahuis monemilis pampa tijchijqui cati nimitzilhui. ²⁰ Sinta se cuali masehuali pehua quichihua cati fiero, huelis njitalis se taquetzti para ya para ica ma moyolcuepa. Pero sinta

amo tijyolmelahuas, yaya miquis ipan itajtacol-hua huan amo aqui quielnamiquis nopa cuali tamanti cati quichijqui achtohuiya. Pero ta nimitzatjanis cuenta por imiquilis pampa amo tijyolmelajqui. ²¹ Pero sinta ta tijyolmelahuas para ma moyolcuepa huan yaya nelia moyolcuepas, huajca yaya quisenhuiquilis itztos huan ta nojquiya tijmanahuis monemilis ten tatzacuiltylisti.”

Ezequiel mocajqui se nonotzi

²² Huan teipa TOTECO sempa quitali imax ipan na huan techilhui: “Xiya ipan nopa tamayamit huan nopona nicamanaltis mohuaya.” ²³ Huajca nimoquetzqui huan niyajqui, huan nopona nojquiya niquitac itatanex Toteco. Huan eliyaya san se ica nopa cati achtohuiya niquitac nechca nopa hueyat Quebar. Huan nihuetzqui talchi ica noxayac.

²⁴ Huan Itonal Toteco calajqui ipan na huan techquetzqui. Teipa nechcamanalhui huan techilhui: “Xiya, xicalaquiti ipan mochaj huan ximocaltzacua. ²⁵ Huan na nijchihuas para ma mitzilpica ica lazo huan quej nopa ayecmo huelis tiquisas. ²⁶ Huan nijchihuas para monenepil ma pepechihui ipan mocamachal huan timocahuas quej se cati amo hueli camanalti. Huan amo ti-huelis tiquinajhuas ni masehualme pampa tahuel mosisiníaj. ²⁷ Pero sesen huelta quema nijnequis nimitzmacas se camanali, nijtojtomas monenepil huan nimitzchihuas xicamanalti, huan tiquinilhuis para na, niDIOS Cati Más Nijpiya Tanahutili, niquipjohua huan teipa tiquinilhuis nopa camanali cati nimitzmacatoc. Huan cati quinequise

quitacaquilise nopa camanali, ma quitacaquilica; huan cati amo quinequise quitacaquilise, ma amo quitacaquilica pampa inijuanti tahuel mosisiníaj.

4

Ezequiel tayolmelahuas para quitanise Jerusalén

¹“Huan ama, tacat, xijcui se hueyi soqui tabique huan xijtali moixpa. Huan ipani xiquixcopina nopa altepet Jerusalén. ²Teipa xiquinixcopina soldados quej quiyahualojoque nopa altepet. Huan xiquixcopina se tamontomit tali cati ipan tej cose nopa tatehuiani para huelis quipanose itepa nopa altepet para calaquise. Huan nojquiya xiquixcopina tomahuac cuahuit ica lazos para ica quicoyonise nopa tepamit. ³Teipa xijcui se teposti cati huehueyac, patahuac huan tilahuac huan xijtali tatajco ten ta huan nopa altepet quej elisquía se tepamit. Huan ta ximotali iiymelac huan xijchihua quej elisquía tijtehuía nopa altepet quej quichihuase inincualancaitacahua. Nochi ya nopa eltoc se tanextili para nopa israelitame para quinnextilis ten panos.

⁴“Teipa ximoteca ica moelchiqui ten moarraves huan xijpixto mopani inintajtacolhua israelitame noch tonali quema quej nopa tiitztos. ⁵Huan quej nopa tiitztos huan tijpixtos inintajtacolhua para 390 tonali. Elis se tonali para sesen ten nopa 390 xihuit ten inintajtacolhua. ⁶Quema ticaxitis, teipa ximotecas ica moelchiqui cati monejmat para 40 tonali para tijnextis quesqui xihuit huejcahuas

inintatzacuilty nopa israelitame cati ehuani tali Judá. Sesen tonali quiixnextis se xihuit.

⁷ “Huan tijsenhuiquilis tiquixnextis quenicatza quiitzquise altepet Jerusalén quema timotectoc ipan monejmat. Xijxolohui moajcol huan momax para quiixnextis para nimantzi hualase cati quite-huise nopa altepet ica miyac chicahualisti. Huan xitayolmelhua taya panos. ⁸ Huan na nimitzilpis ica lazos para amo tihuelis timocuepas ica seyoc lado hasta ya ticaxitijtos nochí nopa tonali cati monequi para titaijyohuis.

⁹ “Xiya xijcuiti trigo, cebada, et huan avena huan nojquiya habas huan nopa siltic et. Huan nochí xijtali san sejco ipan se comit. Huan ipan nopa 390 tonali quema timotectos ica moarraves, xijcua pantzi cati tachichihuali ica ni tamanti. ¹⁰ Motacualis cati tijcuas monequi elis tatamachihuali huan quipiyas nechca 220 gramos ietica para se tonal. Huan tijcuas se quentzi ten nopa tacualisti ipan nopa horas ipan se tonali cati na nimitzilhuis. ¹¹ Huan nopa at cati tiquis nojquiya monequi elis tatamachihuali huan san huelis tiquis se tajco litro at para se tonal. Nojquiya tiquis moa ipan nopa horas ipan se tonali quema na nimitzilhuis. ¹² Mojmosta xijcualtali nopa harina para tijchihuas pantzi ten cebada cati tiquicxitis san ipan cuajnexti. Huan tiquicxitis iniixpa nochí nopa masehualme ipan tit cati tijchihuas ica masehual cuitat cati huactoc. Huan quej nopa tijcuas nopa pantzi.”

¹³ Huan TOTECO quiijto: “Quej nopa tijchihuas para tijnextis quenicatza quicuase pantzi cati

nempolijtoc ipan sequinoc talme campa niquintitanis nopa israelitame para ma itztotij quej seyoc tali ehuani.”

¹⁴ Pero na niquilhui: “¡Ay TOTECO Cati Más Tijpiya Tanahuatili! Amo quinamiqui nijtequihuis masehual cuitat. Ipan nochí nonemilis amo quema nimochijtoc amo nitapajpactic ica tamanti cati soquiyo moixpa. Hasta quema niconetzi huan hasta ama ni tonali, amo quema nijcuajtoc se tapiyali cati mijqui ica cocolisti, o cati cocojtoc, o cati quitzontamilti seyoc tapiyali. Huan amo quema nijcuajtoc se tapiyali cati totanahuatil quiijtohua ma amo tijcuaca.”

¹⁵ Huajca TOTECO techilhui: “¡Cualtitoc! Huajca nimitzcahuilis tijtequihuis huacax cuitat huan amo masehual cuitat.”

¹⁶ Huan teipa techilhui: “Tacat, cati tijchihuas quiixnextis para na nijchihuas para amo oncas tacualisti ipan altepet Jerusalén. Huan intacualis quintamachihuise ica miyac cuidado huan quicuase ica tequipacholi. Huan nopa at nojquiya quitamachihuase huan quiise ica hueyi majmajti pampa tantiyas. ¹⁷ Na nijchihuas para ma amo onca tacualisti, yon at, huan san motachilise se ica seyoc ica majmajti. Huan por intajtacol, intintacayohua nenpolijtiyase masque noja yoltoque.”

5

Se tanextili ten nopa tatzacuiltili cati huala

¹ Huan teipa TOTECO techilhui: “Tacat, ama xijcui se macheta cati nelía tatequi huan xijtequihui quej elisquía se navaja cati quitequihuía se

texinquet. Huan ica ya nopa xijtequi motzoncal huan motentzo. Teipa xijcui se balanza huan xijtamachihua nopa motzoncal ica eyi tamontomit.

² Xijcui se ten nopa eyi tamontomit ten tzoncali huan xijtali tatajco ten nopa mapa campa tiquixcopintoc altepet Jerusalén. Huan quema ya tantos motaijyohuilis, xijtati nopa tzoncali. Huan seyoc ten nopa eyi tamontomit ten tzoncali, xiquijtzelo campa hueli ipan nopa mapa huan teipa xijhuejhuelo ica se macheta. Huan nopa tamontomit ten tzoncali cati mocahua xiquijtzelo ajacatipa, pampa ica nomacheta niquinquixtis nopa masehualme huan niquinsemanas campa hueli.

³ San xicajocui se ome ten nopa tzoncali huan xiquilpi iyecapa moyoyo.

⁴ Teipa xijcui se ome ten nopa tzoncali cati ticajoctoc huan xiquinmajcahua ipan nopa tit para ma tataca. Huan ten nopona quisas se hueyi tit cati quintatis nochis israelitame.

⁵ “Huan na, nIDIOS Cati Más Nijpiya Tanahuatili, niquipijtohua: Nochi ya ni cati tijchihuas quiixnextía cati ininpantis nopa masehualme ten altepet Jerusalén. Na nijtalijtoc tali Israel tatajco nochis talme huan niquintali nopa sequinoc talme yahualtic.

⁶ Pero nopa masehualme ipan Jerusalén quitahuelcajtoque notanahuatil huan quichijtoque cati más fiero que nopa masehualme ipan sequinoc altepeme huan talme cati mocahuaj nechca. Amo quinequiyayaj quitepanitase nopa tanahuatilme cati niquinmacac para quichihuase.

⁷ “Huajca xiquinilhuiti para na, nIDIOS Cati Más Nijpiya Tanahuatili, niquipijtohua: Pampa amo quinequiyayaj quineltocase notanahuatilhua

huan noleyes huan quichijtoque cati más fiero que nopa sequinoc masehualme cati itztoque ininechca,⁸ na niDIOS Cati Más Nijpiya Tanahuatili, nimochihuas niinincualancaitaca. Huan niquintatzacuiltis huan quintachilise nochi nopa masehualme ten nopa sequinoc talme.⁹ Huan pampa quinhueyichijtoque teteyome, niquintatzacuiltis ica se tatzacuiltili cati tahuel fiero, cati amo quema nijchijtoc ica sequinoc huan amo quema sempa nijchihuas.¹⁰ Nochi mayanase ipan Jerusalén hasta sequij tetajme quincuase ininconehua huan nojquiya sequij coneme quincuase intintahua. Huan cati mocahuase yoltoque campa inijuanti, niquinsemanas huan niquintitanis ipan campa hueli talme para ma itztotij quej seyoc tali ehuani.

¹¹ “Na niDIOS Cati Más Nijpiya Tanahuatili huan ya ni cati niquijtohua para Jerusalén ehuani: Nimechtzontamiltis pampa anquichijtoque amo tapajpactic notiopa. Anquincalaquijtoque teteyome huan taixcopincayome nopona huan nopona anquichijtoque miyac tamanti cati fiero. Huajca amo nimechtaojtas, yon amo nimechcahuilis ancholose.¹² Nimechtalis nochi amo juanti ipan eyi pamit. Cati itztoque ipan nopa achtohui pamit miquise ica mayanti huan ica cocolisti. Ipan nopa ompa pamit nochi miquise ipan tatehuilisti inimaco inincualancaitacahua. Huan cati itztoque ipan nopa expa pamit na niquinquixtis ica macheta huan niquinsemanas para ma yaca ipan campa hueli talme.¹³ Huan ica ya nopa tamis nohueyi cualancayo. Huan quema ya nimoyoltalijtos, nochi israelitame no-

pona quimachilise para na, niDIOS, cati niquincamanalhuiyaya huan para melahuac nitetatzacultía quej niquijtohua.

¹⁴ “Na nijtamisosolos altepet Jerusalén huan nochi amojuanti cati nopona anitztoque. Huan nochi masehualme ipan nochi talme cati amechyahualojtoque huan nochi cati panose nopona quiitase para tamitasosolijtoc huan amechpinajtise. ¹⁵ Huan masehualme ipan nochi talme cati amechyahualojtoque san amechhuetzquilise, amechtaijilhuise huan amechpinajtise. Huan tahuel nimechtaijyohuilitis para nochi masehualme ma quiitase quenicatza tahuel chicahuac niquintatzacultía masehualme ipan se tali ica nohueyi cualancayo. Na niDIOS niquijtojtoc.

¹⁶ “Nimechtitanilis se mayanti cati elis tahuel chicahuac para amechmictis. Quena, nopa mayanti más mohueyilis hasta ayecmo oncas yon se panpayaxti para anquicuase hasta anmiquise. ¹⁷ Huan nojquiya nimechtitanilis tecuanime para quincuase amoconebla. Huan nimechtitanilis cocolisti cati temictía huan nimechtitanilis amocualancaitacahua cati amechmictise ipan tatehuilisti. Na niDIOS niquijtojtoc.”

6

TOTECO quisosolos nopa piltiocaltzitzí ipan te-peme

¹ Huan TOTECO sempa nechcamanalhui huan techilhui: ² “Tacat, xitachiya ica campa eltoc

nopa tepeme ipan tali Israel huan xiteyolme-lahua taya ininpantis. ³ Huan quej ni xiquijito: ‘Xijtacaquilica taya ininpantis nochí ni te-peme, tachiquilme, hueyame huan tamayame ipan tali Israel. Ya ni cati na, niDIOS Cati Más Nijpiya Tanahuatili, niquijtohua. Na niDIOS nijchihuas ma huala tatehuilisti ipan nochí te-peme para nijsosolos nochí piltiocaltzitzí. ⁴ Na niquintamisosolos nochí taixpame ten tacajcahualisti huan nojquiya nopa taixpame campa israelitame quinpopochhuiyayaj ininteteyohua huan inintaixcopincayohua. Huan niquinmictis nopona iniixpa inindioses. ⁵ Huan niquintalis inintacayohua israelitame iniixpa nopa taixcopincayome huan teteyome, huan iniomiyó niquinsemanas yahualtic nopa taixpame. ⁶ Ipan campa hueli altepet campa israelitame mocahuase para itztose, niquinsosolos nochí piltiocaltzitzí huan taixpame huan teteyome huan taixcopincayome ten tonati huan tamanti cati inijuanti quinchichijtoque para quihueyichihuase. Nochi niquintamiltis. ⁷ Huan quema tahuel miyac israelitame huetzise mictoque amoixpa, anquimachilise para melahuac na niDIOS.

⁸ “Pero na nijchihuas para sequij nomasehual-hua ma mocahuaca yoltoque para itztotij ipan campa hueli tali ipan taltipacti. ⁹ Huan quema inijuanti ya itztose ipan campa hueli talme quej seyoc tali ehuani, techelnamiquise. Huan israelitame quiitase quenicatzá techcocojtoque quema quihueyichihuayayaj teteyome huan taixcopincayome huan amo na. Quielnamiquise quema nechcajtejque quej se ahuilnenca sihuat quic-

ahua ihuehue pampa iixteyol nochipa quitemohua seyoc para ica momecatis. Quej nopa eltoc iniixteyol israelitame san quintemohuaj teteyome huan taixcopincayome para nechcahuase na huan inihuaya momecatise. Huan niquinchihuas para sequinoc ma quinijiyaca huan quinpinahuaca por nochí nopa fiero tamanti cati quichijtoque. ¹⁰ Huan huajca israelitame quimatlise para na niDIOS, huan quimachilise para amo san niquincajcahuayaya quema niquinyolmelajqui para niquintitanilis nochí ni taijyohuilisti.’”

¹¹ Huan TOTECO Cati Más Quipiya Tanahuatili techilhui: “Xitahuejchihua ica majmajti huan xitatejtazona ica moicxi talchi huan xitzajtzi ica miyac tequipacholi por nochí tajtacoli cati quichijtoque israelitame ipan Jerusalén pampa ama miquise ica tatehuilisti, mayanti huan cocolisti. ¹² Nopa israelitame cati itztose huejca ipan sequinoc talme miquise ica cocolisti. Huan cati mocahuase ipan inintal miquise ipan tatehuilisti. Huan cati noja mocahuase yoltoque miquise ica mayanti. Huan quej nopa tamis nohueyi cualancayo cati nijpiyayaya ica injuanti.

¹³ “Huan quema inimijahua tepejtose tatajco ten ininteteyohua, huan yahualtic inintaixpahua, huan ipan sesen tepet, ipan sesen tachiquili, huan tatzinta ten sesen cuahuit cati xoxohuic huan tatzinta ten sesen ahua cuahuit campa quietencahuayayaj copali para ininteteyohua, huajca quimatlise para na niDIOS. ¹⁴ Quena, niquintzon-tamiltis huan niquinixpolihuiltis nochí nopa altepeme huan nochí lugares campa itztoque israeli-

tame ten campa nopa huactoc tali cati eltoc ica tatzinta hasta tali Diblat cati eltoc ica huejcapa. Huan huajca israelitame quimachilise para na niDIOS.”

7

Monechcahuía itamiya amotal

¹ Huan TOTECO sempa nechcamanalhui huan techilhui: ² “Tacat, na niamotECO Cati Más Ni-jpiya Tanahuatili quej ni niquinilhuía tali Israel ehuani. Ya ajsico itamiya ni tali. Ya ajsic hora para nijtamisosolos. Sinta tijtachilis ica norte o ica sur, o ica campa hualquisa tonati o ica campa on-calaqui tonati, nochi ya eltoc para nijtamisosolos. ³ Ayecmo onca netapojo-polhuili. Ama nijnextilis ni tali nochi nohueyi cualancayo. Nimechtajta-nis cuenta anisraelitame por nochi nopa fiero tamanti cati anquichijtoque. ⁴ Amo nimechta-soj-tas, yon amo nimechcahuilis xicholoca. Nimech-tatzacuiltis huan senquisa nimechtaxtahuis quej quinamiqui por cati anquichijtoque ica teteyome. Huan huajca anquimatise para san na niDIOS.

⁵ “Na niDIOS niquijtohua para nimechmacas ica se mayit huan teipa ica seyoc hasta amo teno mocahuas. ⁶ Ya monechcahuía itamiya ni tali huan hualas amopani miyac tatzacuiltili. Monechcahuía nopa tonali para miyac tacame amechtamisolo-se. ⁷ Monechcahuía hora ten tasosololisti para amojuanti cati anitztoque ipan nopa tali. Quena, ya ajsitinemi nopa tonali cati tahuel fiero quema antaijyohuise. Elis se tonali ten choquisti huan tahuejchihualisti. Amo oncas paquilisti ipan tepeme. ⁸ Nimantzi

nimechtatzacuiltis ica nohueyi cualancayo por noch tamanti hasta nimoyoltalis huan ayecmo nicualantos. Nimechtajtanis cuenta ten quenicatza anmonejnemiltijtoque huan nimechtatzacuiltis por sesen fiero tamanti cati anquichijtoque ica teteyome.⁹ Amo nimechtaojtas, yon amo nimechcahuilis xicholoca. Nimechtatzacuiltis por noch cati fiero anquichijtinento que ica taixcopincayome. Huan huajca anquimachilise para na niDIOS cati nimechtatzacuiltia.

¹⁰ “¡Xiquita, ya ajsico nopa tonali! ¡Ya ajsico nopa hora para amechtamisosolose! Amotajtacolhua ya techyolajsitoc. ¹¹ Pampa tahuel anquichijtoque cati fiero, noch anisraelitame anquiselise cati quinamiqui. Huan amo mocahuas yon se israelita cati fiero inemilis, yon amo mocahuas yon se cati mohueyimati huan cati tacajcayahua. Huan noch iniricojyo quihuicase inincualancaitacahua.

¹² “Quena, ya ajsico nopa tonali. Huajca yon se taccojquet ayecmo huelis paquis ica cati quicocjtoc huan yon se tanamacaquej ayecmo huelis mocuesos pampa quipolo tomi pampa na niquintatzacuiltis senquisa noch nopa masehualme ica nocualancayo. ¹³ Huan masque se tanamacaquej mocahuas yoltoc, ayecmo tanamacas sempa pampa na niDIOS niquijtojtoc ten amopantis huan amo mopatas. Nimechtatzacuiltis noch amojuanti huan amo aqui cati tajtacolchijtoc huelis quimanahuis inemilis.

¹⁴ “Israelitame quipitzase tapitzali para ma mocualtalica inisoldados, pero amo aqui quisas

para tatehuis pampa nocualancayo matalijtos ipan nochí inijuanti. ¹⁵ Inincualancaitacahua quinmictise ica macheta cati quisase calixpa ten nopa tepamit ten nopa altepet. Cati itz-toque ipan inimilhua nojquiya miquise ipan tate-huilsti. Huan cati mocahuase ipan altepet Jerusalén miquise ica mayanti huan cocolisti. ¹⁶ Huan nopa quentzi masehualme cati quisase huan yase cuatita para mochololtise, mocahuase iniselti quej se paloma huan sesen inijuanti mchoquilis por itajtacolhua. ¹⁷ Yon se israelita masehuali ayecmo quipiyas chicahualisti ipan imax. Huan nochí tancuahuihuipcase ica maj-majti. ¹⁸ Israelitame moyoyontise ica yoyomit cati fiero para quiixnextise inintequipachol. Nochi inintacayo tahuel huihuipicas. Inixayac elis chichiltic ica pinahualisti huan motamitejtequilise inintzoncal huan motzonhuatanise pampa mocuesose por inintajtacolhua.

¹⁹ “Israelitame quitepehuase inintomi ten plata huan oro ipan calles quej elisquía tasoli. Amo quinpalehuis para momanahuise quema ajsis no-hueyi cualancayo niDIOS. Huan nopa tomi amo quintamacas, yon amo quinixhuitis pampa inijuanti huetzque ipan tajtacoli por nopa tomi cati quipixque. ²⁰ Israelitame mohueyimatiyayaj ica miyac tamanti ten oro para moyectalise. Huan quitequihuijque inioro para quinchihuase taix-copincayome huan teteyome. Yeca ama, nochí nopa oro nijchihuas para quijiyase huan quiitase quej tasoli. ²¹ Na niquinmacas nochí inioro nopa masehualme cati sequinoc tali ehuani huan cati fiero ininemilis. Inijuanti quiichtequise nopa oro

huan nopa plata huan quichihuase amo tapaj-pactic nochí cati tatzejtzeloltic. ²² Huan na nimohuejcatilis ten notiopa quema hualase nopa tachtequini. Huan niquincahuilis ma quimahuis-poloca notiopa calijtic cati más ixtacatzi huan tatzejtzeloltic. Huan quiquixtise nochí tamanti cati pajpatiyo cati eltoc nopona tiopan calijtic huan quichihuase nochí tiopan calijtic amo tapaj-pactic noixpa.

²³ “Xijcualtalica se tepos cadena para quihiuicase nomasehualhua pampa ipan nochí nopa tali tahuel onca esti cati quitoyajtoque miyac temictiani huan ipan altepet Jerusalén onca miyac tatehuilisti. ²⁴ Huajca na niquinhualicas masehualme cati más mosisiníaj ten nochí sequinoc talme ipan taltipacti. Huan inijuanti moaxcatise nochí calme ipan altepet Jerusalén. Huan nojquiya quitamisosolose nopa tepamit cati tilahuac cati quiyahualohua nopa altepet cati ica nochí israelitame mohueyimatiyayaj. Huan nopa tacame cati niquntitanis quimahuispolose notiopa. ²⁵ Huan quema hualas nopa tasosololisti, israelitame quitemose tasehuilisti, pero amo quipantise. ²⁶ Hualas ininpani israelitame se tequipacholi huan teipa seyoc, huan teipa más miyac tequipacholi. Huan quicaquise para hualahuij ni soldados huan teipa quicaquise para hualahuij sequinoc. Huan quinequise quipantise se tajtolpanextijquet para quipiyas se tanextili ten na niDIOS pero amo quipantise. Totajtzitzti amo huelise quinmachtise pampa ya itztoque huejca ten nopa tanahuatilme. Huan huehue tacame amo huelise quinconsejomacase.

27 Nopa tanahuatijquet huan nopa tayacanani amo huelise quinpalehuise pampa nochi itztose ipan se hueyi tequipacholi por intintacolhua. Huan nochi israelitame mochoquilise pampa ayecmo quimatise taya quichihuase. Nochi san huihuipicase ica majmajti. Huan na nijhualicas ininpani nochi nopa tamanti amo cuali cati quinchihuilijtoque sequinoc. Quena, sesen inijuanti nijtaxtahuis senquisa quej quinamiqui ica cati quichijtoc. Huan quej nopa nochi quimatise para na niDIOS.”

8

Quinhueyichihuaj teteyome ipan itiopa TOTECO

1 Ipan macuili itequi nopa chicuasempa metzti ipan toisraelita calendario * quema Tanahuatijquet Joacim yahuiyaya para chicuase xihuit para quiqxijtoyaj huan quihiucatoyaj seyoc tali, na nimosehuijtoya ipan nochaj inihuaya nopa huehue tacame ten tali Judá. Huan nimantzi TOTECO Cati Más Quipiya Tanahuatili techitzqui ica imax.

2 Huan nitachixqui huan niquitac se tamanti cati nesiyaya quej se tacat. Huan ten itzinquechta para tatzinta nesiyaya quej se tilelemecti. Huan ten itzinquechta para huejcapa petaniyaya quej quema quitatíaj nopa teposti cati itoca bronce.

3 Huan yaya quixitajqui se tamanti cati nesiyaya quej imax huan techitzqui ipan notzoncal. Huan Itonal TOTECO techtan anqui ajacatipa huan techhuicac ipan se tanextili ten Toteco Dios hasta altepet Jerusalén. Huan techquetzqui campa nopa

* **8:1** 8:1 Ipan 17 septiembre 592 a.C. ipan tocalendario ten ama.

caltemit ica norte ipan itiopa TOTECO, campa eltoc nopa hueyi teteyot cati TOTECO tahuel quicualancaita. ⁴ Huan nimantzi nopona niquitac itatanex Dios cati Toteco tiisraelitame, huan nopa tanextili eliyaya san se ica nopa tanextili cati achtohuiya niquitac ipan nopa tamayamit.

⁵ Huan Toteco techilhui: “Tacat, xitachiya ica norte.” Huajca nitachixqui ica norte huan nopona campa eltoya nopa caltemit para calaquiij campa nopa taixpamit niquitac nopa teteyot cati tahuel quicualancamaca TOTECO. ⁶ Huajca techilhui: “Tacat, ¿tiquita taya quichihuaj ne israelitame? ¿Amo tiquita para quichihuaj huejhueyi tajtacoli para ma nimohuejcatali ten notiopa? Pero xihuala huan nimitznextilis sequinoc tamanti cati noja más huejhueyi huan más fiero.”

⁷ Teipa techhuicac campa itamapayo nopa tiopamit, huan nopona niquitac coyontoc nopa tepamit. ⁸ Huan techilhui: “Xijcoyoni achi más ne tepamit.”

Huajca na nijcoyoni achi más huan nijpanti se caltemit para se cuarto cati motatijtoc. ⁹ Teipa techilhui: “Ama xicalaqui huan tiquitas tamanti cati pano fiero cati quichihuaj nopona.” ¹⁰ Huajca na nicalajqui huan niquitac ipan nochí nopa tepamit calijtic quinixcopintoyaj miyac tamanti cohuame huan miyac tamanti tapiyalme cati mohuahuatatzaj talchi huan cati tahuel fiero huan amo tapajpactique iixpa TOTECO. Huan nojquiya quinixcopintoyaj nopa teteyome huan taixcopincayome cati nopa israelitame quinhueyichi-huayayaj. ¹¹ Huan nopona itztoyaj nopa 70 huehue israelita tacame cati quinyacanaj nochí

israelitame huan tatajco nopa tacame itztoya Jaazanías, icone Safán. Huan sesen quipixtoya se ticomit imaco huan quinpopochhuiyayaj huan quinhueyichihuayaj nopa teteyome. Huan intzonta nesiyaya quej se hueyi mixti ten pocti.

¹² Teipa TOTECO techilhui: “Tacat, ¿tiquita taya quichihuaj ixtacatzí ipan tzintayohuilot ne huehue tacame cati quinyacanaj israelitame? Nochi quinhueyichihuaj teteyome ipan nopa cuartos ten teteyome huan taixcopincayome. Huan quijito-huaj: ‘TOTECO amo techita pampa ayecmo aqui nica.’ ” ¹³ Huan teipa TOTECO techilhui: “Xihuala huan nimitznextilis tajtacoli cati quichihuaj cati noja más huejhueyi.”

¹⁴ Huan techhuicac campa nopa caltemit ica norte para calaquise ipan itiopa Toteco. Huan nopona niquitac itztoyaj miyac sihuame cati qui-choquiliyayaj nopa teteyot cati itoca Tamuz†.

¹⁵ Huan teipa TOTECO techilhui: “¿Tiquitac ya nopa? Xihuala huan tiquitas tajtacoli cati noja más fiero.”

¹⁶ Huajca techhuicac ipan nopa tamapamit cati eltoc tiopan calijtic. Huan nopona campa caltemit, tatajco ten nopa calixpamit cati más calijtic huan nopa taixpamit ten bronce, itztoyaj quej 25 israelita tacame cati tachixtoyaj ica campa

† **8:14** 8:14 Masehualme ipan sequinoc talme moilhuiyayaj quineltocayayaj para nopa dios Tamuz miquiyaya sesen xihuit quema amo taahuetziyaya huan nochí huaqui. Huan mon-equiyyaya para nochí ma quichoquilica para moyolcuis. Teipa quema pehuayaya taquiyahui huan moseliltíaj cuame, moilhuiyayaj para Tamuz moyolcuitoya. Nojquiya moilhuiyayaj para Tamuz quinpalehuía sihuame para coneipyase.

hualquisa tonati. Nopa tiopamit quicajtoyaj ica iniica. Huan moixtapachojtoyaj talchi quihueyichihuayabaj ne tonati.

¹⁷ Huan TOTECO techilhui: “Tacat, ¿tiquitztoc ya ni? Nopa Judá ehuaní moiilhuíaj para amo taixpanoj quema quichihuaj ni fiero tajtacoli. Inijuanti ayecmo techtacaquillíaj huan yeca techchihuaj para noja más ma nícuilani huan ma níquin-tatzacuilty. ¹⁸ Quena, chicahuac níquintatzacuilitys ica nochí nocualancayo. Amo níquintasojtas, yon amo níquincahuilis cholose. Masque chicahuac techtzajtzilise para níquintasojtas, amo níquintacaquilis.”

9

Nopa tatzacuiltylicati quiselise Jerusalén ehuaní

¹ Teipa TOTECO tehtzajtzili chicahuac ipan nonacas huan quijito: “Ya ajsiti hualahuij nopa tacame cati quintzontamiltise ni altepet ehuaní pampa ya níquinmactilijtoc ni altepet inimaco. Huan sesen ten nopa tacame quihualicas imaco nopa tepesti cati ica tasosolos.”

² Huan nimantzi níquinitac cati nesiyayaj quej chicuaseme tacame huan hualayabaj campa nopa caltemit cati huejcpa cati eltoc ica norte. Huan sesen ten inijuanti quihualicayaya imaco se tepesti para ica tasosolos huan tetzontamiltis. Huan tatajco inijuanti hualayaya se tacat cati moyoyontijtoya ica nopa yoyomit lino cati más cuali huan ipan itzinquechta quihualicayaya se tamanti quej cati para ipan quitecaj tinta tajcuilohuani. Huan nochí inijuanti calajque ipan

nopa tiopamit huan moquetzatoj nechca nopa taixpamit ten bronce. ³ Huan itatanex Toteco Dios yaya cati toTeco tiisraelitame motananqui ten campa eltoya tatajco nopa querubines cati itztoyaj más tiapan calijtic. Huan itatanex motalito campa icalteyo nopa tiopamit.

Huan TOTECO quinotzqui nopa tacat cati qui-huicayaya itzinquechta nopa tamanti quej cati ipan quitecaj tinta tajculohuani. ⁴ Huan quiilhui: “Xinejnemi ipan nochí calles ipan altepet Jerusalén huan xiquintalili se marca inincuaixco nochí nopa masehualme cati chocaj huan mocue-sohuaj por nochí tajtacoli cati quiitaj sequinoc quichihuaj campa hueli.”

⁵ Teipa nijcajqui TOTECO quinilhui nopa sequinoc cati nesiyayaj para tacame: “Xiyaca itepotzco ne tacat ipan nochí nopa altepet huan xiquinmictica nochí masehualme cati amo quipiyaj nopa marca inincuaixco. Amo xiquintasojtaca yon amo xiquincahuilica ma choloca. ⁶ Xiquinmictica huehuentzitzí, telpocame, ichpocame, coneme huan sihuame. Pero cati quipixtoque nopa marca, amo xiquinmictica. Huan xijpehualtica xiquinmictica nica ipan notiopa.” Huajca inijuanti pejque quinmictíaj nopa 70 huehue tacame cati itztoyaj nopona ipan tiopamit.

⁷ Teipa TOTECO quinilhui nopa chicuaseme tacame: “Nochi nopa mijcatzitzí xiquin-montonoca ipan nopa tamapamit para xijmahuispoloca ni tiopamit. Teipa xiquisaca.”

Huajca inijuanti quisque huan pejque temictíaj ipan nopa altepet.

⁸ Huan quema injuanti noja temictiyayaj, na niEzequiel nimocajqui noseltitzi. Huajca nimotancuaquetzqui huan nimohujitzonqui ica noxayac hasta talchi huan ica miyac tequipacholi niquijto: “TOTECO, ta Cati Más Tijpiya Tanahuatili, ¿ticualantoc ica Jerusalén ehuani hasta tiquintzontamiltis nochí israelitame cati noja mocahuaj?”

⁹ Huan TOTECO techilhui: “Nopa masehualmeten tali Israel huan ten tali Judá quichijtoque tajtacoli cati más fiero. Ipan nochí ni tali tahuel temictijtoque. Huan ipan ni altepet mojmosta quichijtoque tamanti cati amo xitahuac. Quicijtohuaj para na niDIOS nijtahuelcajtoc ni tali huan amo niquita cati quichihuaj, pero amo cana.
¹⁰ Huajca amo niquintasojtas, yon amo niquincahuilis ma choloca. Chicahuac niquintatzacultis quej quinamiqui ica nopa fiero tamanti cati quichijtoque.”

¹¹ Huan nimantzi nopa tacat cati quipixtoya ipan itzinquechta nopa tamanti quej cati ipan quitecaj tinta tajcuilohuani huan cati moyoyontijtoya ica yoyomit ten lino, ajisco huan quiijto: "Yanijtamichijtoc nochi cati technahuati ma nijchi-hua."

10

Itatanex Toteco Dios quicajtejqui nopa tiopamit

¹ Teipa sempa nitachixqui huan ipan nopa tamanti cati eltoya quej ilhuicacti cati eltoya inintzonta nopa ilhuicac ehuani cati inintoca querubines, niquitac cahuaniyaya se hueyi tet cati yejyectzi quej nopa azultic tet cati itoca zafiro.

Huan nesiyaya nopa hueyi tet quej elisquía se siyaj para se tanahuatijquet. ² Huan TOTECO quinotzqui nopa tacat cati moyoyontijtoya ica yoyomit ten lino huan quiilhui: “Xiya huan xicalaqui inintzala nopa ruedas cati momalaca-chohuaj tatzinta ten nopa querubines huan xijcui ica momax se quentzi ticoli cati xahuantoc cati eltoc tatajco ten nopa querubines. Huan xiquijtzelo nopa ticoli ipan nopa altepet.”

Huan quema noja nijtachiliyaya, nopa tacat calajqui huan quichijqui quej TOTECO quinahuatijtoya. ³ Huan quema calajqui nopa tacat, nopa querubines moquetztoyaj ica tatzinta ten nopa tiopamit huan itatanex TOTECO quitemitiyaya nopa tamapamit cati eltoc tiopan calijtic. ⁴ Huajca itatanex TOTECO motananqui ten inintzonta nopa querubines huan motalito itzonpac nopa tiopamit icalte. Huan quej nopa, nopa tiopamit temic ica nopa mixti ten itatanex huan nojquiya nopa tamapamit ten nopa tiopamit cahuaniyaya ica itatanex TOTECO. ⁵ Huan quema nopa querubines quioliniyayaj inieltapal, caquistiyaya hasta campa nopa tamapamit cati mocahua icalixpa tiopamit. Huan caquistiyaya quej itoscac Toteco Cati Quipiya Nochi Chicahualisti camanaltiyaya.

⁶ Quema TOTECO quinahuati nopa tacat cati moyoyontijtoya ica lino yoyomit ma yahui inintzala nopa querubines huan ma quicui nopa ticoli cati eltoc campa nopa ruedas, nopa tacat yajqui huan moquetzato nechca se ten nopa ruedas. ⁷⁻⁸ Huan sesen ten nopa querubines quipixtoya se tamanti quej elisquía imax itantita ieltapal. Huan

se ten nopa querubines quixitajqui imax huan quicuic se quentzi ticoli xahuantoc cati eltoya tatajco ten inijuanti huan quitenqui ipan imax nopa tacat cati moyoyontijtoya ica lino yoyomit. Huan yaya quicuic huan yajqui.

⁹ Huan sesen ten nopa nahui querubines quipixtoya se rueda inechca huan nopa ruedas petaniyaya quej nopa yejyectzi tet crisólito.

¹⁰ Huan nochí nopa nahui ruedas cati eltoyaj nechca nopa nahui querubines nesiyayaj san se. Nesiyaya quej sesen nopa ruedas quipiyayaya seyoc rueda ica iijtic cati quicruzmacatoya.

¹¹ Nopa querubines hueliyayaj yahuij ica iniarraves, ininejmat, iniica o iniixpa huan amo monequiyaya moicancuepase para yase ipan seyoc lado pampa nochipa yahuiyayaj iiymelac se ixayac.

¹² Huan nochí nopa querubines huan nopa ruedas quinpiyayayaj ixteyolme campa hueli. Nopa querubines quinpiyayayaj ixteyolme campa hueli ipan inintacayo, inincuitapa, ipan iniiicxi, ipan inimax huan ipan inieltapal.

¹³ Huan nijcajqui para nopa ruedas quintocaxtiaj “Ruedas cati Momalacachohuaj Chicahuac.”

¹⁴ Huan sesen querubín quipiyayaya nahui ixayac. Cati achtohui eliyaya se toro * ixayac, nopa ompa eliyaya quej se tacat ixayac, nopa expa eliyaya quej se león ixayac huan nopa najpa eliyaya quej se cuatojti ixayac.

¹⁵ Huan teipa nopa querubines motananque. Ni querubines eliyaya nopa nahui cati yoltoque cati niquinitac achtohuiya nechca nopa hueyat

* **10:14** 10:14 O querubín ixayac.

Quebar. ¹⁶ Huan quema nopa querubines quitananque inieltapal para yase ajacatipa, nopa ruedas cati eltoya ininechca nojquiya motananque huan yajque inihuaya. Huan nopa ruedas amo quema mohuejcatalijque ten nopa cati yoltoque. Nochipa nejnemiyayaj san sejco. ¹⁷ Huan quema nopa querubines moquetzque, nopa ruedas nojquiya moquetzque pampa inintonal nopa querubines itztoyaj ipan nopa ruedas.

¹⁸ Huan teipa itatanex TOTECO motananqui ten campa icalte nopa tiopamit huan yajqui motalito inintzonta nopa querubines. ¹⁹ Huan quema noja njtachilijtoya, nopa querubines patantejque inihuaya nopa ruedas huan moquetzatoj campa nopa caltemit cati eltoc ica campa hualquisa tonati ipan itiopa TOTECO. Huan itatanex Toteco Dios yaya cati toTeco tiisraelitame, motalijtoya inintzonta.

²⁰ Ni nahui tamanti cati yoltoque huan cati eltapalejque eliyayaj inijuanti cati achtohuiya niquininitac itantita Toteco Dios cati toTeco tiisraelitame nechca hueyat Quebar. Huajca niquinixmatqui para eliyayaj querubines. ²¹ Sesen ten inijuanti quipiyayaya nahui ixayac, huan nahui ieltapal huan se tamanti itantita ieltapal cati nesiyaya quej imax se masehuali. ²² Huan inixayac eliyaya san se ica nopa nahui cati niquininitac nechca hueyat Quebar. Huan inijuanti yahuiyayaj san xitahuac iniixmelac ica iniixpa.

11

Tatzacuiltli para nopa tayacanani ten altepet

Jerusalén

¹ Teipa Itonal TOTECO techtanqui huan techhuicac campa nopa caltemit cati eltoc ica campa hualquisa tonati ipan itiopa TOTECO. Huan npona campa caltemit niquininitac 25 tacame ten nopa altepet. Ome ten nopa tacame eliyayaj Jaazanías, icone Azur, huan Pelatías, icone Benáia, cati eliyayaj tayacanani ipan nopa altepet.

² Huan TOTECO techilhui: “Tacat, ya ni nopa huehue tacame cati quisencahuaj taya tajtacoli quichihuase masehualme ipan ni altepet huan quinconsejomacaj para ma quichihuaca cati fiero.

³ Inijuanti quinilhuíaj masehualme: ‘Cuali tonali para tiquninchijchihiuse calme pampa nochí eltoc cuali para tojuanti. Toaltepe Jerusalén eltoc temachti quej se comit ten teposti huan techmanahuis ten nochí tamanti cati mahuillili. Huan tojuanti tiitzose temachti quej nopa nacat ipan nopa tepos comit.’ Quej nopa quijjtohuaj.

⁴ Huajca xiquincamanalhui nopa tacame ica na notequiticayo huan xiquinyolmelahua taya fiero ininpantis teipa.”

⁵ Teipa Itonal TOTECO hualajqui ipan na huan techilhui ma niteyolmelahua ya ni: “Quej ni TOTECO amechilhuía nochí anisraelitame: ‘Anmoilhuíaj para anitztoque temachti, pero amo neli. Na niquixmati amotalnamiquilis huan nijmati taya anmoilhuíaj. ⁶ Tahuel antemictijtoque huan nochí nopa calles anquintemitijtoque ica mijcatzitzi. ⁷ Yeca na niDIOS Cati Más Nijpiya Tanahuatili nimechilhuía para nopa cuali tacame cati anquinmictijque eltoyaj cati temachme quej nopa nacat ipan nopa comit, pero amojuanti, amo.

Pampa na nimechquixtis huan nimechtojtocas ten ni altepet huan inijuanti cati hualase amechmictise noixpa. ⁸ Na nimechhualicas ipan amojuanti nopa tatehuilisti cati amojuanti tahuel anquimacasiyayaj. Quej nopa niquipijohua na, niDIOS Cati Más Nijpiya Tanahuatili. ⁹ Nimechquixtis ten altepet Jerusalén huan nimechtemactilis inimaco nopa masehualme cati seyoc tali ehuani. Inijuanti niquintequihuis para nimechtatzacuiltis. ¹⁰ Inijuanti amechmictise ica macheta. Huan anmiquise campa inepa tali Israel. Huan huajca anquimachilise para na niDIOS. ¹¹ Ni altepet melahuac amo amechmanahuis quej elisquía se comit ten teposti, yon amojuanti amo huelis anitztose nica ica temachili quej elisquía nacat. Pampa na nimechquixtis huan nimechtatzacuiltis hasta campa inepa tali Israel. ¹² Huan huajca anquimachilise para na niDIOS. Amojuanti amo anquitepanitayayaj notanahuatilhua huan san anquichihuayayaj nopa tajtacoli cati quichihuaj masehualme ipan nopa sequinoc talme cati mocahua nechca.’”

¹³ Quema noja niquincamanalhuiyaya ica itequiticayo Toteco huan niquinolmelahuayaya cati ininpantis, mijqui Pelatías, icone Benaía. Huajca nimotancuaquetzqui huan nimoixtapacho talchi huan chicahuac nicamanaltic huan niquipijo: “TOTECO, ta Cati Más Tijpiya Tanahuatili, ¿tiquintzontamiltis nochí nopa quentzi israelitame cati noja mocahuaj?”

TOTECO quiijto quichihuas seyoc yancuic camanal sencahualli

14 Huan TOTECO sempa nechcamanalhui para technextili amo quinsemanas nochí israelitame. Huan techilhui: **15** “Nopa masehualme cati itztoque ipan altepet Jerusalén camanaltij fiero ten moicnihua cati quinquixtijtoque huan quinhuicatoque ipan seyoc tali. Quiijtohuaj para quinquixtijtoque huan itztoque huejca ten na, niiniDIOS, huan yeca niquinmacatoc inijuanti cati mocahuaj ni tali. **16** Pero xiquinilhui para na, niiniDIOS Cati Más Nijpiya Tanahuatili, niquijtohuá para masque niquinquixti ten inintal huan niquintitanqui ipan sequinoc talme ten ni taltipacti huan itztoque huejca para se talojtzi, na niitztos inihuaya quej se cali cati eltoc temachti para niquinmocuitahuis huan monequi techhueyimatise nochí tonali quema itztose nopona. **17** Huan nojquiya xiquinilhui para niDIOS niquijtohuá para sempa niquinhualicas ten nopa talme campa niquinsemantoc huan sempa niquinsejcotilis huan niquinaxcatis nopa tali Israel.

18 “Quena, inijuanti mocuepase ipan inintal huan quinijcuénise nochí teteyome huan taixcopincayome cati achtohuiya quinhueyichihuayayaj nopona. Huan ayecmo teno mocahuas pampa quitamiltise nochí tamanti cati amo cuali. **19** Huan niquinmacas san se iniyolo huan niquinmacas se inintonal cati yancuic. Huan iniyolo cati eltoya tetic quej tet, na niquinpatilis huan niquinmacas se iniyolo cati yamanic para ica techicnelise.

20 “Huan inijuanti quitepanitase notanahuatilhua huan quichihuase nochí cati niquijtojtoc.

Huan quej nopa injuantí nelía elise nomasehuallhua huan na nielis niinIDIOS. ²¹ Pero israelitame cati itztoque ipan altepet Jerusalén cati quinhueyichihuaj huan quichihuaj miyac tamanti cati fiero iniixpa teteyome huan taixcopincayome, na niqintaxtahuis quej quinamiqui por nochí inintajtacolhua cati quichijtoque. Quej nopa na, niD- IOS Cati Más Nijpiya Tanahuatili, niquijtohua.”

Itatanex Toteco mohuejcatali ten altepet Jerusalén

²² Huan teipa nopa querubines quipatajque inieltapal huan motananque ajacatipa, huan nopa ruedas nojquiya yajque inihuaya. Huan itatanex Toteco Dios, yaya cati toTeco tiisraelitame, eltoya inintzonta nopa querubines. ²³ Huan quej nopa teipa itatanex TOTECO motananqui huan quicajte nopa altepet huan moquetzqui ipan nopa tepet cati eltoc quentzi ica campa hualquisa tonati ten nopa altepet.

²⁴ Huan teipa Itonal Toteco Dios techtanqui huan sempa techhuicac ipan tali Babilonia campa itztoyaj nopa sequinoc israelitame cati quinquixtijtoyaj inintal. Huan ica ya ni tanqui nopa tanextili cati niquitayaya quej nipaxolohuayaya ipan altepet Jerusalén. ²⁵ Huan nochí cati TOTECO technextili, niquinpoihuili nopa israelitame cati quinquixtijtoyaj ten inintal.

12

Ezequiel teyolmelajqui ten taya ininpantis Jerusalén ehuani

¹ Huan TOTECO techilhui: ² “Tacat, ta titztoctatajco ten masehualme cati mosisiniáj huan huelisquíaj quiitase cati melahuac ica iniixteyol sintqua quinequisquíaj, pero amo quinequij. Nojquiya huelisquíaj techtacaquilise, pero amo quichihuaj pampa masque quipixtoque ininacas mochihuaj quej amo tacaquij pampa tahuel mosisiniáj. ³ Huajca ama xijchihua cati nimitzhuis para tiquinnextilis Jerusalén ehuani quenicatza elis para quicajtehuase inintal huan yase huejca ipan seyoc tali. Xijcualtali seyoc moyoyo huan nopa tamantzitz cati tecahuilíaj quihiu case cati tequixtíaj ten inintal. Huan xijcajtehua mochaj para tiyas sejcoyoc. Huan xiya tonaya para nochia israelitame ma mitzitaca. Quej nopa huelis quimachilise taya quiijtosnequi cati tijchihua masque tahuel mosisiniáj. ⁴ Nochi tamanti cati tijhuicas xijquixti calixpa ipan tonaya iniixpa nopa israelitame para ma quiitaca. Teipa quema ya tiotac, xijcajtehua mochaj quej quichihuaj masehualme cati quinquixtíaj ten inintal huan quinchihuaj ma quiitzquica iniojhui para yase huejca hasta seyoc tali. ⁵ Huan quema noja mitztachiliptoche, xijcoyon iropa tepamit huan nopona xiquisa. Huan xijquixti nochia nopa tamantzitz cati tijhuica. ⁶ Quema ya tayohua huan noja mitztachiliptoche, xijtali ipan moajcol cati tijhuica huan xipechua xinejnemi. Xijtzacua moxayac para amo huelis tiquitas nopa tali. Nochi ya ni quinnextilis israelitame ipan Jerusalén cati ininpantis.”

⁷ Huan na nijchijqui senquisa quej TOTECO technahuati huan tonaya nijquixti calixpa se

bolsa huan nopa tamantzitzi cati se hueliyaya quihuicas quema quiqxitiyaya. Huan ica tiotac, nijcoyon i nopa tepamit ica nomax. Huan quema ya tayohua nijtali ipan noajcol noch tamantzitzi cati monejqui nijhuicas huan niquisqui quema nopa masehualme noja techtachiliitoyaj.

⁸ Huan tonili ijnaloc, TOTECO nechcamanalhui huan techilhui: ⁹ “Tacat, nopa mosisini jca tacame ten tali Israel mitztatzintoquilise taya quiijtosnequi noch ya ni cati tijchihua. ¹⁰ Huajca xiquinilhui para na, niiniDIOS Cati Más Nijpiya Tanahuatili niquijtohua para ya ni quinnextilá cati ipantis nopa tanahuatijquet ten altepet Jerusalén huan noch israelitame nopona. ¹¹ Xiquinilhui para ta tieli se tanextili para injuanti huan noch ni tamanti cati ta tijchijqui, quiixnextía nopa tamanti cati teipa ininpantis Jerusalén ehuani. Quinquixtise ten ininchaj huan quinhuicase ipan sequinoc talme campa itztotij quej seyoc tali ehuani.

¹² “Huan nopa tanahuatijquet ipan Jerusalén nojquiya quisas tayohua campa tacoyontoc cati quichihuase ipan nopa tepamit. Huan ipan ia-jcol quihuicas seyoc iyoyo huan cati monequi para ipan ojti. Huan quitzacuas ixayac para amo huelis quiitas nopa tali. ¹³ Huan na nijmasiltis ica nomata huan nijchihuas ma quihualicase ipan ni tali Babilonia inintal nopa caldeo masehualme, pero amo huelis quiitas ni tali ica iixteyol huan nica miquis. ¹⁴ Huan noch itequipanojcahua huan itamocuitahuijcahua cati quinequise quimanahuise, na niquinsemanas para ma yaca ipan campa hueli tali. Niquinquixtis ica nom-

cheta. ¹⁵ Huan quema ya itztose ipan campa hueli tali campa niquinsemantos, quimachilise para na niDIOS. ¹⁶ Pero se quentzi ten inijuanti niquinmanahuis ten tatehuilisti, mayanti huan cocolisti para quej nopa, quema yase para itztotij ipan sequinoc talme tepohuilise nochi nopa fiero tamanti cati quichihuayayaj, huan huajca quimachilise para na niDIOS.”

¹⁷ Teipa Toteco sempa nechcamanalhui huan techilhui: ¹⁸ “Tacat, xihuihuipica quema tijcua mopantzi huan xiqui moa ica majmajti huan tahuel ximocueso. ¹⁹ Huan nochi nopa masehualme cati itztoque ipan altepet Jerusalén huan ipan tali Israel, xiquinilhui para quej ni na, niDIOS Cati Más Nijpiya Tanahuatili, niquijtohua: ‘Anquicuase nopa quentzi cati anquipiyase ica majmajti huan anquiise nopa pilquentzi at ica miyac tequipacholi pampa nijtamisosolos nochi ni tali por amotajtacol. ²⁰ Nochi altepeme ipan amotal cati temitoque ica masehualme, niquintamisosolos huan nochi amotal mocahuas quej huactoc tali. Huan huajca anquimatise para na niDIOS.’”

²¹ Huan TOTECO sempa nechcamanalhui huan techilhui ni camanali: ²² “Tacat, nopa israelitame talojtzitzqui jtohuaj: ‘Panotoc miyac tonali huan nopa tajtolpanextijquet quiijto para hualayaya ten fiero, pero amo panotoc, huajca san istacati.’ ²³ Huajca xiquinilhui para na, niamODIOS Cati Más Nijpiya Tanahuatili, nijchihuas ma mochihua nopa camanali cati quiijtohuayayaj huan ayecmo quema sempa quitequihuise israelitame. Huan nojquiya xiquinilhui se yancuic camanali cati qui-

ijtose. ‘Ya ajsic tonali para panos nochí cati quiijtojque nopa tajtolpanextiani para panos.’

²⁴ “Pampa ayecmo oncas tanextili cati amo melahuac. Ayecmo itztose tachiyani cati tacajcayahuase huan quiijtose para nochí elis cuali ipan tali Israel. ²⁵ Pampa na niDIOS huan na nicamanaltis huan nochí camanali cati na niquijtojtoc, ya nopa panos. Ayecmo más nijchiyas. Nijtamichihuas nochí cati niquijtojtoc ipan amonemilis anmosisinijca israelitame. Quej nopa na, niamoteCO Cati Más Nijpiya Tanahuatili, niquijtohua.”

²⁶ Teipa TOTEKO techmacac seyoc camanali huan techilhui: ²⁷ “Tacat, nopa israelitame quiijtohuaj para nochí nopa tanextili cati tiquitztoc amo panos nimantzi. Quiijtohuaj para panos hasta teipa ica miyac tonali. ²⁸ Huajca ama xiquinilhui para quej ni na, niDIOS Cati Más Nijpiya Tanahuatili, niquijtohua: ‘Ayecmo más huejcahuas para panos nochí nopa tamanti cati niquijtojtoc. Nijchiwas ma pano nimantzi. Quej nopa na, cati niDIOS Cati Más Nijpiya Tanahuatili, niquijtohua.’”

13

Tatzacuiltyli para tacajcayajca tajtolpanextiani

¹ TOTEKO techmacac seyoc camanali huan techilhui: ² “Tacat, xiquinyolmelahua cati ininpantis nopa tacajcayajca tajtolpanextiani ipan tali Israel cati san quiijtohuaj camanali cati iniselti quisencajtoque. Xiquinilhui ma quicaquica nopa camanali cati na niinTECO niquijtohua. ³ Quej ni na, niiniDIOS Cati Más

Nijpiya Tanahuatili, niquijtohua. Teicneltique nopa tajtolpanextiani cati quijtohuaj quiitztoque tanextili, pero amo. San camanaltij cati quisa ipan iniyolo huan amo quema quiitztoque se tanextili ten na.

⁴ “¡Ay anisraelitame! Amotajtolpanextijcahua itztoque quej cayochime cati itztoque campa tafiero o campa huactoc tali. Amo teno ininpati. ⁵ Nopa tajtolpanextiani amo teno quichijtoque para sempa quicualtalise campa huelontoc huan cocoyocatoc nopa tepamit. Amo teno quichijtoque para quimanahuise ni tali huan para quipiyas chicahualisti ipan nopa tonali ten tatehuilisti quema na niDIOS nimechtatzacuiltis.

⁶ Nopa tanextili cati quijtohuaj quiitaj huan nopa camanali cati temacaj, san istacatili. Quijtohuaj para teyolmelahuaj camanali cati huala ten na niAMOTECO, pero amo niquinmacatoc camanali, yon amo niquintitantoc. Huan masque na amo teno niquinnextilijtoc, injuanti mochiyaj para ma nijchihua ma pano cati quijtohuaj inincamanal. ⁷ Amojuanti antajtolpanextiani, nelia hueyi antacajcaya jtoque pampa anquijtoque anquiitztoque se tanextili ten na, pero na amo teno nimechnextilijtoc. Huan anquijtohuaj para ancamaltij nocamanal, pero na amo teno nimechilhuijtoc.

⁸ “Yeca na, niDIOS Cati Más Nijpiya Tanahuatili, nimechilhuía: Na nimechtzontamiltis pampa anistacatij quema anquijtohuaj anquiitztoque tanextili ten nimechmacatoc. Huajca nimechcualancaitas huan nimechtehuis. ⁹ Quena, nimomatananas para niquintatzacuiltis nochí

nopa tajtolpanextiani cati teyolmelahuaj camanali cati amo melahuac. Ayecmo niquincahuilis ma itztoca inihuaya nopa israelitame campa mosentilíaj pampa inijuanti nomasehualhua. Huan niquixpolos inintoca ipan nopa listas ten israelitame huan ayecmo quiitase inintal. Huan huajca quimatise para na niDIOS.

¹⁰ “Quena, ni tacajcayajca tajtolpanextiani quincajcyahuaj nomasehualhua huan quinilhuíaj para ya onca tasehuilisti huan nochí eltoc cuali, pero amo onca tasehuilisti. Eltoc quej masehualme cati quichijchihuaj se tepamit cati amo tatzquitoc cuali nopa teme, huan nopa tajtolpanextiani quixajque nopa tepamit ica nexti para ma amo nesi campa amo cuali. ¹¹ Huajca ama xiquincamanalhui nopa tajtolpanextiani cati istacatij huan xiquinlhui para nopa tepamit nimantzi huetzis. Pampa na nijchihuas ma taquiyahui chicahuac, huan ma huetzi huejhueyi tesihuit huan ma huala se hueyi ajacat. Huan ica ya nopa huetzis nopa tepamit. ¹² Huan quema huetzis nopa tepamit, nopa masehualme amechilhuese: ‘¿Para ten amo antechilhuijque sintu huetzisquía? ¿Para ten amo quipalehui cati anquitalilijque?’

¹³ “Yeca na, niDIOS Cati Más Nijpiya Tanahutili, niquijtohua: Ica nohueyi cualancayo nijchihuas ma huala se hueyi ajacat, huan ma huetzi at chicahuac huan ma huetzi tesihuit huan ica nohueyi cualancayo nijtamisosolos. ¹⁴ Huan quej nopa nijhuelonis nopa tepamit cati amojuanti anquixajque ica nexti huan nijchihuas ma mocahua tanemijya itzinpehualtil. Quena, nijchi-

huas ma huetzi amopani huan ma amechtzontamilti. Huan huajca anquimatise para na niDIOS. ¹⁵ Huan quej nopa, quema ya huetztos nopa tepamit huan ya nimechztontamiltijtos antajtolpanextiani cati anquijtojque para noch elqui cuali, tamis nohueyi cualancayo. Huan huajca niteilhuis: ‘Nopa tepamit ayecmo onca huan nopa masehualme cati quialaxojque ica nexti, ayecmo aquijme. ¹⁶ Inijuanti eliyayaj tacajcayaajca tajtolpanextiani ipan israelitame cati quijtohuayaj quiitztoyaj ipan tanextili para altepet Jerusalén quipiyas tasehuilisti, pero amo eliyaya melahuac inincamanal.’ Quej nopa na, niDIOS Cati Más Nijpiya Tanahuatili, niquijtohua.

TOTECO quintatzacuiltis nopa sihua tajtolpanextiani

¹⁷ “Tacat, ama nojquiya xiquincamanalhui nopa sihua tajtolpanextiani cati quijtohuaj para na niquincamanalhuijtoc huan niquinmacatoc se tanextili, pero amo, pampa san quijtohuaj cati quisa ipan inintalnamiquilis. Xiquinyolmelahua ten ininpantis. ¹⁸ Xiquinilhui para quej ni na, niDIOS Cati Más Nijpiya Tanahuatili, niquijtohua: ‘Anteicneltique ansihua tajtolpanextiani cati anquinmasiltíaj nomasehualhua cati pisiltzitzi huan cati huejhueyi. Anquinmacaj miyac tamanti macosti huan yoyomit cati anquijtohuaj quipiyaj chicahualisti para ica ma motzontzacuaca. ¿Anmoilhuíaj para huelis anquimasiltise ininemilis nomasehualhua huan amo teno amopantis? ¹⁹ Por se quentzi pantzi o cebada, antechmahuispolohuaj huan

antechixpanoj iniixpa nomasehualhua pampa anquinchihualtíaj ma mohuejcatalica ten na. Anquinmictijtoque masehualme cati amo quinamiquiyaya miquise. Huan cati quinamiquiyaya miquise anquincahuilíaj ma itztoca. Tahuel hueyi anquincajcajtoque nomasehualhua cati quinpactía quitacaquilise istacatili.

20 “ Yeca na, niDIOS Cati Más Nijpiya Tanahuatili, niquipijtohua: Na nijcualancaita nochí nopa tamanti cati anquijitohuaj quipiyaj chicahualisti cati anquinchijchijtoque para ica anquinmasiltise nomasehualhua quej se quinmasiltia totome. Pero na nimechquixtilis nomasehualhua amomaco huan niquinchololtis. Quej nopa mocahuase majcajtoque quej totome cati cholohuaj ten campa tzactoque.

21 Nojquiya nimechquixtilis nopa yoyomit cati ica anmotzontzacuaj cati anmoilhuíaj quipiya chicahualisti huan niquinmanahuis nomasehualhua amomaco huan ayecmo anquinchihuilise san cati anquinequise. Huan huajca anquimatisse para na niDIOS.

22 Ica amoistacaticayo anquintemajmatijtoque nopa masehualme cati itztoque xitahuac masque na amo nijnequiyaya para ma mocuesoca. Huan nopa masehualme cati tahuel fiero ininemilis anquinyolchicajtoque para huejcahuas itztose masque quisenhuiquilíaj tajtacolchihuaj. **23** Pero ayecmo más anistacatisse huan anquijitose anquiitztoque se tanextili cati amo anquiitztoque. Yon ayecmo antacajcayahuase ica nopa tamantzitzí cati

anquijtohuaj quipiyaj chicahualisti pampa niquinmanahuis nomasehualhua amomaco huan nimechtzontamiltis noch amojuanti. Huan anquimachilise para na niDIOS.’”

14

Tatzacuilty para cati quinhueyichihuaj teteyome

¹ Teipa sequij huehue tacame ten tali Israel hualajque campa na niitztoya huan mosehuicoj noixpa. Quineuiyayaj ma njtatztintoquili TOTECO se tamanti para quimatise taya quiijtos. ² Huan quema itztoyaj nopona, TOTECO nechcamanalhui huan techilhui: ³ “Tacat, ni tacame ipan iniyolo quinhueyichihuaj huan quinicnelíaj teteyome. Inijuanti calactoque ipan miyac tamanti cati quinchihua ma tajtacolchihuaca. Huajca pampa quej nopa quichihuaj, amo quinamiqui niquincahulis ma techtatzintoquilica se tamanti. ⁴ Huajca ama xiquincamanalhui huan xiquinilhui para quej ni na, niDIOS Cati Más Nijpiya Tanahuatili, niquijtohua: ‘Aqui hueli israelita cati ipan iyolo quinhueyichihuaj teteyome huan taixcopincayome huan motalijtoc iniixpa tamanti cati quichihuaj ma huetzi ipan tajtacoli huan teipa hualas campa se notajtolpanextijca para quitemos notapalehuil, na niDIOS noseltitzi njtatztacuilty quej quinamiqui ica noch cati quichijtoc. ⁵ Quena, na niquintatzacuilty para quej nopa sempa njtanis iniyolo huan inintalnamiquilis noch nopa israelitame cati

techtahuelcajtoque huan quinhueyichijtoque teteyome huan taixcopincayome.'

⁶ "Huajca xiquinilhui nochí israelitame para quej ni na, niDIOS Cati Más Nijpiya Tanahuatili, niquijtohua: 'Ximoyolcuela ten amotajtacolhua. Ximohuejatalica ten amoteteyohua huan amotaixcopincayohua huan nochí nopa tamanti cati amo cuali anquichihuaj.' ⁷ Pampa cati hueli israelita o seyoc tali ejquet cati itztoc tatajco amojuanti cati techtauhelcahuas huan ipan iyolo quintalis teteyome huan taixcopincayome para quinhueyichihuas huan teipa monechcahuis campa se notajtolpanextijca para techtajtanis tapalehuili, na niDIOS noseltitzi nijtatzacuiltis.

⁸ Na nimoicancuepas huan niquincualancaitas masehualme cati quej nopa quichihuaj huan niquintatzacuiltis chicahuac. Niquintzontamiltis huan ica inijuanti nijchihuas para nochí sequinoc ma quiitaca quenicatza nitetatzacuiltia. Huan huajca anquimachilise para na niDIOS. ⁹ Huan sinta se ten nopa tacajcaya jca tajtolpanextiani mocajcayahuas huan moilhuis quiselijtoc se camanali huan teipa temacas nopa camanali cati amo melahuac, huajca xijmatica para na niDIOS nijcajcajajqui. Huan icamanal san elis se istacatili pampa amo mochihuas cati yaya quiijtohua, pero na nijcualancaitas nopa tajtolpanextijquet huan nijtontamiltis para ayecmo itztos tatajco noisraelita masehualhua. ¹⁰ Quena, niquintatzacuiltis nochí ome. Nijtatzacuiltis nopa tacajcaya jca tajtolpanextijquet huan nopa masehualme cati quinhueyichihuaj teteyome huan teipa quite mohuaj tapalehuili ipan se tajtolpanextijquet.

11 Huan quej nopa, nopa israelitame ayecmo tech-tahuelcahuase, yon ayecmo moijtacose ica tajtacoli. Huan inijuanti elise nomasehualhua huan na nielis niiniDios. Quej nopa na, niinintECO Cati Más Nijpiya Tanahuatili, niquijtohua.”

Quinamiqui para Jerusalén quiselis tatzacuiltyli

12 Huan TOTECO sempa techmacac se camanali huan techilhui: **13** “Tacat, quema nopa masehualme ipan ni tali tajtacolchihuase ica na huan tahuel techixpanose, huajca na nijtananas nomax huan niquintzontamiltis. Huelis niquinquixtilis inintacualis huan niquintitanilis se mayanti para ma miquica masehualme huan tapiroalme huan amo aqui hueli quinmanahuis. **14** Masque itztosquíaj nopona Noé, Daniel huan Job, amo quinmanahuisquíaj nopa tajtacolchijca masehualme. San momanahuisquíaj inijuanti pampa itztoque xitahuaque noixpa. Pero nochí nopa sequinoc masehualme, niquintzontamiltisquía. Quej nopa na, niDIOS Cati Más Nijpiya Tanahuatili, niquijtohua.

15 “O huelis niquintitanisquía miyac tecuanime cati tahuel mosisiníaj para ma quintzontamiltica nochí nopa masehualme ipan ni tali. **16** Sinta ni eyi cuajcualme itztosquíaj ipan nopa tali, melahuac nimitzilhuía inijuanti amo huelisquíaj quinmanahuise inintelpocahua, yon iniichpocahua, yon nopa sequinoc masehualme. Momanahuisquíaj san inijuanti nopa eyi huan nochí sequinoc miquisquíaj huan ni tali mocahuasquía quej huactoc tali.

17 “O huelis niquinhuilicasquía soldados para ma quitehuiquipiñ ni tali ehuani huan nitanahuatis ma quinmictica nochí nopa masehualme huan tapiyalme. **18** Masque ni eyi cuajcualme itztosquíaj ipan ni tali, san inijuanti momanahuisquíaj. Melahuac niquistohua inijuanti amo huelisquíaj quinmanahuise inintelpocahua, yon iniichpocahua. Quej nopa na, niDIOS Cati Más Nijpiya Tanahuatili, niquistohua.

19 “O huelis por nohueyi cualancayo nijtitanisquía ipan ni tali se hueyi cocolisti cati tahuel tamahua huan quichihuas ma miquica masehualme huan tapiyalme. **20** Masque ipan ni tali itztosquíaj Noé, Daniel huan Job, san inijuanti momanahuisquíaj pampa itztoque xitahuaque noixpa. Melahuac nimitzilhuía, amo huelisquíaj quinmanahuise inintelpocahua, yon iniichpocahua. Quej nopa na, niDIOS Cati Más Nijpiya Tanahuatili, niquistohua.

21 “Yeca na, niDIOS Cati Más Nijpiya Tanahuatili, niquistohua: Noja más amo huelis momanahuise nopa israelitame quema na nijtitanis ipan altepet Jerusalén nopa nahui tamanti tatzacuiltoni cati más fiero: tatehuilisti, mayanti, tecuanime huan cocolisti cati tahuel tamahua huan quichihuas ma miquica masehualme huan tapiyalme. **22** Pero mocahuase se quesqui ichpocame huan telpocame cati yoltose. Huan inijuanti huelise quisase huan hualase mosejcotiliquij ica amojuanti cati ama anitztoque nica quej seyoc tali ehuani ipan tali Babilonia. Huan quema hualase,

anquiitase quenicatza monejnemiltijtoque nopa masehualme huan taya fiero quichijtoque. Hua-jca amoyoltalise huan anquimachilise para xi-tahuac huan quinamiqui para nijtatzaculti alte-pet Jerusalén. ²³ Quena, amojuanti amoyoltalise quema anquiitase quenicatza nelía fiero mon-ejnemiltijtoque nopa masehualme huan fiero cati quichijtoque. Huan huajca anquimachilise para melahuac quinamiqui nijtatzaculti altepet Jerusalén huan imasehualhua. Quej nopa na ni-DIOS Cati Más Nijpiya Tanahuatili niquijtohua.”

15

Tali Israel el toc quej se xocomeca cati amo teno ipati

¹ Teipa TOTECO nechcamanalhui huan techil-hui: ² “Tacat, ximoilhui ten nopa cuahuit cati quisa ten se xocomeca tzonti. Amo huelis quinte-quihuise quej quitequihuía cuahuit ten sequinoc tamanti cuame pampa inijuanti achi más ipati. ³ Nopa xocomeca tzonti icuayo amo hueli quite-quihuise para yon se tequit. Amo hueli quite-quihuise quej se estaca o cuamaxali para ipan quicuapilose se tenijqui. ⁴ San hueli tijtequihuis para tijchihuas tit. Pero hasta para ya nopa no-jquiya amo nelía cuali pampa tamitata san ipan se talojtzi. Amo teno huelis ica tijtequihuis. ⁵ Quena, icuayo se xocomeca tzonti amo teno ipati quema ayemo tijtatijtoc huan yon quema ya tijtamitatis ipan tit pampa amo quichihua cuali ticoli cati huejcahua. Amo huelis tijtequihuis ipan yon se tamanti.

6 “Huan na, niDIOS Cati Más Nijpiya Tanahuatili, niquijtohua para nopa masehualme ten altepet Jerusalén itztoque quej xocomeca tzonme cati moscaltíaj ipan cuatitamit. Amo teno ininpati. Huajca, quej quitatíaj icuayo se xocomeca tzonti, quej nopa nojquiya njchihuas ica nopa masehualme ten altepet Jerusalén. **7** Na nimochihuas niinincualancaitaca, huan sintia cholose huan momanahuise ten se tilelemecti, njchihuas para ma huetzitij ipan seyoc tilelemecti para amo aqui momanahuis. Huan huajca quimachilise para na niDIOS. **8** Huan njtamisosolos inintal hasta mocahuas quej se huactoc tali pampa techixpanoque huan quinhueyichijque teteyome huan taixcopincayome. Quej nopa na, niDIOS Cati Más Nijpiya Tanahuatili, niquijtohua.”

16

Jerusalén ehuani quicajtejtoque TOTECO

1 Teipa TOTECO sempa nechcamanalhui huan techihui: **2** “Tacat, xiquinyolmelahua Jerusalén ehuani ten nochí nopa fiero tamanti cati quichijtoque. **3** Xiquinlhui para quej ni na, niDIOS Cati Más Nijpiya Tanahuatili, niquijtohua: Quema ayemo itztoyaj israelitame ipan altepet Jerusalén, cananita masehualme quipehualtijque nopa altepet. Eltoya se tacat amorreo huan isihua hetea cati ica pejqui nopa altepet. Huan Jerusalén elqui quej se conet cati amo aqui quinequiyaya. **4** Elqui quej quema tacatqui nopa conet, amo aqui quimocuitahui. Amo aqui quitequili ixic, yon amo aqui quipajpajqui. Amo aqui quipolo istat,

yon amo aqui quihuijconqui ica yoyomit. ⁵ Ipan nopa tonali quema pejqui nopa hueyi altepet, amo aqui quitasojtac, yon amo aqui mocuatotoni para quichihuolis yon teno. Amo aqui quimocuitahui. Nochi quijixque huan quitahuelcajque quej quicahuasquíaj se pilconetzi cuatita para ma miqui.

⁶ “Pero na nielqui quej se nitacat cati nipanoc nopena campa huetztoya nopa conet. Huan niquitac nelía soquiyo itacayo huan taxopehuayaya espoltic. Huan nijnequiyaya ma itzto huan niquilhui nopa pilaltepetzi ten israelitame: ¡Xiitzto!
⁷ Huan niquinpalehui nopa achtohui israelitame para inialtepe ma moscalti quej se xihuit cati onca cuatita. Huan quej se conet mochihua hueyi, anisraelitame anmomiyaquilijque. Anmohueyichijque huan anmosemanque campa hueli quej mohueyichihua se ichpocat cati tahuel yejectzi ica itacayo huan itzoncal cati moscaltijtoc. Pero noja anisraelitame anitztoyaj quej anxolome.

⁸ “Pero más teipa quema sempa nipanoc nopena, niquinitac israelitame quej se ichpocat cati ya motantoya huan ya quihiya xihuit para monamictis. Huajca elqui quej na nijpijqui nopa ichpocat ica noyoyo huan ihuaya nijchijqui se camanal sencahualli. Huan nochisraelitame mochijque noaxcahua quej isihua se tacat mochihua iaxca. Quej nopa na, niDios Cati Más Nijpiya Tanahuatili, niquijtohua. ⁹ Huan quej se ichpocat mopajpaca para monamictis, elqui quej na niquinpajpajqui israelitame huan niquinquixtili nopa soquit quej se quiqxtilisquía nopa esti cati quihiya ipan itacayo se conet. Huan elqui quej nijpojpojqui icuetaxo nopa ichpocat cati nijtape-

jpenijtoya para noaxca ica taajhuiyacayot cati más ajhuiyac. ¹⁰ Huan quej se tacat quimaca isihua yoyomit cati yejyectzitzi tajtzonti huan quimaca nopa yoyomit ten lino huan ten seda cati pajpatiyo, huan nopa zapatos cati tachijchihuali ica inincuetaxo pesojme cati más cuali; na nijmacac nopa altepet ten israelitame nochi ten más cuali. ¹¹ Nojquiya niquinmacac israelitame tamantzitzi cati yejyectzitzi. Elqui quej niquinmacac se macostí para inimax huan se costi para ininquechta. ¹² Nojquiya niquinmacac se anillo para quitalise ipan iniyacatzol huan ome pijpiloli para quitalise ipan ininacas huan se yejyectzi corona para quitalise ipan inintzonco. ¹³ Quej nopa, israelita masehualme mocajque yejyectzitzi ica nochi nopa tamantzitzi ten oro huan plata. Quipixque iniyoyo cati tachijchihuali ica icpat ten lino, huan ten seda huan ipani quipixqui tajtzonti cati yejyectzitzi. Nojquiya quicuayabaj nopa tacualisti cati más cuali: harina ten trigo, sayol necti huan aceite ten oliva. Huan mojmosta más mochijqui yejyectzi nopa hueyi altepet ten israelitame hasta elqui quej se sihua tanahuatijquet. ¹⁴ Huan nochi masehualme ipan sequinoc talme quimatque para nopa israelitame eliyabaj se tamanti masehualme cati más eliyaya yejyectzi. Huan quena, tahuel eliyaya yejyectzi ica nochi nopa cuali tamantzitzi cati na niquinmacatoya. Quej nopa na, niininTECO Cati Más Nijpiya Tanahuatili, niquijtohua.

¹⁵ “Pero teipa nopa israelitame quichijque quej se sihuat cati motemachía ipan iyejyejca huan mohueyimatque. Huan mochijque quej se ahuil-

nenca sihuat cati quinemaquiltía itacayo cati hueli tacat cati pano inechca. Huan nochí iyejyejca israelita masehualme mochijqui iniaxca sequinoc tacame. ¹⁶ Huan nochí nopa yoyomit yejyectzitzi cati niquinmacatoya, nopa israelitame quitequihuijque para ica quinchichihuase tiocalme ipan tepeme para nopona quinhueyichihuase teteyome huan taixcopincayome. Amo quema panotoya se tamanti quej nopa huan amo quema sempa oncas. ¹⁷ Nojquiya nopa tamantzitzi yejyectzitzi ten oro huan plata cati niquinmacatoya israelitame, quincuique huan quintequihuijque para quichichihuase teteyome huan taixcopincayome cati nesij quej tacame. Huan quinhueyichijque huan inihuaya quichijque cati fiero. Huan quema quinhueyichihuayaj elqui quej momecatiyayaj inihuaya sequinoc tacame pampa niquinchijtoya nochí israelitame noaxcahua quej se tacat mocuilia isihua para iaxca. ¹⁸ Huan nopa yoyomit cati yejyectzi tajtzonti cati nimechmacac anisraelitame, anquitequihuijque para ica anquinpiquise nopa teteyome huan taixcopincayome. Huan nopa aceite huan copali cati nimechmacac, anquitequihuijque quej se tacajcahualisti para ica anquinhueyichijque nopa teteyome huan taixcopincayome. ¹⁹ Huan nopa pantzi, harina, aceite huan nopa sayol necti cati na nimechmacatoya para ica ximopanoltica, anquinmacaque quej se tacajcahualisti cati ajhuiyac mijyotía iniiexpa. Quej nopa na, niamoteCO Cati Más Nijpiya Tanahutili, niquipjohua.

²⁰ “Nojquiya anquincuique amotelpocahua

huan amoichpocahua cati anquintacatiltijque para na huan anquinmictijque huan anquinmacaque nopa teteyome huan taixcopincayome quej tacajcahualisti. Huan yeca ama ayecmo aquijme más. Huelis anquiitayayaj amo ya se hueyi tajtacoli para san anquinamacayayaj amotacayo,²¹ huan yeca monequiyaya nojquiya anquinmictise noconehua huan anquintatise ipan huejhueyi tit quej tacajcahualisti para amoteteyohua huan amotaixcopincayohua.²² Huan ipan nochí nopa tonali quema anmochihuayayaj quej se ahuilnenca sihuat huan tahuel antajtacolchihuayayaj, amo quema anmoilhuijque ten nopa tonali huejcajquiya quema amo aqui amechnequiyaya huan anitztoyaj quej se pilconetzi cati xolot, soquiyo huan cati taxopehuayaya ipan ten ya ieso.

²³ “Huajca na, niDIOS Cati Más Nijpiya Tanahutili, niquijtohua: Nelía anteicneltique anisraelitame pampa tahuel nimechtatzacuítis por amo-tajtacolhua. Pero amo san ya nopa anquichijtoque. ²⁴ Nojquiya ipan plaza ipan sesen amoaltepehua anquinchijchijtoque taixpame para ipan anquinhueyichihuase teteyome huan taixcopincayome. ²⁵ Huan campa monamiqui sesen ojti anquinchijtoque taixpame para antahueyimatise. Anitztoque quej se ahuilnenca sihuat cati quiselía cati hueli tacat cati pano huan quisoquihuía iyejyejca ihuaya. ²⁶ Nojquiya anisraelitame anmomecatijtoque inihuaya nopa tali Egipto ehuani cati inintal eltoc nechça tali Israel. Tacame ten tali Egipto quipiyaj miyac tetili para ten hueli quichihuase. Nojquiya anquihueyichijtoque in-

inteteyohua para más ma momiyaquili amotajtacolhua huan noja más antechcualancamacaj ica amoahuilnencayo.

27 “Yeca na nimomatananqui huan nimechtatzaculti anisraelitame. Nimechquixtili nopa tali cati achtohuiya elqui amoaxca huan nimechtemactili inimaco nopa filisteos cati amechcualancaitaj. Huan inijuanti nojquiya pinahuayayaj por nopa fiero tamanti cati anquichihuayayaj. **28** Nojquiya quej se ahuilnenca sihuat antechcajtejtoque para anmomecatise inihuaya tali Asiria ehuani huan anquinhueyichihuase ininteteyohua huan inintaixcopincayohua. Nesi amojuanti amo quema ancuatise ica yancuic teteyome huan taixcopincayome, pampa quema ya anmomecatijtoyaj ica ininteteyohua Asiria ehuani, noja más anquinequiyayaj. **29** Huajca nojquiya anmomecatijque inihuaya ininteteyohua huan inintaixcopincayohua nopa masehualme ten tali Canaán huan nopa caldeo masehualme ten tali Babilonia campa itztoque miyac tanamacani. Pero masque noja más teteyome anquinpixque, amo anixhuique inihuaya, noja más anquintemohuayayaj.

30 “Yeca na, nIDIOS Cati Más Nijpiya Tanahutili, niquijtohua: Nelía fiero amoyolo anisraelitame huan yeca anquichijtoque nochí nopa fiero tamanti cati quichihua se ahuilnenca sihuat cati amo quema pinahua. **31** Pampa campa monamiqui nochí calles, anquichijtoque taixpame para anquinhueyichihuase teteyome huan taixcopincayome. Pero amojuanti amo senquisa

anquichihuaj quej quichihua se ahuilnenca sihuat pampa tahuel anquinequij antajtacolchihuase hasta amo antainamaj quema ten hueli anquichihuaj ica seyoc.

³² “Quena, anisraelitame anitztoque quej se ahuilnenca sihuat pampa masque anquipixtoyaj amohuehue, anquichijtoque ten hueli inihuaya sequinoc. Amo anquinequij anpaquise san ica na cati nelía niamohuehue. ³³ Nochi ahuilnenca sihuame tainamaj quema momecatíaj huan inimecahua quinmacaj tamantzitzi cati yejyectzitzi, pero ica anisraelitame amo quej nopa. Amojuanti hasta anquinmacaj amomecahua cati anquitoquiláj tamantzitzi cati yejyectzitzi para anquintaxtahuise amomecahua para ma hualaca para quichihuase ten hueli amohuaya. ³⁴ Huajca aneltoque neliyoca ten ahuilnenca sihuame. Amo aqui amechtaxtahuía amojuanti pampa amo aqui amechnequi, eltoc anquintaxtahuíaj para ma hualaca.

³⁵ “Yeca anisraelitame cati nimechita quej se ahuilnenca sihuat, xijtacaquili nocamanal na niDIOS: ³⁶ Quej ni na, niDIOS Cati Más Nijpiya Tanahuatili, niquijtohua: Pampa ta tijnextijtoc motacayo xolot ica nochi momecahua, huan tiquinhueyichijtoc teteyome huan taixcopincayome, huan tiquinmictijtoc moconebla huan tiquinmacatoc nopa teteyome huan taixcopincayome quej se tacajcahualisti, ³⁷ ya ni cati nijchihuas. Na niquinsentilis nochi momecahua cati inihuaya titajtacolchijqui. Niquinsentilis cati tiquinicneli huan cati tiquincualancaitac, huan iniixpa nochi inijuanti

nimitzxolohuis para nochí ma quiitaca motacayo para ma quimatica quenicatza tieltoc. ³⁸ Huan nimitztzacuiltis pampa timomecatijtoc huan titemictijtoc. Nijtoyahuas amoese anisraelitame ica nochí nocualancayo, pampa nimechtasomatiyaya quej se tacat quitasomati ishua. ³⁹ Teipa nimechtemactilis inimaco momecahua, nopa masehualme cati ehuani ipan miyac talme. Huan inijuanti amechsosolose anisraelitame. Huan quisosolose amotal huan nopa taixpame campa anquinhueyichihuayayaj teteyome huan taixcopincayome. Huan quisosolose nopa calme campa ten hueli anquichihuayayaj. Nojquiya amechichtequilise, anisraelitame, nochí nopa tamanti yejyectzitzí ten oro huan plata cati nimechmacatoc. Huan teipa quej quiqxtilíaj iyoyo se ahuilneca sihuat, nopa tacame cati hualase quisosolose altepet Jerusalén huan quicahuase senquisa xolot huan tahuel pinahuase nopa israelitame cati nopona itztoque. ⁴⁰ Huan motananase miyac masehualme cati seyoc tali ehuani huan hualase campa israelitame, huan quinmajcahuilise tet huan quinmictise ica inimacheta. ⁴¹ Nochi ininchaj quitamitasilise huan quintatzacuiltise iniixpa miyac sihuame. Huan ica ya nopa nijtamiltis iniahuijnencayo israelitame huan ayecmo quintaxtahuise inimecahua para ten hueli ma quichihuaca inihuaya, yon ayecmo quinhueyichihuase teteyome huan taixcopincayome. ⁴² Huan huajca tamis nohueyi cualancayo ica israelitame. Ayecmo nimitztasomatis, nimoyoltalis huan

nimosiyajquetzas ten ta huan ayecmo más nicualanis. ⁴³ Pero anquielcajtoque nopa tonali quema pejqui nopa altepet ten anisraelitame huan aneltoyaj se altepet ten masehualme cati pisiltzi. Huan na nimechicneli quema amo aqui amechicnelyaya. Huan yeca ama antechchijtoque ma nicualani ica nochí nopa fiero tamanti cati anquichijtoque, huan yeca nimechtatzacultis quej quinamiqui ica nochí amotajtacolhua. Quej nopa na, niDIOS Cati Más Nijpiya Tanahuatili, niquijtohua.

Quej se tenantí quichihua, iichpoca nojquiya ya nopa quichihua

⁴⁴ “Masehualme ten nochí taltipacti cati quin-pactía ahuilcamanaltij, camanaltise ten anisraelitame huan quijtose: ‘Quej se tenantí quichihua, iichpoca nojquiya ya nopa quichihua.’ ⁴⁵ Ta nojquiya tiitztoc quej se ahuilnenca sihuat cati quipixqui inana cati quitahuelcajqui ihuehue huan iconehua. Huan moicnihua nojquiya quintahuelcajque inihuehuejhua huan inincone-hua. Huajca melahuac quinextía para amonana anisraelitame elqui se hetea sihuat huan amotata se amoreo tacat cati amo techixmatiyaya na niDIOS.

⁴⁶ “Huan nopa altepet cati elqui quej mosihua icni huan elqui más chicahuac itoca Samaria. Huan yaya inihuaya nopa sequinoc pilaltepetzitznechca mocajque ica norte ten ta. Huan nopa altepet Sodoma cati huejcajquiya elqui huan elqui quej ta amo más chicahuac eliyaya. Huan yaya mocajqui ica tatzinta ten ta ica nopa sequinoc

pilaltepetzitzti cati inechca. ⁴⁷ Huan anisraelitame amo san anquitoquilijque nopa ojti cati inijuanti quitoquilijque, yon amo san titajtacolchijtoc quej inijuanti, pero nochí cati inijuanti quichihuayayaj anquiitaque quej amo teno. Yeca anquichijque tajtacoli cati noja más huehueyi huan más fiero que inijuanti quichihuayayaj. ⁴⁸ Na, niDIOS Cati Más Nijpiya Tanahuatili, nimitzilhuía melahuac mosihua icni Sodoma huan nopa pilaltepetzitzti cati nechca amo tahuel mosisiniijke nohuaya quej anisraelitame ipan Judá huan Jerusalén huan cati itztoque amohuaya. ⁴⁹ Altepét Sodoma ehuani tajtacolchijque pampa mohueyimatiyayaj, huan tahuel tacuayayaj huan tahuel tatzihuiyayaj. Amo quema quinpalehuijque nopa teicneltzitzti cati itztoyaj ininechca huan quinpolohuayaya ten ica panose. ⁵⁰ Nelía mohueyimatque Sodoma ehuani huan quichijque miyac tamanti cati na nijcualancaita, yeca na niquintzontamilti quej ama tiquita.

⁵¹ “Huan altepet Samaria ehuani amo quichijtoque yon tajco imiyaca amotajtacolhua anJerusalén ehuani. Más anquinhueyichijtoque teteyome huan taixcopincayome amojuanti que altepet Samaria ehuani. Yeca Samaria ehuani cati niquinata quej mosihua icnihua nesij achi más xitahuaque que amojuanti. ⁵² Huajca amo ximocuesoca sintia inijuanti quiselíaj tatzacuiltyli cati amo más chicahuac, pampa amotajtacolhua anJerusalén ehuani eltoc noja más fiero que inijuanti. Huan yeca inijuanti nesij quej achi más xitahuaque. Huajca anisraelitame, xiquijyohuica amotatzacuiltyli huan xipinahuaca pampa quej

nopa quinamiqui por amotajtacolhua.

⁵³ “Pero se tonali na sempa nijcualtalnis altepet Sodoma huan Samaria huan nochi ininpilaltepehua. Huan teipa nojquiya nijcualtalnis altepet Jerusalén huan ipilaltepehua. ⁵⁴ Pero ama monequi anJerusalén ehuani xiquijyohuica amotatzacuilty huan xijhuicaca amopinahualis por nochi tamanti cati anquichijtoque. Huan ica ya nopa Sodoma huan Samaria moyolchicahuase pampa amotatzacuilty elis más chicahuac que inijuanti.

⁵⁵ “Huan quema sempa nijcualtalijtosa altepet Sodoma huan altepet Samaria ica nochi inimasehualhua huan ica nochi ininpilaltepehua, nojquiya nijcualtalnis Jerusalén ica nochi imasehualhua huan ipilaltepehua. Huan quej nopa nochi eyi altepeme sempa itztose quej achtohuiya eliyayaj.

⁵⁶ Ipan nopa tonali quema anJerusalén ehuani ammohueyimatiyayaj, tahuel anquinpinajtiyayaj altepet Sodoma ehuani por nopa tatzacuilty cati quiselijque. ⁵⁷ Pero ya nopa anquichijque quema ayemo mocahuayaya tanemijya para más tajtacoli anquichijtoque anJerusalén ehuani que inijuanti. Pero ama nochi ya quimatij amotajtacolhua. Huan yeca nochi nopa edomita huan filisteo masehualme, huan nopa masehualme cati itztoque ininechca amechhuetzquilíaj huan amechpinajtíaj. ⁵⁸ Huajca anJerusalén ehuani, ama xiquijyohuica nopa tatzacuilty cati quinamiqui anquiselise por nochi nopa fiero tamanti cati anquichijtoque. Quej nopa na, niDIOS, niquipijohua.

⁵⁹ “Huan ama na, niDIOS Cati Más Nijpiya Tanahuatili, niquipijohua: Nimechmacas

anJerusalén ehuani cati quinamiqui anquiselise pampa amo anquiitaque sinta ipati nopa camanali cati anquichijque nohuaya quema noja aneliyayaj quej se ichpocat. Tahuel anquiixpanoque nopa camanali. ⁶⁰ Pero na amo niquelcahuas nopa camanali cati nijchijqui amohuaya quema ayemo aneliyayaj tahuel miyac masehualme ica san se amoeso huan nojquiya nijchihuas amohuaya seyoc camanali cati huejcahuas para nochipa. ⁶¹ Huan teipa anpinahuase quema anquielnamiquise nochi cati amo cuali anquichijtoque. Huan amosihua icnihua, Samaria huan Sodoma, cati amo quipixque parte ipan nopa achtohui camanali elise quej amoconehua. ⁶² Na nijyancuilis nopa camanali cati nijchijqui amohuaya, anisraelitame, huan huajca anquimachilise para na niDIOS. ⁶³ Huan anquielnamiquise nochi amotajtacolhua huan ayecmo huelis teno anquijtose, san anmocamatzacuase pampa anpinahuase quema nimechtaopojpolhuis nochi cati anquichijtoque. Quej nopa na niDIOS Cati Más Nijpiya Tanahuatili niquijtohua.”

17

Huicalot ten nopa xocomecat huan ome cuato-jme

¹ Teipa TOTECO sempa nechcamanalhui huan techilhui: ² “Tacat, xiquinpohuili nopa israelitame ni huicalot. ³ Xiquinilhui para quej ni na, niDIOS Cati Más Nijpiya Tanahuatili, niquijtohua: ‘Se hueyi cuatojti ica ieltapal cati nelía

patahuac huan quipiya miyac iijhuiyo ica miyac colores, hualajqui ipan tali Líbano huan quicotonqui se tiocuhuit imacuayo cati más huejcapa. ⁴ Huan ica itenchapich quipostejqui nopa tiocuhuit ichamacyo cati más selic huan más huejcapa chamantoya. Huan quihiucac ipan se altepet cati temitoya ica tanamacani huan tacohuani huan nopona quitojqui.

⁵ “Nojquiya quicuic ten talchi se cuayoli huan quitocato campa cuali tali iteno se hueyat campa oncayaya miyac at para ma moscalti nimantzi quej nopa cuahuit cati itoca sauce. ⁶ Huan nopa cuayoli ixhuac huan mochijqui se cuamecat cati amo más huejcapantic pero momajcajqui campa hueli huan quipixqui miyac ixihuiyo. Huan nochimacuayohua motananque huan moscaltijque para huejcapa imelac nopa cuatojti. Huan nopa cuamecat quipixqui miyac inelhuayohua cati moscaltijque para tatzinta huan cuali motatzquili jque ipan tali. Huan quej nopa mochijqui se cuamecat cati quipixqui imacuayohua huan ixihuiyohua. ⁷ Pero ajsico seyoc hueyi cuatojti ica ieltopal cati nelia patahuac huan miyac iijhuiyo para quinotzas nopa cuamecat ma quitoquili. Huajca nopa cuamecat quitilanqui nochimacuayohua huan imacuayohua para ma moscaltica imelac nopa yancuic cuatojti pampa moilhuiyaya quiselis más tapalehuili huan at ten seyoc lado. ⁸ Huan quej nopa quichijqui nopa cuamecat masque ya toctoya campa cuali tali huan campa onca miyac at. Huan ya huelqui moscaltia cuali huan quipiya imacuayohua huan ixihuiyohua cati más yejectzitzti para temacas

itajca cati más ajhuiyac.'

⁹ "Huajca ama na, niDIOS Cati Más Nijpiya Tanahuatili, nimitznahuatía xiquinilhui: '¿Anquijitaj para cuali mocahuas ni cuamecat huan quipiyas cuali itajca? Nimechilhuía para amo. Nopa cuatojti cati achtohui hualas huan quihuihuitas ica nochí inelhuayo. Quichihuas para nochí itajca nopa cuamecat ma tepehui huan ma pilini ixihuiyo. Huan amo monequis miyac soldados o miyac chicahualisti para quiquitise. ¹⁰ Huan masque quitocase nopa cuamecat ipan seyoc tali, ayecmo chamanis. Quema hualas se ajacat ica campa hualquisa tonati huan quiajsis, nimantzi huaquis huan hasta inelhuayo nojquiya huaquis masque motatzquilijtoc ipan cuali tali.' "

¹¹ Huan TOTECO sempa nechcamanalhui huan techilhui: ¹² "Quej ni xiquinilhui nopa mosisinijca israelitame: '¿Amo anquimachilíaj taya quiijtosnequi ni tamanti huicalot? Na nimechilhuis taya quiijtosnequi. Nopa achtohui cuatojti quiixnextía nopa tanahuatijquet ten tali Babilonia cati itoca Nabucodonosor. Yaya ajisco altepet Jerusalén huan quiitzqui nopa Tanahuatijquet huan quihuicac inihuaya itayacancahua hasta ipan tali Babilonia. ¹³ Huan quej nopa cuatojti quicuic ichamanca nopa cuahuit huan quitojqui ipan cuali tali nechca at, Nabucodonosor quicuic se tacat * ten nopa familia ten tanahuatiani huan quichijqui se camanali ihuaya. Quichihualti ma tatestigojquetza para nochipa quitequipanos.

* **17:13** 17:13 Sedequías.

Huan Nabucodonosor quicajtejqui quej tanahuatijquet huan quinhuicaque nopa masehualme cati más tayacanaj ipan nopa tali. ¹⁴ Quichijqui quej nopa para tali Judá ayecmo quipiyasquía chicahualisti huan ayecmo huelisquía motananas ica ya. Monequiyaya nopa tanahuatijquet cati quicajqui senquisa ma quitepanitas Nabucodonosor huan nopa camanali cati quichijqui ihuaya para huelis mocahuas ipan ital.

¹⁵ “Pero ni tanahuatijquet mosisini ica Nabucodonosor pampa quintitanqui itayolmelajcahua ipan tali Egipto para tajtanitij miyac cahuayo-jme huan miyac soldados cati cuali tatehuíaj para quitehuise Nabucodonosor. Huan amojuanti, ¿anmoilhuíaj amo teno ipantis cati mocajqui ipan tali Judá quema quiixpanoc nopa camanali cati ica tatestigojquetzqui ica Nabucodonosor para quichihuas? ¹⁶ Na, niDIOS Cati Más Nijpiya Tanahuatili, niquijtohua para temachti miquis nopa tanahuatijquet ten tali Judá cati quiixpanoc nopa camanali. Miquis ipan tali Babilonia campa itztoc nopa tanahuatijquet cati quimacac tequiticayot para ma tanahuati huan cati quichijqui nopa camanali ihuaya cati yaya quiixpanoc. ¹⁷ Huan Tanahuatijquet Faraón ten tali Egipto ica nochí isoldados cati más yajatij tatehuíaj amo huelise quipalehuise tali Judá quema nopa Tanahuatijquet ten tali Babilonia quiyahualos Jerusalén huan quinmictis miyac masehualme. ¹⁸ Pampa nopa tanahuatijquet quiixpanoc nopa camanal sencahuали masque tatestigojquetztoya para quitepanitasquía Nabucodonosor. Huan

ye ca amo hueli mochololtis ten nopa tatzacuiltyli
cati ipantis.

19 “ ‘Na, niDIOS Cati Más Nijpiya Tanahuatili,
niquijtohua: Temachti nijtatzacuiltyis nopa
tanahuatijquet pampa quichijqui se camanali
huan tatestigojquetzqui ica na notoca para
quitepanitasquía Nabucodonosor para nochipa,
pero amo quitepanitac nopa camanali, yon amo
quiitac sinta ipati. **20** Huajca na nijmajcahuilis
nomata para nijmasiltis. Huan nijhuicas ipan
tali Babilonia huan nepa nijtatzacuiltyis pampa
mosentanchijqui ica na huan techixpanoc.
21 Huan nechca nochí nopa israelita soldados
cati más tapejpenilme miquise ica macheta.
Huan inijuanti cati noja mocahuase yoltoque,
niquintitanis ipan campa hueli talme para
itztotij quej seyoc tali ehuani. Huan huajca
anquimachilise para na niDIOS.

22 “ ‘Huan na, niDIOS Cati Más Nijpiya Tanahu-
atili, niquijtohua: Na nojquiya nijchihuas quej
nopa cuatojti huan nijpostequis ichamanca nopa
tiocuahuit cati más huejcapantic, huan nijtocas
ipan nopa tepet cati más huejcapantic ipan tali
Israel. **23** Huan nijchihuas ma eli se tiocuahuit
cati nelía yejyectzi huan quipiyas imacuayohua
huan itajca. Huan nochí tamanti tapiyalme moe-
cahuilise itantita huan nochí totome motepasoltise
ipan imacuayohua pampa nopa tanahuatijquet
cati na nijtalís elis cati más cuajcualtzi. **24** Huan
quej nopa, nochí quimatisse para na niDIOS cati ni-
jquixtis se tanahuatijquet cati hueyi huan nijtalís
cati nijnequi huan nijchihuas ma moscalti huej-
capa. Eltoc quej nijtzintzontequis se cuahuit cati

huejcapantic huan nijhuejcapantalis se cuahuit cati eltoya pisiltzi. Nojquiya quimatisse para na nihueli nijchihua ma huaqui se cuahuit cati xoxohuic huan na nijchihua ma xoxohuiya se cuahuit cati huactoc. Na niDIOS niquijto para quej nopa nijtal is se tanahuatijquet huan quena, nijtal is.’ ”

18

M quis cati quichihuas tajtacoli

¹ Teipa TOTECO sempa nechcamanalhui huan techilhui: ² “¿Para ten ipan tali Israel quitequihuíaj nopa camanali cati quijtohua: ‘Nopa tetajme quicuajque xocomecat itajca cati xococ huan quichijtoc para inincone hua ma quimatica fiero ipan inintancoch?’ Camanaltij ten quenicateza taijyohuise israelitame por nopa tajtacoli cati inintatahua quichijque. ³ Temachti nimechilhuía, nimotestigojquetza na noseltitzi para ayecmo quema más anquitequihuise ni camanali ipan tali Israel. Pampa amo elis melahuac para quema se tajtacolchihua, icone quiselis tatzacuiltyli por itajtacolhua. ⁴ Pampa nochí masehualme noaxcahua. Noaxca se tetaj huan noaxca iconehua nojquiya. Huajca cati tajtacolchihuas elis cati miquis por itajtacol.

⁵ “Se tacat itztoc xitahuac sintia quichijtinemi cati cuali huan cati nelxitahuac. ⁶ Amo yahui ipan tepeme para quinilhuichihuilis teteyome huan taixcopincayome, yon amo quema quinhueyichijtoc nopa teteyome ten tali Israel. Amo momecatía, yon amo moteca ihuaya isihua quema esotemo.

⁷ Amo tetaijilhuía. Tetasoja huan sintá tetanejtía tomi huan quiprendajcahuilíaj se tamanti, nimantzi quicuepa. Amo quintachtequilía cati tecineltzitzí pero quintamacá huan quinmacá yoyomit cati amo quipiyaj iniyoyo. ⁸ Nopa tacat amo tainama itanca quema tetanejtía itomi. Amo quema techihuilía cati amo cuali. Nochipa tetajtolsencahua xitahuac. ⁹ Yaya quitepanita notanahuatilhua huan ica nochí iyolo quichihua cati quijtohuaj. Ni tacat nelía xitahuac huan temachti itztos. Amo miquis ipan nopa tonali quema hualas tatzacuiltyli. Quej nopa na, ni amo TECO Cati Más Nijpiya Tanahuatili, niquijtohuua.

¹⁰ “Pero huelis ni tacat quipiya se icone cati motacachihuas huan mochihuas se tachtejquet. Huelis mochihuas se temictijquet o se cati nochipa quichihua nochí tamanti cati amo cuali, ¹¹ cati itata amo quichihuayaya. Huelis icone nopa tacat quinilhuichihuilía teteyome ipan tepeme huan quinhueyitepanita. Huelis quisihuacuila cati elqui ihuampo, ¹² o quitajyohuiltía cati tecineltzi huan cati amo quipiya cati ica mopanoltis. O huelis quintachtequilía masehualme cati quitanejtijtoc tomi, o ayecmo quicuepa cati sequinoc quiprendajcahuilíaj quema tetanejtía se tamanti. Huelis icone nopa tacat motemachía ipan teteyome huan taixcopincayome huan tainama itanca quema tetanejtía tomi huan quichihua miyac tamanti cati na nijcualancaita. ¹³ Huajca ni fiero tacat amo quinamiqui itztos. Monequi miquis pampa quichijqui miyac tamanti cati amo nijnequi niquitas, huan imiquilis elis por ya itajta-

col.

¹⁴ “Pero huelis ni tajtacolchijca tacat nojquiya quipiyas se icone. Huan huelis icone quiitas nochí nopa tajtacoli cati itata quichihua huan nopa icone techimacasis niiTECO huan moilhuis para más cuali amo quichihuas quej itata quichihua. ¹⁵ Ma tijtalica para icone nopa fiero tacat amo yahui ipan tepeme para quinilhuichihuilis teteyome huan taixcopincayome, yon amo quinhueyichihua nopa teteyome ten tali Israel, yon amo momecatía. ¹⁶ Yaya amo quintaijyohuilitá cati teicneltzitzi pero quicuepa cati quiprendajcahuilíaj quema tetanejtía se tamanti. Amo quema tachtequi huan quintamacá cati amo quipiyaj intacualis huan quinyoyontía cati amo quipiyaj iniyoyo, ¹⁷ Yaya quinpalehuía cati teicneltzitzi huan amo tainama itanca quema tetanejtía itomi. Yaya quitepanita nochí cati quijjtohua notanahuatil. Huajca ni tacat amo miquis por nopa tajtacoli cati quichijqui itata. Ni tacat temachti itztos.

¹⁸ “Pero nopa tacat cati tetaijyohuili, tachtejqui huan quichijqui miyac tamanti cati amo cuali campa imasehualhua, yaya miquis por itajtacolhua.

¹⁹ “Pero amojuanti anquijtohuaj: ‘¿Amo monequi nopa conet miquis por itata itajtacolhua?’ ¡Amo, amo monequi! Sinta se conet quichihua cati cuali huan cati xitahuac, nojquiya quitepanita huan quichihua nochí cati quijjtohua notanahuatil, huajca nopa tacat icone temachti amo quiselis tatzacuilty pero mocahuas yoltoc. ²⁰ San yaya cati tajtacolchihuas miquis por itajtacolhua. Se conet amo miquis por itata itajtacolhua, yon amo

miquis se tacat por icones itajtacolhua. Se masehuali cati xitahuac quiselis se taxtahuili pampa cuali inemilis. Huan se masehuali cati fiero inemilis quiselis se tatzacuiltyli pampa fiero inemilis.

*Iojhui TOTECO senquisa xitahuac
(Ez 33:10-20)*

21 “Huan sinta se masehuali cati fiero inemilis quicahuas nochi itajtacolhua huan pehues quitepanitas nochi cati quijtohua notanahuatilhua huan quichihuas cati cuali huan cati xitahuac, huajca temachti itztos ipan nopa tonali ten taijyohuilisti. Amo miquis. **22** Huan na ayecko niquelnamiquilis itajtacolhua cati achtohuiya quichihuayaya. Yeca temachti itztos pampa quichihua cati xitahuac.

23 “¿Anmoilhuíaj techpactía ma miqui se masehuali cati fiero inemilis? ¡Amo, amo cana! Na nijnequi ma moyolcuepa ten itajtacolhua huan ma itzto. Quej nopa na, niDIOS Cati Más Nijpiya Tanahuatili, niwijtohua.

24 “Pero sinta se cuали tacat pehua quichihua miyac tajtacoli quej quichihua seyoc cati tahuel tajtacolchihua, ¿anmoilhuíaj quinamiqui noja itztos nopa masehuali? ¡Amo quinamiqui! Yon amo nijtachilis nochi nopa cuали tamanti cati quichijqui achtohuiya. Huan yaya miquis por itajtacolhua huan itaixpanolhua.

25 “Pero huelis anquijtohuaj para amo quinamiqui cati na nijchihua. Huajca xijtacaquilica, anisraelitame. ¿Eltoc na cati amo nijchihua cati xitahuac o amojuanti cati amo anquichihuaj cati xitahuac? **26** Quema se cuали tacat quicahuas cati cuали quichihuayaya

huan quichihuas cati amo cuali, yaya miquis por itajtacolhua ipan nopa tatzacuiltli cati huala. ²⁷ Pero sinta se tajtacolchijca tacat quicahuas itajtacolhua huan pehuas quitepanitas notanahuatilhua huan quichihuas cati cuali huan cati xitahuac, huajca quimanahuis inemilis ipan nopa tonali. ²⁸ Pampa quiitac itajtacolhua huanmoilhui más cuali quicahuas para quipiyas se nemilisti xitahuac, yeca ni tacat temachti noja itztos huan amo miquis ipan nopa tonali. ²⁹ Huelis, anisraelitame, anquisenhuiquilise anquijitose para na amo nijchihua cati xitahuac. Pero eltoc amojuanti, anisraelitame, cati amo anquichihuaj cati xitahuac, amo na.

³⁰ “Na nimechtajtolsencahuas sesen ten amojuanti, anisraelitame, huan nimechtatzacuiltis quej quinamiqui ica cati anquichijtoque. Quej nopa na, niDIOS Cati Más Nijpiya Tanahuatili, niquijtohua. Huajca ximoyolcuepaca huan xijcahuaca nochí amotajtacolhua. Amo ximiquica ipan nopa tatzacuiltli cati huala por nochí cati anquichijtoque. ³¹ Xijcahuaca nochí tamanti cati amo cuali cati anquichihuayayaj huan ximochihuaca amasehualme cati anquipiyaj amoyolo huan amotonaltzi cati yancuic. ¿Para ten monequi anmiquise, anisraelitame? ³² Na amo techpactía ximiquica. Na niDios Cati Más Nijpiya Tanahuatili niquijtohua: Ximoyolcuepaca huan xijsenhuiquilica xiitztoca.”

Se mijca huicat para nopa tanahuatiani ten israelitame

¹ “Nojquiya xihuicaca ni mijca huicat cati amechpohuilá se huicalot ten nopa tanahuatiani ten israelitame. ² Quej ni xihuicaca:

“ ‘Monana elqui se sihua tecuajquet cati itz-toya tatajco ten sequinoc tapiyalme cati nojquiya chicahuac quej tecuanime cati oquichme.

Huan nopa sihua tecuajquet, cati quinixnextía nopa israelitame, quichijqui ichaj nopona inihuaya nopa sequinoc talme huan nopona quiniscalti iconehua.

³ Elqui quej nopa sihua tecuajquet quiiscalti se iconе ica miyac tamocuitahuili, pampa ten israelitame motananqui se tanahuati-jquet.

Yaya moscalti nimantzi huan quipixqui miyac chicahualisti.

Quimatqui quenicatza quintzontamiltis sequinoc tapiyalme,

huan pejqui quincua masehualme.

⁴ Huan nopa sequinoc talme quicajque ten ya, huajca inijuanti quinnotzque masehualme cati quimatiж quenicatza tamasiltise,

huan quimasiltijque ipan se ostot.

Huan quiilpijque ica tepos cadenas,

huan quihuicaque hasta tali Egipto.

Quej nopa ipantic nopa tanahuatijquet ten israelitame.

⁵ Huan quema nopa sihua tecuajquet quiitac para cati quinequiyaya ma quichihua nopa achtohui iconе ayecmo cuali quisas,

huan ayecmo teno hueli quichihuas,
quicuic seyoc icona huan quinextili quenicatza
mochihuas más mosisinía.

6 Huan yaya nejenenqui ica sequinoc leones huan
mochijqui se cati más tayacanquet para
tanahuatis.

Elqui quej quimatqui quenicatza quinmasiltis se-
quinoc tapiyalme,

huan quenicatza quintzontamiltis masehualme.

7 Yaya quinsosolhuili miyac ininchajchaj tanahu-
atiani ipan campa hueli talme cati moc-
ahuayayaj inechca.

Huan nopa tanahuatijquet ten israelitame quin-
sosolo iniranchos huan inialtepehua se-
quinoc.

Nochi mili quichijqui quej huactoc tali,
huan quitamilti noch tamanti pixquisti.

Huan quema nanalcayaya nopa tecuajquet, noch
tali huihuipicayaya. Quej nopa elqui nopa
tanahuatijquet.

8 Huajca nopa soldados ten noch tali quiyahualo-
jque,

huan quimasiltijke ipan se hueyi ostot huan qui-
itzquijke.

9 Huan ica tepos chijcoli quihuahuatzque huan
quicalaquique ipan se cuacali cati tzactoc
quej para se tapiyali.

Huan quihuicaque iixpa nopa tanahuatijquet ten
tali Babilonia.

Huan nopona quitzajque para ayecmo moquaquis
itoscac nopa tanahuatijquet ipan nopa te-
peme ten inintal israelitame.

10 O huelis tiquijtose para monana, cati quinnextía nopa israelitame, elqui quej se xocomeca tzonti cati toctoc atenti.

Huan nopa xocomeca tzonti temacac cuali itajca huan quipixqui ixihuiyo cati yejyectzitzti pampa quipixqui miyac at.

11 Ten imacuayohua quisqui cuajcuali cuatopili para tanahuatiani.

Huan mochijqui tahuel huejcapantic nopa xocomeca tzonti cati quinextía inintanahuatijcayo israelitame.

Mochijqui hueyi nopa tzonti hasta nochí hueliyayaj quiitase ipan campa hueli tali, pampa huejcapantic huan quipixqui miyac imacuayohua.

12 Pero hualajque cati quihuihuitaque nopa xocomecat, ica miyac cualancayot huan quitahuiso que hasta talchi.

Huan nochí imacuayohua postejque huan hua-jque, pampa quinajsic se ajacat cati huala ica campa hualquisa tonati.

Huan itajca quiajsic tit huan tamitatac.

13 Huan ama nopa xocomeca tzonti cati quinextía nopa tanahuatijquet oneltoc ipan se huactoc tali ten Babilonia,

campa tahuel tetic nopa tali huan amo onca at.

14 Huan ipan imacuayohua quisqui se hueyi tit cati quitamitati itajca.

Quej nopa TOTECO quitatzaculti ni tanahuatijquet cati nopa macuayot quinextía.

Huajca ama nopa israelitame cati nopa xocomeca tzonti quinixnextia ayecmo quipiyas imacuayohua cati tejtetic.

Ayecmo quisas ipan imacuayohua cati huelis mochihuase icuatopilhua se tanahuatijquet.’”

Ya ni eltoc se mijca huicat huan quej nopa mon-equi motequihuis quema ajsis hora.

20

Mosisinijtoque israelitame ica TOTECO

¹ Ipan majtacti itequi nopa metzti macuili ipan toisraelita calendario * quema yahuiyaya para chicome xihuit ica quiqxijtijtoyaj Tanahuatijquet Joaquín ipan ital huan quihuicatoyaj, techitacoj sequij huehue tacame ten israelitame para ma nijtajtani TOTECO se tenijqui por inijuanti. Huan mosehuijque noixpa para quichiyase taya quiijtos TOTECO. ² Huan TOTECO nechcamanalhui, na niEzequiel, huan techilhui: ³ “Tacat, xiquincamanalhui nopa huehue tacame ten tali Israel huan xiquinilhui para quej ni na, niDIOS Cati Más Nijpiya Tanahuatili, niquijtohua: ‘Amo quinamiqui anhualahuj para antechtajtaniquij notapalehuil. Huan temachti amo teno nimechilhuis.’”

⁴ Huan yaya techilhui: “Tacat, monequi xiquintajtolsencahua ni tacame nelia chicahuac huan xiquinpohuili nochí nopa tajtacoli cati quichijtoque ipan inintal hasta ipan nopa tonali quema itztoyaj inihuejapan tatahua huan hasta ama.

* **20:1** 20:1 Ipan 14 itequi agosto, 591 a.C. ipan tocalendario ten ama.

⁵ Xiquinilhui para quej ni na, niDIOS Cati Más Nijpiya Tanahuatili niquijtohua: ‘Quema niquintapejpeni nopa israelita masehualme para elise noaxcahua huan nimonexti ica inijuanti ipan tali Egipto, na nitatestigojquetzqui huan niquinilhui para na niDIOS nielisquía niiminTECO. ⁶ Huan nitatestigojquetzqui para melahuac niquinquixtisquía inijuanti huan iniihuihua ipan tali Egipto huan niquinhuicasquía ipan seyoc tali cati nijpantijtoya huan nijcualtalijtoya para inijuanti. Elqui se cuali tali cati temacayaya miyac itajca hasta mocahua. Eliyaya nopa tali cati más yejyectzi huan más cuali que nochí sequinoc talme. ⁷ Nojquiya niquinilhui para ma quinixpolihuiltica nochí teteyome huan taixcopincayome cati quinpixtoyaj. Niquinilhui ma amo mosoquihuica noixpa ica nopa teteyome huan taixcopincayome ten tali Egipto pampa na niDIOS niamoTECO.

⁸ “Pero inijuanti mosisinijque ica na huan amo quinejque techtacaquilise. Nojquiya amo mohuejcatalogique ten nopa teteyome huan taixcopincayome ten tali Egipto. Huajca na nimoilhui más cuali niquintatzacultis tahuel chicahuac ica nohueyi cualancayo quema noja itztoyaj nopona ipan tali Egipto huan quej nopa nimoyoltalis inihuaya.

⁹ “Pero amo nijchijqui pampa amo nijnequiyaya sequinoc ma techhuetzquilica huan para nopa egiptome camanaltisquíaj fiero ten na cati niininTECO israelitame, cati niquintencahuilijtoya para niquinquixtis ipan tali Egipto. Amo nijnejqui ma quijjtoca para amo nijpixqui chicahualisti huan amo

nihuelqui niquinmanahuis nomasehualhua cati taijyohuiyajay. ¹⁰ Huajca niquinquixti ten nopa tali Egipto, iniixpa nopa egiptome huan niquinhuicac ipan huactoc tali. ¹¹ Huan niquinmacac notanahuatilhua para ma quintoquilica para huelis itztose. ¹² Nojquiya niquinmacac nopa tonali para ipan ma mosiyajquetzaca cati elisquia se tanextili ica injuanti huan na para ma quinelnamiquilti para na niDIOS cati niquiniyocacajtoc para niquinchihuas notatzejtzeloltica masehualhua.

¹³ “ Pero nopa israelitame mosisinijque ica na nopona ipan nopa huactoc tali huan quitahuelcajque notanahuatilhua. Amo quinejque quitepanitase notanahuatilhua cati quinmacatosquia nemilisti sintia quinneltocatosquiaj. Huan nopa tonali para mosiyajquetzase nojquiya amo quitepanitaque. Huajca niquijto para niquintzontamiltis ica nohueyi cualancayo nopona ipan huactoc tali. ¹⁴ Pero sempa amo nijchijqui pampa amo nijnejqui ma techpinahualtica sequinoc talme cati quiitaque quema niquinquixti nomasehualhua ipan tali Egipto. Amo nijnejqui ma quijtoca niquintzontamilti nomasehualhua pampa amo nihuelqui niquinmocuitahui.

¹⁵ “ Pero nopona ipan huactoc tali nitates-tigojquetzqui huan niquinilhui para amo niquinhualicas ipan nopa tali cati nijtapejpenijtoya para injuanti. Eliyaya se tali cati yejyectzi huan temaca tahuel miyac itajca huan eltoc nopa tali cati mas yejyectzi ten nochis sequinoc talme. ¹⁶ Quej nopa niquinilhui pampa injuanti

amo quitepanitaque notanahuatilhua huan amo quinejque quichihuase cati na nijnequi, huan quiixpanoque nopa tonali para mosiyajquetzase. Ipan iniyolo tahuel quinhueyichihuayayaj teteyome huan taixcopincayome. ¹⁷ Pero noja niquintasojtac huan nimotzacuili para amo niquntzontamiltis ipan nopa huactoc tali.

¹⁸ “ ‘Huan nopona ipan huactoc tali niquin-camanalhui ininconeňua huan niquinilhui ma amo quitoquilica iniojhui inintatahua, yon ma amo quinhueyichihuaca nopa teteyome huan taixcopincayome cati inijuanti quinhueyichijque. ¹⁹ Niquinilhui: Na niDIOS niamoTECO. Huajca xijtepanitaca notanahuatilhua huan xijchihuaca nochí cati niquijtohua. ²⁰ Xiquiyocatalica nopa tonali para anmosiyajquetzase pampa ya nopa elis se tanextili para amechelnamiquiltia para na niDIOS niamoTECO.

²¹ “ ‘Pero ininconeňua nojquiya mosisiniňque ica na. Quitahuelcajque nochí notanahuatilhua cati quinmacatosquíaj nemilsti sintia quineltocatosquíaj. Nojquiya quiixpanoque nopa tonali para mosiyajquetzase. Huajca sempa niquijto para niquntzontamiltis ica nohueyi cualancayo nopona ipan huactoc tali. ²² Pero sempa niquintasojtac pampa amo nijnejqui sequinoc talme cati quiitaque quema niquinquixti nomasehualhua ipan tali Egipto ma camanaltica fiero ten na. ²³ Pero nopona ipan huactoc tali nitatestigojquetzqui huan niquijto para temachti niquinsemanasquía huan niquntitanisquía ipan campa hueli talme ipan taltipacti, ²⁴ pampa amo quitepanitaque

notanahuatilhua huan quitahuelcajque nochicati niquinilhui ma quichihuaca. Amo quitepanitaque nopa tonali para mosiyajquetzase huan san quinequiyayaj quinhueyichihuase nopa teteyome huan taixcopincayome ten inintatahua.

²⁵ Huan techixpanoque hasta niquincahuili ma quitoquilica tanahuatilme cati amo cuali huan cati amo quinmacasquia nemilsti. ²⁶ Nojquiya niquincahuili ma momahuispoloca huan ma quinhuicaca iniachtohui conehua cati na niquinmacatoya huan ma quintatica quej tacajcahualisti para quinmacase nopa teteyome huan taixcopincayome. Nijchijqui ya ni para ma momajmatica huan ma quimachilica para na niDIOS.'

²⁷ "Huajca, tacat, xiquincamanalhui nopa israelitame huan xiquinilhui para quej ni na, niDIOS Cati Más Nijpiya Tanahuatili, niquijtohua: 'Amohuejcapan tatahua quisenhuiquilijque mosisiníaj nohuaya. ²⁸ Huan quisenhuiquilijque techixpanoj quema niquinhualicac ipan nopa tali cati niquintajtolcahuili niquinmacas. Huan ipan nochicati tepeme o inintantita nochicuame cati quipantijque, nimantzinopona quitencahuayayaj tacajcahualisti huan copali iixpa teteyome. Huan tahuel techcualancamacaque quema quitencahuayayaj taajhuiyacayot huan copali huan tacajcahualisti cati quityahuaj. ²⁹ Huan na niquintatzintoquili: ¿Para ten anyahuij ipan nopa lugar para teteyome nopona huejcapa? Yeca nopa lugar quitocaxtijque: Bama. (Bama quinequi quiijtos: Lugar Para Teteyome Nopona Huejcapa.) Huan

quej nopa quitocaxtíaj hasta ama.'

³⁰ "Huajca xiquincamanalhui nopa israelitame huan xiquinilhui para quej ni na, nIDIOS Cati Más Nijpiya Tanahuatili, niquijtohua: '¿Para ten anquinequij anmomahuispolose noixpa san se quej amohuejcapan tatahua quichijque? ¿Para ten anquisenhuiquilíaj anquinhueyichihuaj teteyome huan taixcopincayome quej inijuanti quichijque? ³¹ Hasta ama ni tonali anquinmictíaj amoachtohui conehua ipan tit para nopa teteyome huan taixcopincayome huan anmoijtacohuaj noixpa na. Huajca ¿anmoilhuíaj nimechpalehuis, anisraelitame, sintia quej nopa anquichihuaj? Na nIDIOS Cati Más Nijpiya Tanahuatili nimechilhuía temachti amo nimechpalehuis masque anhualase campa na.

³² " 'Amojuanti anmoilhuíaj para anquinequij anquichihuase quej quichihuaj nopa masehualme ten sequinoc talme cati quinhueyichihuaj teteyome ten cuahuit huan ten tet, pero amo quej nopa elis. ³³ Pero na nIDIOS Cati Más Nijpiya Tanahuatili nimechilhuía para temachti se tonali nitanahuatis nopona campa amojuanti ica tepesti nomaco huan ica nochicnocualancayo huan ica miyac chicahualisti. ³⁴ Quena, ica miyac fuerza huan cualanti nimechhualicas ten nochicnocualancayo masehualme huan talme campa nimechsemanqui. ³⁵ Nimechhualicas ipan nopa huactoc tali inintzala masehualme ten miyac talme huan nopona timoixtachilise huan nimechtajtolsencahuas. ³⁶ Huan nopona nimechtajtanis cuenta san se quej nijchijqui ica amohuejcapan tatahua ipan nopa huactoc

tali quema niquinquixtijtoya ten tali Egipto. ³⁷ Huan ipan nopa tonali nimechyoltachilis sesen amojuanti quej se tamocuitahuijquet quintachilía sesen ten iborregojhua para quiitas sinta iaxca quema panoj itantita itepos cuatopil para calaquij campa quintzacua. Huan niquitas ajquiya ten amojuanti motemacas huan quitoquilis nopa camanali cati nijchijqui amohuaya. ³⁸ Pero nochí nopa sequinoc cati mohuejatalijtoque ten na huan techixpanotoque, niquinquixtis ipan nopa sequinoc talme campa itztoque amantzi, pero amo huelis calaquise ipan tali Israel. Huan ipan nopa tonali anquimachilise para na niDIOS.

³⁹ “ ‘Huajca anisraelitame, quej ni na niDIOS Cati Más Nijpiya Tanahuatili nimechilhuía: Sinta ama anquinequij anquitoquilise amoteteyohua huan amotaixcopincayohua, huajca xiquintoquilica. Pero amo ximocuepaca teipa huan techmacaca tacajcahualisti huan antechmahuispolohuaj na. Pampa na nitatzejzelotic huan sinta anquinhueyichihuaj teteyome huan teipa antechmacase tacajcahualisti, niquita para soquyo nopa tacajcahualisti huan se pinahualisti para na. ⁴⁰ Quema ajsis nopa tonali nochí israelitame techhueyichihuase ipan tali Israel ipan nopa tepet cati tatzejzelotic huan más huejcapantic. Nopona niquinselis nopa masehualme huan niquintajtanis ma techhualiquilica tacajcahualisti huan nopa achtohui pixquisti cati quipixcase ipan inimila huan nochí tamanti cati monequi quiyyocatalise para na. Quej nopa na, niDIOS Cati Más Nijpiya Tanahuatili, niquijtohua. ⁴¹ Huan quema nimechquixtis, anisraelitame, ten nochí

nopa talme campa anitzose huan nimechhualicas sempa, na nimechselsis quej elisquía se tacajcahualisti ten copali cati más ajhuiyac mijyotía. Huan nimechnextilis para nelía nitatzejzeloltic huan nochí talme ehuani quiitase.

⁴² “ ‘Huan quema ya nimechhualicatos ipan nopa tali cati niquintajtolcahuili amohuejcapan tatahua para niquinmacas, huajca anquimachilise para na niDIOS. ⁴³ Huan ipan nopa tonali anquielnamiquise nochí nopa tamanti cati amo cuali cati anquichijke huan amoselti anmoijiyase por nochí nopa fiero tajtacoli cati anquichijtoque. ⁴⁴ Huan quema nimechtasojtas, anquimatise para na niDIOS. Huan nochí sequinoc techtepanitase pampa amo nimechchihuili cati quinamiqui por nochí cati fiero antechchihuilihijtoque. Quej nopa na, niDIOS Cati Más Nijpiya Tanahuatili, niquipijtohua.’ ”

Itatzacuiltyl nopa cuatitamit cati mocahua ica tatzinta

⁴⁵ Teipa TOTECO nechcamanalhui huan techihui: ⁴⁶ “Tacat, xitachiya ica tatzinta huan xitayolmelahua taya ipantis nopa cuatitamit Neguev. ⁴⁷ Xiquijto: ‘Xijtacaquili icamanal TOTECO.’ Xiquinlhui para na, niDIOS Cati Más Nijpiya Tanahuatili, niquipijtohua para ipan ni cuatitamit, na nijyolitis se hueyi tit huan quintatis nochí cuame cati xoxohuique huan nochí cati huactoque. Ni tit amo sehuis. Quintatis nochí cati itztoque ica huejcapa huan ica tatzinta. ⁴⁸ Huan nochí masehualme ipan taltipacti quimatisse para

na niDIOS cati nijyolilti nopa tit pampa nopa tit amo sehuis.”

⁴⁹ Huan na, niEzequiel, niquilhui: “Ay TOTECO Cati Más Tijpiya Tanahuatili, ni masehualme quiijtohuaj para na san nicamanalti camanali cati amo aqui hueli quimachilía.”

21

Imacheta TOTECO cati tahuel tatequi

¹ TOTECO sempa nechcamanalhui huan techilhui: ² “Tacat, xitachiya ica campa mocahua altepet Jerusalén huan xitayolmelahua taya ipantis tali Israel huan nopa tiopame cati onca noppa. ³ Xiquinlhui tali Israel ehuani para quej ni na, niDIOS, niquijtohua: ‘Na nimochijtoc ni-amocualancaitaca. Huajca nijquixtis nomacheta ipan icuetaxo huan niquinmictis momasehualhua, cati itztoque xitahuaque huan cati tajtacolchihuani. ⁴ Quena, nijquixtis nomacheta para niquinmictis cati itztoque xitahuaque huan cati tajtacolchihuani pampa monequi nijtapajpacchihuas notal ten ica tatzinta hasta ica huejcapa. ⁵ Huan nochí masehualme quimatise para na niDIOS ya nijpixtoc nomaco nomacheta huan amo nijcalquis ipan icuetaxo hasta nitamis nijtequi-huía.’

⁶ “Huajca ta, tacat, xiaxti ica miyac tequipacholi huan xichoca iniixpa nopa masehualme. ⁷ Huan sinta mitztatzintoquilise para ten tichoca, xiquinlhui tiaxti por se camanali cati tahuel temajmati cati na, nimoTECO, nimitzmacatoc. Pampa quema mochihuas cati quijtohua nopa camanali, nochí masehualme momajmatise ica

nochi iniyolo hasta cati tahuel mosemacaj. Huihuipicas inimetz huan tamis inifuerza nochí cati tahuel quipiyaj chicahualisti. Huan na niDIOS Cati Más Nijpiya Tanahuatili niquijtohua para ya monechcahuía nopa tonali para mochihuas ni tamanti huan temachti ajsis.”

⁸ TOTECO sempa nechcamanalhui huan techilhui: ⁹ “Tacat, xiquincamanalhui nopa israelitame huan xiquinilhui taya ininpantis. Xiquinilhui para na, niDIOS Cati Más Nijpiya Tanahuatili, niquijtohua: ‘Amantzi mocualancaitacahua quitentíaj se macheta huan quipojpohuaj nelía cuali, ¹⁰ para quitequihuise para quinmictise miyac israelitame. Quipojpohuaj nopa macheta hasta cahuanis quej se tapetanilot. ¿Ama huelis anhuetzcase? Anisraelitame amo anquitepanitaque icuatopil nopa tanahuatijquet cati na nijtali. Anmoilhuiyaj amo quinamiqui ma amechxitahua huan yeca ama sequinoc hualahuij para amechtzontamiltise. ¹¹ Quena, eltoc quej ya tacualchijchihuali nopa macheta para quitequihuise nopa temictijquet.

¹² “‘Huajca, tacat, xitzajtzi huan xichoca huan ximomaquili ipan moquestomahuiya pampa cati hualase ica macheta quinmictise nomasehualhua huan tayacanani ten tali Israel. Quena, miquise nochí nopa tayacanani ten israelitame san sejco ica nopa masehualme. ¹³ Nopa macheta quinyejyecos nochí nopa masehualme. Huajca na niDIOS Cati Más Nijpiya Tanahuatili nitatzintoca: ¿Quenicatza huelis anmomanahuise?’

¹⁴ “Huajca, tacat, xiquinnextili israelitame taya ininpantis. Ximomatatzini chicahuac

para tijnextis quenicatza amechmaquilise ica macheta. Teipa xijtilana nopa macheta quej elisquía titemictía. Teipa sempa xijtanana chicahuac. Huan sempa ica expa xijtanana noja más chicahuac para tiquinnextilis israelitame quenicatza inijuanti cati hualase quintzontamiltise israelitame ica miyac cualancayot. Pampa quinmictise miyac masehualme campa hueli ica macheta. ¹⁵ Huan quichihuase para nochí israelitame tahuel ma momajmatica ipan iniyolo. Huan campa hueli tachiyase, quiitase para itztoque tacame para quinquechtzonterquise ica machetas cati cahuani quej tapetanilot. Tahuel cuali quitentijtoque nopa machetas para quitequihiuse ipan nopa hueyi miquilisti. ¹⁶ Ica nopa machetas, amo aqui momanahuis. Cati quinequis cholos ica inejmat, nepa quipantis. Huan cati yas ica iarraves nojquiya quipantis nopona. ¹⁷ Huan na nojquiya nimomatatzinis ica cualanti huan niquntzontamiltis israelitame hasta tamis nohueyi cualancayo. Quej nopa niquijtohua na, niDIOS.”

¹⁸ Teipa TOTECO sempa nechcamanalhui huan techilhui: ¹⁹ “Tacat, xijchijchihua se mapa huan ipan nopa mapa xiquixcopina se ojti cati quisas ipan tali Babilonia para ipan hualas nopa tanahuatijquet ten Babilonia ica imacheta. Huan teipa nopa ojti momaxalos ica ome ojti. ²⁰ Se ojti yas para altepet Jerusalén nopa altepet cati más cuali moyahualojtoc ten tali Judá huan seyoc para tali Rabá campa itztoque nopa amonitame. Huan campa pehuas nopa ome ojti, xijtali se tajcuiloli

ipan huapali quiijtos ipan taya altepet yahui nopa ojti. ²¹ Pampa nopa tanahuatijquet ten tali Babilonia ama moquetzto campa momaxalohua nopa ojti huan amo quimati catijqui altepet quitehuis achtohui. Huan yaya quinnotza nopa tacame cati tetonalitaj huan inijuanti quimajcahuaj incuatamin para quimatise taya altepet quitehuisse. Nojquiya quinmacaj tacajcahualisti inteteyohua huan quitajtachilíaj nopa tapiyalme inieltapach para quiitase catijqui ojti quinextis. ²² Huan ipan inimanejmat quisas nopa cuataminti cati quinnextilis para monequi yase ipan altepet Jerusalén para quitehuitij huan pehuase temictise. Tzajtzise huan tahuejchihuase chicahuac quema pehuas nopa tatehuilisti. Huan ica se hueyi cuahuit quimaquilise nopa caltemit ipan itepa nopa altepet hasta quicoyonise huan huelis calaquise para tasosolose. Quimontonose miyac tali iica nopa tepamit para ipan tejcose para calaquise ipan nopa altepet. Huan quichijchihiuase torres cati huejcapantique yahualtic ten nopa altepet para ipan tajtachiyase.

²³ “Huan nopa Jerusalén ehuani amo quinelto case sintia melahuac quintehuiquij Babilonia ehuani. Inijuanti moilhuíaj para amo hueli hualase pampa ya quisencajtoque se camanali ihuaya nopa tanahuatijquet ten Babilonia. Moilhuise para mocajcayajque nopa tetonalitani cati quiilhuijque nopa tanahuatijquet para ma huala Jerusalén. Pero nopa tanahuatijquet ten tali Babilonia quinelnamiquiltis quenicatza Jerusalén ehuani quiixpanotoque nopa camanali cati quichijque

ihuaya huan yeca monequi quintehuis huan quinhuicas ipan ital.

24 “Yeca na, niDIOS Cati Más Nijpiya Tanahuatili, niquijtohua para tanemijya nesi nochí nopa tajtacoli huan fiero tamanti cati anJerusalén ehuani anquichijtoque. Yeca temachti nimechtemactilis inimaco nopa tacame cati hualase para amechitzquise huan amechhuicase.

25 “Huan ica ta, tifiero tanahuatijquet ten tali Israel, ya ajsic hora para tijselis motatzacuilti huan titemacas cuenta ten nochí tamanti cati tijchijtoc. **26** Na, niDIOS Cati Más Nijpiya Tanahuatili, nimitzilhuía xijquixti mocorona cati yejyectzi pampa ayecmo tielis titanahuatijquet. Ama nochí mopatas. Ama cati itztoyaj teicneltzitzi huan más echcapantzitzi mocahuase huejcapa ten nica, huan ta cati tiitztoya más huejcapa timocahuas tatzinta. **27** Nelía temachti na nijsosolos nochí ni tanahuatijcayot huan amo oncas seyoc tanahuatijcayot nica hasta ipan nopa tonali quema hualas nopa tacat cati nelía quinamiqui ma eli tanahuatijquet. Huan na nijtequimacas para ma tanahuati xitahuac.

Tatzacuilti para nopa amonitame

28 “Huan nojquiya, tacat, xiquinyolmelahua nopa amonitame cati quintaijilhuíaj israelitame para ma quimatica taya ininpantis. Xiquinilhui para nijquixtijtoc nomacheta ipan icuetaxo huan niquintzontamiltis. Quena, tahuel cuali tatentili nomacheta hasta petani quej tapetanilot. **29** Huan nochí nopa tetonalitani huan nopa tacajcayajca tajtolpanextiani campa amojuanti san istacatij

huan quijtohuaj para amo hualas nopa tanahuatijquet ten Babilonia ica imacheta. Amechilhuiáj anitztose cuali huan amo teno amopantis. Huajca ama nopa tatzacuiltli quinajsis nopa amo cuajcualme campa amojuanti noja más chicahuac quema ajsis tonali para antemacase cuenta.

³⁰ “Amo ximoilhuica nijcalaqueis nomacheta ipan icuetaxo quema ayemo nimechtzontamiltia pampa amo cana. Achtuhui nimechtzontamiltis ipan nopa tali campa antacatque. ³¹ Nijtitanis amopani nochi nocualancayo quej elisquía se hueyi tit cati tahuel tetatía. Huan nimechtemac-tiles inimaco masehualme cati tahuel tecoco-huaj huan cati cuali momachtijoque quenicatza tasosolose. ³² Huan amojuanti anitztose quej sacat cati tamitata ica se talojtzi. Huan nochia moeso toyahuis ipan nochi amotal huan teipa ayecmo aqui amechelnamiquis. Quej nopa na, niDIOS niquijtohua.”

22

Inintajtacolhua nopa Jerusalén ehuani

¹ TOTECO sempa nechcamanalhui huan techilhui: ² “Tacat, xiquintajtolsencahua altepet Jerusalén ehuani huan xiquinilhui taya ininpantis pampa injuanti tahuel temictíaj. Xiquintatelhui por nochi nopa fiero tamanti cati quichijtoque. ³ Xiquinilhui para quej ni na, niDIOS Cati Nijpiya Nochi Tanahuatili, niquijtohua: ‘AnJerusalén ehuani anmomictíaj huan anquinchijchihuaj teteyome huan taixcopincayome para ica anmomahuispolose noixpa. Ya monechcahuijtoc

nopa tonali para anquiselise amotaxtahuil huan amo huelis ancholose. ⁴ Anquihuicaj miyac tajtacoli pampa tahuel antemictijtoque huan anmomahuispolojoque noixpa ica nopa teteyome cati anquinchijchijtoque. Yeca ama ya ajsic hora para anquiselise tatzacuiltyli huan para antamise. Nijchihuas para nochí tali huan altepeme ma amechpinajtica huan ma amechtaijilhuica amojuanti huan amoaltepe. ⁵ Nochi masehualme cati itztoque huejca o nechca amechixmatise por nochí nopa tamanti cati amo cuali cati anquichihuayayaj huan amechpinajtise ica nochí tamanti cati amo cuali cati anquichijtoque.

⁶ “ ‘Nochi nopa tayacanani ten tali Israel cati itztoque ipan Jerusalén tahuel quinpectía temictise ica nochí ininchicahualis. ⁷ Nopona masehualme amo quintepanitaj inintatahua, yon innanahua. Ten fiero quinchihuiláj sequinoc talme ehuani huan amo quincahuiláj coneme cati icnotzitzi huan cahual sihuame ma quipiyaca cati ica panose. ⁸ Amo quitepanitaj notiopa huan nopa tamantzitzi cati taiyocatalilme para na, yon amo quitepanitaj nopa tonali para mosiyajquetzase. ⁹ Miyac tacame quintelhuíaj sequinoc ica istacatili huan quintitanij para ma quinmictica masque amo teno quichijtoque. Yahuij ipan nopa ilhuime cati quichihuaj ipan tepeme para quinhueyichihuase teteyome huan taixcopincayome huan nopona ica inintacayo quichihuaj miyac tamanti cati amo cuali. ¹⁰ Miyac tacame ten altepet Jerusalén quinsihuacuilaíaj inintatahua huan miyac quinechcahuíaj inisihua quema esotemo.

11 Itztoque miyac cati momecatijquej ica inisihuajhua inihuampoyohua. Sequij cochij inihuaya iniyex huan hasta sequij ten hueli quichihuaj ihuaya iniicni. **12** Sequij quiselíaj tomi para quimictise se acajya. Sequij tainamaj itanca o seyoc tamanti para tetanejtíaj tomi. Quincaj-cayahuaj inincalnechcahua para quitanise miyac tomi. Jerusalén ehuani amo techelnamiquij na, yon amo quinelnamiquij notanahuatilhua. Quej nopa na, niDIOS Cati Más Nijpiya Tanahuatili, niquijtohua.

13 “Pero na nelía nicualani pampa anJerusalén ehuani tahuel antetaijyohuiltíaj para anquitanise más tomi. Huan anquitoyajtoque miyac esti ipan calles. **14** Huan quema na nipehuas nimechtatza-cultis, amo huelis anmotalise nohuaya. Na, niDIOS, niquijtohua cati nijchiwas huan temachti nijchiwas nochí cati nimechilhuía. **15** Huajca nimechtitanis anJerusalén ehuani ipan campa hueli talme, huan quej nopa nimechquixtilis nochí tamanti cati amo cuali. **16** Huan quema amo aqui ipan nochí tali ipan taltipacti ayecmo aqui amechtepanitas huan tahuel anmopinahaultise, huajca anquimachilise para na niDIOS.””

17 Teipa TOTECO sempa nechcamanalhui huan techilhui: **18** “Tacat, nopa israelitame amo teno ininpati noixpa. Itztoque quej itetejtzo cati quisa ipan se teposti quej bronce, estaño, hierro huan plomo huan mocahua tatzinta quema quimoloníaj nopa teposti ipan se horno. **19** Yeca na, niDIOS Cati Más Nijpiya Tanahuatili, niquijtohua: Xiquinilhui Jerusalén ehuani para mochi-

jtoque quej tasoli cati monequi quiquixtise ten teposti, huan huajca niquinhualicas nomasehualhua tatajco altepet Jerusalén para niquinmolanis. ²⁰ Quej quiatilíaj huan quimoloníaj teposti ipan se horno cati tahuel totonic para quisas itasolo, quej nopa ni quintatzacuiltis nomasehualhua ica nochicuocay huan quisas cati amo cuali ipan injuanti. ²¹ Xiquinilhui israelitame: Nimechsejcotilis tatajco ten nopa altepet huan quej se acajya quiilpitzas se tit, na nimechtaijyohuiltis ica miyac cualanti huan nopa hueyi tit amechajsis huan nimechtaijyohuiltis. ²² Huan quema antaijyohuise, quisas cati amo cuali ten amojuanti quej quisa itasolo plata quema atiya ipan se horno. Huan quema ya nimechtatza-cuiltytoc pampa miyac nicualani ica amojuanti anquimachilise para na niDIOS.”

²³ Huan TOTECO sempa nechcamanalhui huan techilhui: ²⁴ “Tacat, xiquinilhui israelitame ten taya niquijtohua ten quenicatza eltos nopa tali ipan tali Israel. Xiquijto: ‘Ipan nopa tonali quema nimechtatzacuiltis ica nohueyi cualancayo, nopa tali elis quej se tali campa amo aqui tamejtoc huan san onca cuatitamit. O elis quej se huactoc tali campa amo quema huetzi at. ²⁵ Nopa amotajtolpanextijcahua quisencahuaj san sejco ajquiya quicajcayahuase para quiichtequilise itomi. Itztoque quej se león cati quitemojtinemij se tapiyali para quitzontamiltis. Nopa tajtolpanextiani quincuilaíaj cati ipati cati eliyaya iniaxca miyac masehualme. Quinmictíaj cati amo teno quichijtoque huan quinchihuaj ma elica cahualme miyac sihuame. ²⁶ Nochi

amototajtzitzquiixpanotoque notanahuatilhua huan quimahuispolojoque nochitamantzitzcati tatzejzeloltique pampa eltoyaj taiyocatalili para na. Inijuanti amo quimatiq catijqui tamanti tatzejzeloltic huan catijke tamanti amo tatzejzeloltic. Amo quinnextilíaj nomasehualhua catijke tamanti tapajpactic noixpa para huelis motequihuis para techhueyimatise huan catijke tamanti amo tapajpactic. Amo quitepanitaj nopa tonali cati na nimechmacatoc para ipan ximosiyajquetzaca huan yon quentzi amo techtepanitaj na cati nitatzejzeloltic. ²⁷ Amotayacancahua, anisraelitame, itztoque quej lobos cati quiitzquíaj se tapiyali huan quicocotetzaj. Quitoyahuaj miyac esti huan temictíaj para quitanise tomi cati amo xitahuac. ²⁸ Amotajtolpanextijcahua itztoque quej cati quitalíaj nexti ipan se tepamit cati amo quipiya cuali mezcla huan ya quinequi huetzis. Quej nopa quitatíaj cati melahuac. Inijuanti quijtohuaj quiitztoque tanextili huan quiselijtoque camanali ten na, pero amo cana. San istacatij pampa na, niDIOS Cati Más Nijpiya Tanahuatili, amo teno niquinnextilijtoc, yon amo teno niquinlhuijtoc. ²⁹ Huan nojquiya ipan amotal cati hueli masehuali tahuel tatehuía huan tachtequi. Quintaijyohuilitíaj teicneltzitzhi huan cati amo teno quipiyaj; huan ten hueli quinchihuilíaj nopa seyoc tali ehuani cati itztoque tatajco ten amojuanti.

³⁰ “ ‘Na nijtemo campa inijuanti se acajya cati motananasquía huan motancuaquetzasquía noixpa ipan ojti huan techtajtanisquía ma amo niquintamilti ni masehualme, pero amo nijpanti yon se. ³¹ Yeca na niquintatzacuultis nopa mase-

hualme ica nohueyi cualancayo huan elis quej quinajsis se hueyi tit huan quintamitatis. Huan quej nopa niqintaxtahuis quej quinamiqui por senquisa nochí inintajtacolhua. Quej nopa na, niDIOS Cati Más Nijpiya Tanahuatili, niquipijtohua.’”

23

Altepeme Samaria huan Jerusalén san se tajta-colchihuaj

¹ TOTECO nechcamanalhui huan techilhui:
² “Tacat, nimitzpoahuilis ten altepeme Samaria huan Jerusalén ehuani. Inijuanti itztoque quej ome sihuame cati eliyayaj icnime pampa quipixque san se ininana. ³ Huan quema noja eliyayaj ichpocame, eltoc quej pejque mochihuaj ahuilnenca sihuame ipan tali Egipto pampa pejque nechcahuaj nopona para quintoquilise teteyome. Eltoc quej motemactilijque ica tacame para ten hueli ma quinchihuilica. ⁴ Nopa ichpocat cati achtohui tacatqui itoca eliyaya Ahola huan yaya quiixnextía Samaria. Huan nopa iicni itoca eliyaya Aholiba cati quiixnextía altepet Jerusalén. Huan eltoc quej na niDIOS nimocuili ni ome para noaxca quej se tacat mocuilia isihua huan quinequi san ya ma quiicneli. Huan quena, inijuanti elque noaxcahua. Huan teipa elqui quej quintacatiltijque oquichpilme huan sihuapilme cati elque noaxcahua.

⁵ “Pero teipa Ahola o Samaria pejqui motemachía ipan sequinoc teteyome huan ayecmo technejqui na. Quej se sihuat cati quicahua ihuehue, Samaria quinmactili itacayo

huan iyolo nopa Asiria ehuani cati itztoyaj
 inechca masque melahuac noja eliyaya noaxca
 na. ⁶ Asiria ehuani moquentiyayaj yoyomit
 cati moradojtic quej tominpiyani. Hualajque
 tayacanani ten soldados, huan tanahuatiani
 huan telpocame cati tahuel yejyectzitz. Huan
 nochí tejcoyayaj ipan cahuayojme. ⁷ Huan
 Samaria ehuani quinequiyayaj ma quinnahuatica
 nopa Asiria ehuani huan amo na. Quej
 sihuame tajtacolchihuaj ica sequinoc tacame
 huan quipantíaj miyac tequipacholi, Samaria
 ehuani quinnequiyayaj nopa asirios cati más
 tapejpenilme ma quinnahuatica. Huan quej se
 ahuilnencia sihuat ten hueli quichihua inihuaya
 cati quinicnelía, Samaria tahuel momahuispolo
 noixpa. ⁸ Nopa Samaria ehuani amo quicajtejque
 iniahuinencayo cati pejqui ipan tali Egipto.
 Quisenhuiquilijque ten hueli quichihua iniixpa
 teteyome quej quichijque ipan tali Egipto
 quema nopa egiptome quinnextilijque ma
 tajtacolchihuaca. Huan nopa egip tome ten
 hueli quichijque inihuaya nopa israelitame
 quema nopa israelita masehualme noja eliyaya
 masehualme cati yancuique quej se ichpocat.
 Quena, inijuanti quinchihualtijque israelitame
 ma elica quej se ahuilnencia sihuat pampa
 nechcajtejque para quintequipanose teteyome.

⁹ “Huajca yeca na niquintemactili nopa
 Samaria ehuani inimaco nopa Asiria ehuani
 cati tahuel quinixtocayayaj huan cati ininpan
 motemachiyayaj huan amo ipan na. ¹⁰ Huan
 nopa Asiria ehuani quinxolohuijque israelitame,
 huan quincuilijque nochí inincone hua huan

quinmictijque ica macheta. Huan sequinoc campa hueli ipan taltipacti quicajque ten panoc ica israelitame huan quimachilijque para elqui quej se tajtacolchijca sihuat cati quiseli nopa tatzacuiltili cati quinamiqui ica cati amo cuali quichijtoya.

¹¹ “Pero quema Aholiba, cati quiixnextía Jerusalén, quiitac cati fiero ipantic iicni Samaria, yaya amo quichihuili cuenta. Nojquiya Jerusalén ehuani pejque nechcahuaj niininTECO huan quichihuaj cati quinejque. Pejque ahuilnemij ica sequinoc noja más huan amo quej quichijtoya iicni Samaria. ¹² Huan Jerusalén ehuani ayecmo technequiyayaj na. Quintocayayaj nopa asirios cati itztoyaj ininechca pampa nopa asirios eliyayaj telpocame cati yejyectzitzí huan quinixtocayayaj nopa tanahuatiani huan tayacanani ten soldados. Nochi inijuanti moquentiyayaj yoyomit cati moradojtic quej tominpiyani huan quipiyayayaj cuajcuali teposti para ica tatehuise huan nochi inijuanti tejcotoyaj ipan cahuayojme cati yejyectzitzí.

¹³ Huan niquitac quenicatza Jerusalén ehuani nechcajtehuayayaj para momahuispolose ica teteyome quej quichijtoyaj Samaria ehuani.

¹⁴ “Pero Jerusalén ehuani melahuac mochijque cati noja más fiero que Samaria ehuani pampa pejque quinixtocaj nopa taixcopincayome cati tatzquitoyaj ipan tapepecholi ten tali Babilonia tacame cati moquentiyayaj iniyoyo cati chichiltic. Huan Jerusalén ehuani quinequiyayaj nechcahuase na huan quinequiyayaj ma hualaca quinnahuatiquij nopa

Babilonia tanahuatiani huan tayacanani cati quinitztoyaj ipan tapepecholi. ¹⁵ Quipiyayayaj inintzinquechilpica cati tahuel yejyectzi huan quihuijcontoyaj inintzonteco ica se yoyomit cati yejyectzi quipajtoyaj huan ten inintzonteco temoyaya icuitapil nopa yoyomit. ¹⁶ Huan quema nopa Jerusalén ehuani quinitaque nopa taixcopincayome, nelía quinixtocaque. Itztoyaj quej se ahuilnenca sihuat cati tahuel quinequi motemactilis ica imecahua pampa tahuel quinequiyayaj para nopa tacame cati npona quinixcopintoyaj ma quinahuatiquij. Huajca quintitanqui itayolmelajcahua ipan tali Babilonia para quinilhuitij ma hualaca Jerusalén. ¹⁷ Huan nopa Babilonia ehuani hualajque quej imeca se ahuilnenca sihuat huan ten hueli quinchihuilijque Jerusalén ehuani huan tahuel quinmahuispolojque noixpa. Huan por cati quinchihuilijque, Jerusalén ehuani pejque quincualancaitaj Babilonia ehuani huan quitamiltijque nopa camanali cati quichijtoyaj inihuaya.

¹⁸ “Huajca na nimoicancuetqui ica Jerusalén ehuani quej nimoicancuectoya ica iicni, Samaria, pampa Jerusalén ehuani tahuel quinnotzayayaj sequinoc miyacapa para ma hualaca huan ten hueli ma quinchihuilica. ¹⁹ Pero quema niquincajtejqui, Jerusalén ehuani yon amo quichihuilijque cuenta. Itztoyaj quej se ahuilnenca sihuat cati noja más quinequiyaya ahuilnemis. Israelitame quielnamijque quenicatza quinhueyichijtoyaj sequinoc teteyome ipan tali Egipto quema ayemo miyac israelitame itztoyaj. Mochijqui quej

se ahuilnenca sihuat cati quielnamijqui ajquiya achtohui quinextili ma quicahua ihuehue huan ma tacanemi. ²⁰ Huan yaya tahuel quinnequiyaya iEgipto mecahua cati itztoyaj quej oquich burrojme huan cahuayojme. Quej nopa, nopa israelitame quinequiyayaj Egipto ehuani ma hualaca para quinpalehuise huan amo na. ²¹ Huajca, anisraelitame, sempa anquintemojque nopa Egipto ehuani quej anquichihuayayaj quema anitztoyaj ipan tali Egipto huan sanoc anpejtoyaj anitztose se hueyi grupo ten masehualme huan anquincahuiliyayaj nopa egiptome para ten hueli ma amechchihuilica.

²² “Huajca yeca, tiAholibá cati tijnextía Jerusalén, quej ni na, niDIOS Cati Más Nijpiya Tanahuatili, nimitzilhuía: Nijchihuas para nopa talme cati ama ayecmo tiquinnequi, ma mochihuaca mocualancaitacahua pampa achtohuiya más tiquinnequiyaya ininteteyohua huan más tiquinnequiyaya ma mitznahuatiquij. ²³ Niquinchihuas ma hualaca nopa tali Babilonia ehuani huan nopa caldeos cati ehuani ipan altepet Pecod, Soa huan Coa. Huan hualase inihuaya nochí nopa asirios. Hualase yejyectzitzeli telpoca tacame, tayacanani ten soldados, tatehuiani huan tacame cati yolchicahuaque. Sequij cati hualase elij tanahuatiani, huan nochí tejcotose ipan cahuayojme. ²⁴ Quena, hualase amechtehuiquip, anJerusalén ehuani, ica tatehuijca carrojme huan cuacarros ica tahuel miyac soldados cati mocualtalijtose ica inintontzajca huan ica teposme cati ica quitzacuase inintacayo para amo teno hueli

quincocos. Huan na niquinmacas tanahuatili para ma amechtatzacuiltica. Huan inijuanti amechtatzacuiltise chicahuac quej quijtohua inintanahuatilhua. ²⁵ Na nimechhuitequis ica nochí nocualancayo huan niquincahuilis inijuanti ma amechchihuila cati amo cuali. Amechtzontequilise amoyacatzol huan amonacas. Huan cati hueli ten amojuanti cati noja anmocahuase anyoltoque anmiquise ipan tatehuilisti. Huan nochí amotelpocahua huan amoichpocahua quinhuicase ipan seyoc tali para tetequipanotij san tapic. Huan nochí cati noja mocahuase yoltoque, quintamitatise. ²⁶ Inijuanti amechichtequilise amoyoyo huan nochí amopijpilol huan amomaquechcoshua cati ica anmoyectaliyayaj. ²⁷ Huan quema niquincahuilis ma amechtatzacuiltica quej ni, nijtamiltis amosisinijcayo huan amoahuilnencayo cati anquichijtihualajtoque hasta quema anitztoyaj ipan tali Egipto. Huan ayecmo quema anquinelnamiquise nopa Egipto ehuani, yon intiteteyohua.

²⁸ “Ya ni cati na niDios Cati Más Nijpiya Tanahuatili niquinilhuía Jerusalén ehuani: Nimechtemactilis inimaco nopa talme cati anquincualancaitaj huan cati amo anquinequij anquinitase. ²⁹ Inijuanti amechcualancaitaj huan amechichtequilise nochí cati anquitantoque huan amechquixtiliquij amoyoyo para anmocahuase anxolome. Huan tanemijya nesis amoahuilnencayo huan amotajtacolhua para nochí quiitase. ³⁰ Nochi ni tatzacultili ajsis amopani pampa antechcajtejque na huan anmo-

mecatijque huan anquichijtoque cati sequinoc talme ehuani quichihuaj. Anquinequiyayaj sequinoc talme ma amechpalehuica quej nopataca na huan anmomahuispoloijque noixpa quema anquinhueyichijque ininteteyohua.

31 Anquitoquilijque iniojhui nopa Samaria ehuani huan anquinhueyichijque teteyome, huan yeca nimechtatzacuiltis san se quej niquintatzaculti inijuanti.

32 “Na niDIOS Cati Más Nijpiya Tanahuatili huan niquijtohua para nochí nopa huejhueyi tatzacuiltili cati quiselijque Samaria ehuani, nojquiya ya nopa amechajsísis anJerusalén ehuani. Huan nochí tali ehuani ipan taltipacti amechpinajtise huan amechtaijilhuise quema amechajsísis nopa fiero taijyohuilsti.

33 Annejnemise quej se ihuintiquet huan tahuel ancuajcualose por nopa huejhueyi tasosololisti cati ajsis amopani huan nopa pinahualisti cati nimechtitanilis. Nimechtatzacuiltis san se quej niquintatzaculti Samaria ehuani.

34 Anquiselise nochí amotatzacuitil hasta amo teno mocahuas cati fiero para ica nimechtatzacuiltis huan anmoyolixtejtzonase pampa tahuel antaijyohuijtose pampa quej nopa na, niDIOS Cati Más Nijpiya Tanahuatili, niquijtojtoc para panos.

35 “Yeca na, niDIOS Cati Más Nijpiya Tanahuatili, niquijtohua para nochí ya ni amechajsísis pampa antechelcajtoque huan anmoicancuectoque ica na. Huajca ama monequi anquijyohuise nopa tatzacuiltili pampa anquinhueyichijque teteyome huan antechcajtejque quej se ahuilnenca sihuat

quicahua ihuehue.”

³⁶ Huan TOTECO techilhui: “Tacat, monequi xiquintajtolsencahua nochí ipan Jerusalén huan Samaria por nochí nopa fiero tamanti cati quichijtoque. ³⁷ Injuanti tahuel momecatijtoque huan temictijtoque. Momecatijque pampa quinhueyichijque teteyome huan taixcopincayome huan temictijque pampa quinmictíaj ininconehua cati quintacatiltijque para na huan quintalijque ipan taixpamit huan quintatijque quej se tacajcahualisti para nopa teteyome. ³⁸ Huan quema ya tantoyaj quichihuaj ni tamanti cati fiero, quimahuispolojque notiopa huan amo quitepanitaque nopa tonali cati na niquinmacatoya para ipan ma mosiyajquetzaca. ³⁹ Quena, ipan nopa tonali quema quinmictijque ininconehua iniixpa ininteteyohua, calajque ipan notiopa huan quimahuispolojque notiopa huan quichijque amo tapajpactic por inintajtacolhua.

⁴⁰ “Pero amo san ya nopa anisraelitame ten Samaria huan Jerusalén anquichijque. Nojquiya anquintitanque tayolmelahuani ipan campa hueli tali para ma quinnotzatij tacame para anquisencahuase se camanali inihuaya para amechpalehuise injuanti huan amo na. Huan quej ahuilnenca sihuame anmaltijque, anquipajque amoixteyolhua huan anmoyecchijtoque ica tamantzitzí para ma amechixtocaca. ⁴¹ Teipa anmosehuijque san sejco ipan se tapechti cati yejyectzi, huan iniixpa anquitalijque se yejyectzi mesa huan ipani anquitalijque copali huan aceite cati

eliyaya tatzejtzeloltic huan noaxca na. ⁴² Huan ten nopona campa anitztoyaj inihuaya cati amechpaxalohuayabaj, caquistiyaya quej tahuejchihuayabaj miyac tacame cati taiyabaj, paquiyabaj huan ten hueli quichihuayabaj. Eliyabaj tacame cati ehuayabaj campa huactoc tali huan quichihuayabaj quej tahuel amechnequiyabaj huan amechtaliliyabaj macosti ipan amomax huan se yejyectzi corona ipan amotzonteco. ⁴³ Huajca na niquijto: ‘Sinta ni tacame nelia quinequij quintequihuse nopa sihuame cati tahuel motequihuijtoque ipan ahuilnencayot, huajca ma quichihuaca.’ ⁴⁴ Huan quej nopa quichijque. Nopa tacame ten sequinoc talme calajque quej telpocame inihuaya nopa ahuilnenca sihuame cati quinixnextiaj nopa israelitame ten Jerusalén huan Samaria huan noja más tajtacolchijque inihuaya. ⁴⁵ Pero ajsis tonali quema tacame cati xitahuaque quintajtolsencahuase israelitame ten Samaria huan Jerusalén. Huan quintajtolsencahuase quej nopa tanahuatilme quijjtohuaj para ma quintatzacuiltica ahuilnenca sihuame huan temictiani. Huan nelia Samaria huan Jerusalén ehuani nechcajejtoque quej quichihua se ahuilnenca sihuat quicahua ihuehue. Nelia itztoque quej temictiani.”

⁴⁶ “Huajca na, niDIOS Cati Más Nijpiya Tanahutili, niquijtohua: Xiquinnnotzaca miyac soldados para ma hualaca huan xiquintemactilica nopa israelitame ten Samaria huan Jerusalén inimaco. Ma quinmajmatica miyac huan ma quintaijyohuiltica nelia chicahuac huan ma quin-

quixtilica nochí catí quipiyaj. ⁴⁷ Ma quinmic-tica nopa israelitame ica tet huan ica macheta. Huan nochí inintelpocahua huan iniichpocahua ma quinhuejhueloca. Huan ma quitatica ininchaj. ⁴⁸ Huan quej nopa ipan nopa tali niquintamiltis nochí catí quintemohuaj teteyome. Huan tamise nochí catí quintemohuaj sequinoc talme para ma quinpalehuica huan amo na pampa itz-toque quej se ahuilnenca sihuat noixpa. Huan sequinoc quiitase catí panoc ica masehualme ipan Samaria huan Jerusalén huan momajmatise huan amo quichihuase quej inijuanti quichijque. ⁴⁹ Niquintatzacuiltis masehualme ipan ni ome altepeme iniixpa nochí masehualme pampa quinhueyichijke teteyome huan taixcopincayome. Huan quiselise se taxtahuili quej quinamiqui ica nochí catí quichijtoque. Huan huajca amojuanti anquimachilise para na niDIOS Cati Más Nijpiya Tanahuatili.”

24

Nopa huicalot ten nopa chachapali catí tamolonaltía

¹ Se tonali ipan 10 itequi nopa majtacti metzti ipan toisraelita calendario * quema Tanahuatijquet Joaquín yahuiyaya para chicnahui xihuit para quiquixtijtoyaj, TOTECO nechcamanalhui huan techilhui: ² “Tacat, xiquijcuilo nopa tonali ten ama ni tonali pampa ipan ni tonali nopa tanahuatijquet ten tali Babilonia ya pehua quite-huía altepet Jerusalén. ³ Huan xiquinpoohuli nopa

* **24:1** 24:1 Ipan 15 itequi enero 588 a.C. ipan tocalendario ten ama.

mosisinijsca israelitame ni huicalot. Xiquinilhui para quej ni na, niDIOS Cati Más Nijpiya Tanahuatili, niquijtohua: ‘Xijmanaca se chachapali ipan tit huan xijtequilica at. ⁴ Xijtemiticca ica inacayo se oquich borrego. Xijtalica inacayo cati más cuajcuali quej iquestomahuiya huan ielchiqui. Huan nojquiya xijtalica omit cati más ajhuiyac. ⁵ San xijtequihuica nopa borrego cati más tapejpenili. Huan xijtalica miyac cuahuit ipan nopa tit itantita nopa chachapali para cuali molonis. Xijchihuaca para nopa nacat ma icsi cuali hasta quisas noch iomiyo.

⁶ “ ‘Ma quichihuaca ya nopa pampa na, niDIOS Cati Más Nijpiya Tanahuatili, niquijtohua: Teicneltique nopa altepet Jerusalén ehuani pampa tahuel tajyohuise. Tahuel temictíaj pampa eltoque quej se chachapali cati pojyajtoc huan amo hueli tepehui isoquiyo. Huajca, tacat, xijquixti sesentzitzi nopa tatecti ten nacat. Quej nopa xijchihuac hasta tijquixtis noch huan amo xijcahua yon quentzi nacat ipan nopa chachapali ⁷ Pampa noch quimatij cati amo cuali quichihuaj Jerusalén ehuani. Tahuel temictijtoque huan quitoyajtoque esti ipan tet para ma mocahua tanemijya para noch quiitase. Yon amo quitoyajtoque nopa esti talchi para nopa tali ma quiixtzacua inintajtacolhua. ⁸ Huajca na nojquiya njitalis inieso Jerusalén ehuani ipan nopa teme campa temictiyayaj. Huan amo niquixtzacuas para noja más ma techchihua ma nicualani huan ma niquincuepili cati quichijtoque.

⁹ “ ‘Na, niDIOS Cati Más Nijpiya Tanahuatili, niquijtohua para nelía teicnelti nopa altepet ten

temictiani. Na noseltitzi nijtamitatis. ¹⁰ Huajca, tacat, xijtali miyac cuahuit huan chicahuac xijlemenalti nopa tit para quimolonaltis nopa chachapali. Xiquicxiti nopa nacat ica miyac tacualpajyot huan xijcahua ma moloni hasta quitamitatis nopa omit cati nopona mocahua. ¹¹ Teipa xijtali nopa chachapali cactoc ipan tit hasta ma xahuani nopa teposti huan ma tamitata isoquiy o huan ma ixpolihui noch i cati amo cuali cati quipixtoc nopa chachapali. ¹² Pero san tapic pampa nopa chachapali tahuel soquiy o huan isoquiy amo tami masque quitalfaj ipan se hueyi tit. Huan quijto:

¹³ “ ‘Ay anJerusalén ehuani, tahuel ansoquijoy que por noch i nopa teteyome cati anquinhueyichijtoque. Na miyac huelta nijnequiyaya nimechtapajpacchihuas ten noch i amotajtacolhua cati anquichijtoyaj, pero amo anquinejque anmopajpacase ten amosoquiy o. Huajca ximocahuaca ansoquijoy que hasta nijtitanis amopani noch i nocualancayo. ¹⁴ Na niDIOS niquijtojtoc para nimechtatzacuiltis huan quej nopa elis. Na noseltitzi nijchihuas. Amo nimechtasojtas, yon amo nimoyolcuepas. Nimechtatzacuiltis quej quinamiqui ica noch i cati fiero anquichijtoque. Quej nopa na, niDIOS Cati Más Nijpiya Tanahutili, niquijtohua.’ ”

Mijqui isihua Ezequiel

¹⁵ TOTECO sempa nechcamanalhui huan techilhui: ¹⁶ “Tacat, ipan san se talojtzi na nimitzquixtilis mosihua cati más tiquicnelía. Pero ta amo ximocueso por ya, yon amo xijchoquili, yon amo

xijcahua ma quisa moixayo. ¹⁷ Hueli tiaxtis por ya, pero ixtacatzi. Amo xijnexti mocuesol por ya quej nochí quichihuaj quema miqui se acajya. Amo ximoquixtili motzontzajca, yon amo xinemí san moicxipa, yon amo xijtzacua moxayac para tijnexxis timocuesohua. Amo xijcua nopa tacualisti cati mitzhualiquilise mohuampoyohua para mitzyoltalise.”

¹⁸ Huajca ica ijnaloc na niquinilhui nopa masehualme cati TOTECO techilhuijtoya huan ica tiotac mijqui nosihua. Huan tonili ica ijnaloc ni-jchijqui senquisa quej TOTECO technahuatijtoya. ¹⁹ Huajca nochí nopa masehualme techilhuijque: “Techilhui taya quinequi quiijtos nopa tamanti cati tijchihua.”

²⁰ Huan na niquinilhui: “TOTECO nechcamanalhui huan techmacac se camanali para ma niquinilhui israelitame. ²¹ TOTECO techilhui para ma niquinilhui ya ni: ‘Quej ni na, niDIOS Cati Más Nijpiya Tanahuatili, niquijtohua. Na nijmahuis-polos notiopa cati amojuanti tahuel anquixtocaj, huan cati ica anmohueyimatiyaya pampa anmoilhuiyaya amechpalehuis anquipiyase chicahualisti. Huan nochí amocone hua, ichpocame huan telpocame cati anquincajejque ipan altepet Jerusalén, miquise ica macheta. ²² Huan anquichihuase san se quej Ezequiel quichijtoc. Amo xichocaca, yon amo xijtzacuaca amoxayac para anquinextise anmotequipachohuaj, yon amo xijcuaca nopa tacualisti cati amechhualiquilise sequinoc para amechyoltalise. ²³ Amo xijquixtica amotzontzajca, yon amo xinemica amoicxipa. Amo ximocuesoca, yon amo xichocaca.

Pero, quena, amotacayohua nempolijtiyas huan anaxtise por amotajtacolhua huan anaxtise se ica seyoc por noch tamanti cati amo cuali cati anquichijtoque. ²⁴ Ezequiel eltoc se tanextili para amojuanti pampa anquichihuase senquisa quej yaya quichijqui. Huan quema panos ya nopa, huajca anquimachilise para na, niDIOS Cati Más Nijpiya Tanahuatili.

²⁵ “Huan, tacat, niquinilhuía israelitame para quema niquinquixtilijtosa notiopa cati elqui inchicahualis, ininpaquilis, inihueyitilis huan cati tahuel quiixtocayabaj quitachilise, ipan nopa tonali nojquiya niquintzontamiltis inisihuajhua, iniichpocahua huan inintelpocahua. ²⁶ Huan ipan nopa tonali cholojtehus se tacat ipan altepet Jerusalén huan hualas nica ipan tali Babilonia para mitzpohuiliqui noch cati panotoc. ²⁷ Huan ipan nopa talojtzi tapohuis motoscac huan huelis ticamanaltis inihuaya. Huan ta tielis se tanextili para nopa masehualme, huan huajca quimachilise para na niDIOS.”

25

*TOTECO quiijto quintatzacuiltis tali Amón
ehuani*

¹ TOTECO nechcamanalhui huan techilhui:
² “Tacat, xitachiya ica campa nopa tali Amón ehuani huan xiquinyolmelahua taya ininpantis.
³ Xiquinilhui ma quitacaquilica ni camanali cati na, niDIOS Cati Más Nijpiya Tanahuatili, niquinilhuía: ‘Amojuanti anpajque quema seyoc tali ehuani quimahuispolojque notiopa. Huan anpajque quema quisosolojque nopa

tali Israel. Huan anpajque quinquixtijque tali Judá ehuani huan quinhuicaque seyoc tali. ⁴ Huajca ama na nimechtemactilis inimaco nopa nejnenca masehualme cati ehuani ica campa hualquisa tonati ipan huactoc tali. Inijuanti moaxcatise amotal huan nopona quiquetzase iniyoyoncalhua. Quipixcase cati anquitoctoque huan quicuase. Huan amechichtequilise amotapiyalhua huan quiise inilechi. ⁵ Huan amoaltepe Rabá nijchihuas ma eli quej se potrero campa tacuase camellos. Huan nochí amotal, anamonitame, na nijchihuas ma eli quej se tali campa tacuajtinemise borregojme. Huan huajca anquimachilise para na niDIOS.

⁶ “Na, niDIOS Cati Más Nijpiya Tanahuatili, niquijtohua ya ni: Antali Amón ehuani, anquinhuetzquilijque noisraelita masehualhua quema hualajque tacame cati quisosolojque inintal. Quena, anmomatatzinijque huan anhuitonque ica miyac paquiliti. ⁷ Huajca ama na nimechtzatzacuiltis chicahuac huan nimechtemactilis inimaco sequinoc tali ehuani para ma amechichtequilica nochí cati anquipiyaj. Na senquisa nimechtzontamiltis huan nimechixpolihuiltis anamonitame para ayecmo aqui amechpantis ipan nochí tali. Huan huajca anquimachilise para nelía na niDIOS.”

*TOTECO quiijto quintatzacuiltis tali Moab
ehuani*

⁸ “Na, niDIOS Cati Más Nijpiya Tanahuatili, niquijtohua ya ni: Tali Moab huan tali Edom ehuani quiijtojque para israelitame ipan tali

Judá san se itztoque quej masehualme ipan sequinoc talme huan amo niqintapejpenijtoc para noaxcahua. ⁹ Huajca pampa quijjtohuaj ya nopa, na nijpehualtis ipan inepa tali Moab ica campa hualquisa tonati huan niqintamiixpolos nopa yejyectzitzi altepeme cati mopantíaj npona. Niquinixpolos nopa altepeme Bet Jesimot, Baal Meón huan Quiriataim cati ica mohueyimatij nopa Moab ehuani. ¹⁰ Huan nijchihuas para nopa nejnenca masehualme cati itztoque ica campa hualquisa tonati ma moaxcatiquij tali Moab san se quej quichijque ica tali Amón. Huan quej nopa nochí masehualme quielcahuase tali Moab para nochipa. ¹¹ Quej nopa nijhualicas tatzacuilstili ipan tali Moab huan quimachilise para na niDIOS.

*TOTECO quijjto quintatzacuilstis tali Edom
ehuani*

¹² “Na, niDIOS Cati Más Nijpiya Tanahuatili, niquijtohua para tali Edom ehuani tahuel tajtacolchijtoque noixpa pampa chicahuac momacuetque ica nomasehualhua ipan tali Judá. ¹³ Huajca na, niDIOS Cati Más Nijpiya Tanahuatili, niquijtohua: Nijtananas nomax para nijtatzacuilstis tali Edom huan niquinixpolos imasehualhua huan ihuacaxhua huan iborregojhua ica macheta. Nochi inintal ten Temán hasta altepet Dedán mocahuas tasosololi huan nochí masehualme npona miquise. ¹⁴ Quena, niquintequivuis noisraelita masehualhua para niqintatzacuilstis tali Edom ehuani huan quintatzacuilstise quej quinamiqui pampa tahuel nicualani inihuaya.

Quej nopa Edom ehuani quimatise quenicatza nimomacuepa ica ten hueli masehualme cati quinamiqui. Quej nopa na, niDIOS, niquipijtohua.

TOTECO quintatzacuiltis nopa filisteos

¹⁵ “Na, niDIOS Cati Más Nijpiya Tanahuatili, niquipijtohua: Nopa filisteos nelchicahuac quintehuijtoque nomasehualhua ipan tali Judá pampa quincualancaitayayaj por se cualanti ten huejcajquiya. Yeca momacuetque ica inijuanti ica miyac cualancayot. ¹⁶ Huajca na, niDIOS, niquipijtohua: Nijtananas nomax ica nopa tali Filistia huan niquntatzacuiltis nopa filisteos o cereteos nelía chicahuac. Huan niquinixpolihuiltis inihuaya nochi masehualme cati itztoque nechca hueyi at. ¹⁷ Nimomacuepas ica inijuanti ica nochi nocualancayo huan niquntatzacuiltis tahuel chicahuac. Huan quema ya nimomacuectoc ica inijuanti, nopa filisteos quimachilise para na, niDIOS.”

26

TOTECO quiijo quintatzacuiltis altepet Tiro ehuani

¹ Ipan nopa achtohui tonali ten nopa metzti 11 ipan toisraelita calendario * quema yahuiyaya para 11 xihuit ica quiqxijtijtoyaj Tanahuatijquet Joaquín ten ital huan quihuicatoyaj, TOTECO nechcamanalhui huan techilhui: ² “Tacat, nopa altepet Tiro ehuani tahuel paquiyayaj quema huetzqui altepet Jerusalén huan quiijtojque:

* **26:1** 26:1 Huelis ipan 3 itequi febrero 585 a.C. ipan tocalendario ten ama.

‘¡Paquelisti! Ya huetzqui nopa altepet cati quinahuatiyaya nochí ojme ten tanamaquisti ica nochí tali. Huajca ama ya ajsic hora para tojuanti timoricojchihuase ica nopa tanamaquisti. Nochí iniricojyo Jerusalén ehuani elis toaxca pampa nopa altepet mocahua tasosololi.’

³ “Huajca na, niDIOS Cati Más Nijpiya Tanahuatili, niquijtohua: Analtepet Tiro ehuani, na nimochijtoc niamocualancaitaca. Nijchihuas ma hualaca miyac soldados ten miyac talme para amechtehuiquij. Quisenhuiquilise hualase miyac soldados cati nelía quipiyaj chicahualisti quej senyajtoc mocojcoxonía hueyi at. ⁴ Huan nopa soldados quitamisosolose nopa tepamit cati quiyahualojtoc amoaltepe huan quihuelonise nochí nopa calme cati huejcapantique para ipan antamocuitahuise. Na niquijcuenis nochí tali ten nopa altepet huan nijcahuas nopa teme ma elica nelía alaxtic quej se tepexit. ⁵ Huan nopa tali ten altepet Tiro cati quiyahualohua hueyi at mocahuas quej se lugar para nopona michtajtamani ma quipatahuaca inimata. Quej nopa na, niDIOS Cati Más Nijpiya Tanahuatili, niquijtohua. Huan hualase sequinoc talme ehuani para amechichtequilise nochí cati anquipiyaj huan para amechezontamiltise. ⁶ Huan quintamimictise ica macheta nochí inimasehualhua nopa pilaltepetzitzí cati mopantíaj atenti. Huan huajca Tiro ehuani quimachilise para na, niDIOS.

⁷ “Quena, na, niDIOS Cati Más Nijpiya Tanahuatili, quej ni niquijtohua: Na nijhualicas Nabucodonosor, nopa tanahuatijquet ten tali Babilonia

para ma quitehui altepet Tiro. Yaya cati más quipiya chicahualisti huan cati inintanahuatijca nopa tanahuatiani cati mopantíaj ica norte. Huan Nabucodonosor hualas campa altepet Tiro ica miyac soldados ipan cahuayojme huan ica miyac tatehuijca carrojme huan tahuel miyac soldados cati san iniicxipa. ⁸ Achtohui quintehuis nochí nopa pilaltepetzitzti cati mocahua atenti. Teipa quichijchihuas quej se puente ica tet para quixcotonas nopa at cati amo huejcata para quiajsis altepet Tiro cati eltoc tatajco hueyi at. Huan nopona quitemase miyac tamontomit ten tali iteno nopa tepamit cati quiyahualohtoc amoaltepe nopona. Huan quintitanis miyac soldados cati quimanahuise inintacayo ten amocuataminhua ica se inintepostzajca cati quihiuicase inimaco.

⁹ “Huan quicuatopehuase nopa tepamit cati quiyahualohtoc altepet Tiro ica huejhueyi cuahuit huan quitahuisose. Huan nochí nopa huejcapantique calme para ipan antachiyase nojquiya quintahuisose. ¹⁰ Quema nopa tanahuatijquet ten tali Babilonia calaquis ipan icaltehua altepet Tiro, quipiyan ihuaya tahuel miyac tacame ica cahuayojme hasta quitananase miyac taltepochi cati quitemitis nopa altepet. Nesis quej calaqui ipan se altepet cati tasosololi. Huan pampa tahuel chicahuac molinise nopa cahuayojme huan iniruedas nopa tatehuijca carrojme, nopa tepamit cati quiyahualohtoc altepet Tiro huihuipicas. ¹¹ Huan tacame cati tejcotoque ipan cahuayojme ipan nejnemise nochí calles ipan nopa altepet. Huan quintamimictise ica macheta masehualme

nopona. Huan nopa taquetzalme yejyectzitzi huan huejcapantique cati nochí quinixtocayaya, huetzise talchi. ¹² Huan nopa tacame cati hualase amechichtequilise nochí amoricojyo huan nochí tamanti cati anquinamacayaya. Nojquiya quisosolose nopa tepamit cati quiyahualojtoc amoaltepe para amechmanahuis. Huan quintahuisose nochí amochajchaj cati eliyaya nelía yejyectzitzi. Huan nochí teme, huan amocuatetohua huan hasta nopa taltepocí npona quinmajcahuase ipan hueyi at. ¹³ Huan quej nopa ayecmo caquistis ajquiya huica npona, yon ayecmo aqui tatzotzonas ica arpa pampa nochí nijtamiltis. ¹⁴ Huan nopa tali campa moquetztoya altepet Tiro ica hueyi at yahaultic, nijchihuas quej se tepexit cati alaxtic. Huan npona michtajtamani quipatahuase inimata para ma huaquis. Huan ayecmo quema aqui quicualtalís npona altepet pampa na, niDIOS niquijtojtoc para quej npona elis. Quej npona na, niDIOS Cati Más Nijpiya Tanahuatili, niquijtohua.

¹⁵ “Huajca ya ni cati na, niDIOS Cati Más Nijpiya Tanahuatili, niquinilhuía cati itztoque ipan altepet Tiro: Quema huetzis amoaltepe huihuipi-case nochí masehualme ipan npona talme cati mopantíaj iteno hueyi at. Tahuel momajmatise quema quicaquise antzajtzise quema amechcocotjose huan quema amechmictijtose npona tatajco amoaltepe.

¹⁶ “Huan huajca nochí npona huejhueyi tanahuatiani cati mopantíaj ipan talme iteno npona hueyi at, quicajtehuase inisiyas campa mosehuíaj huan moquixtilise iniyoyo cati yejyectzi tajtzonti. Huan

ica miyac majmajti mosehuise talchi huan huihuipicase por cati amopantis. ¹⁷ Huan ini juanti chocase por anTiro ehuani huan para nopa amoaltepe huan huicase se mijcahuicat cati quijjtohua:

‘Ay nopa altepet Tiro cati tahuel eliyaya yejyectzi, cati quiyahualojtoya hueyi at.

¿Quenicatza quixitinijque huan quisosolojque nopa tacame?

Quipiyayaya miyac chicahualisti Tiro huan imasehualhua.

Imasehualhua huan icuaacalhua campa hueli yahuiyayaj.

Quichijque ma majmahuica masehualme campa hueli ipan taltipacti.

¹⁸ Ama nochí cati mopantíaj iteno nopa hueyi at, tahuel huihuipicaj ica majmajti pampa huetzqui. ¡Ama san ixpolijtoc!

¹⁹ “Pampa na, niDIOS Cati Más Nijpiya Tanahu-tili, nijchihuas altepet Tiro quej se huactoc tali huan quej se altepet campa amo aqui itz-toc. Elis quej hualas ipan nopa altepet miyac at cati quisahuis. ²⁰ Tamis nopa altepet huan nochí cati nopona itztoyaj quej miqui se masehuali huan yahui hasta más tatzinta ipan nopa hueyi ostot campa mopantíaj nopa masehualme cati huejcajquiya mijque huan nopona yajque. Ayecmo quema quinpiyas imasehualhua nopa altepet. Ayecmo quema motananas huan quipiyas tatepanitacayot. Nopa altepet ayecmo quema quipiyas iyejyejca ipan ni taltipacti campa itz-toque masehualme cati yoltoque. ²¹ Nijchihuas altepet Tiro ma elto quej se tamanti cati temajmatía

huan ayecmo quema elis se altepet. Huan masque masehualme tahuel quitemose huan quinequise elise quej achtohuiya, ayecmo quema quipantise. Quej nopa na, niDIOS Cati Más Nijpiya Tanahuatili, niquijtohua.”

27

Mijcahuicat para altepet Tiro

¹ TOTECO sempa nechcamanalhui huan techilhui: ² “Tacat, xihuica ni mijcahuicat para altepet Tiro huan imasehualhua, ³ nopa altepet cati mopantía tatajco hueyi at huan campa masehualme ten nochí tali ipan taltipacti tanamacaj huan tacohuaj. Xiquinilhui para na, niDIOS Cati Más Nijpiya Tanahuatili, niquijtohua: ‘¡Ay altepet Tiro! AnTiro ehuani anquijtohuaj para amoaltepe eliyaya cati más yejyectzi ipan ni taltipacti. ⁴ Yahualtic quipixtoya nopa hueyi at quej se tepamit. Nopa tacame cati quisencajque, tahuel quiyectalijque. ⁵ Quicualtalijtoque Tiro quej se hueyi barco cati tachijchihuali ica ciprés cuahuit cati más cuali onca ipan tepet Senir. Huan amoaltepe elqui quej se barco cati quipixtoc itaquetzalo cati quichijchijtoque ica tiocuahuit cati onca ipan tali Líbano. ⁶ Huan nopa cuame cati ica quinejnemiltíaj nopa barco, quichijchijque ica ahua cuahuit cati huala ipan tali Basán. Huan nopa icaltepayo nopa barco quichijchijque ica nopa cuahuit cati itoca pino cati onca ica tatzinta ten tali Chipre huan quiyejyecchijque ica marfil. ⁷ Nopa huejhueyi yoyomit cati quiilpitzas ajacat para quihuicas nopa barco eliyaya

tachijchihuali ica lino yoyomit cati más cuali cati huala tali Egipto. Patajtoya nopa yoyomit itzonta nopa barco quej elisquía se bandera cati yejyectzi. Huan nopa barco nojquiya quipixtoc yejyectzi yoyomit patajtoc ipan icaltencuayo para quinecahuilía masehualme ipan nopa barco. Nopa yoyomit eltoc moradojtic huan azultic huan huala ten nopa tali Elisa cati mocahua nechca hueyi at. Quena, quej nopa yejyectzi barco eliyaya amoaltepe Tiro.

⁸ “ ‘Nopa tacame ten tali Sidón huan Arvad quitequihuijque nopa cuahuit cati ica quinejemiltíaj nopa barco. Huan nopa tacame ten Tiro cati tahuel talnamiquij quimocuitahuijque.

⁹ Nopa huehue tacame ten tali Gebal cati tahuel quimatiyayaj inintequi hualajque huan quipepechojque cuali nopa caltepamit para amo calaquis at. Huan nochí barcos ten campa hueli tali hualayayaj campa Tiro para quintacohuilise huan quintanamaquiltise. ¹⁰ Sequij isoldados altepet Tiro eliyayaj tacame ten tali Persia, Lidia huan Libia. Elque soldados cati más hueliyayaj tatehuíaj. Huan, anTiro ehuani, nelía anmohueyimatiyayaj quema nopa soldados quicuapilohuayayaj ipan tapepecholi ipan amoaltepe inintzontzajca huan inintepostzajcayohua cati ica quimanahuiyayaj inintacayo pampa anmoilhuiyayaj para tahuel nesiyaya yejyectzi.

¹¹ “ ‘Nopa soldados ten tali Arvad tamocuitahuiyayaj ipan nopa tepamit cati quiyahualojtoc amoaltepe. Huan ipan nopa huejcapantique calme tamocuitahuiyayaj nopa tacame ten tali Gamad. Huan nochí

inintepostzajcayohua cati ica quimanahuiyayaj inintacayohua quicuapilohuayayaj ipan nopa tepamit huan ica ya nopa anmoilhuiyayaj para tahuel nesiyaya yejyectzi moaltepe.

¹² “ ‘Amojuanti cati anehuani altepet Tiro campa hueli antanamacayayaj hasta cati ehuani nopa hueyi altepet Tarsis amechnamaquiltiyayaj miyac tamanti cati pajpatiyo para xijnamacaca ipan amotianquis. Amechnamaquiltiyayaj plata, hierro, estaño huan plomo. ¹³ Masehualme ten tali Grecia, Tubal huan Mesec nojquiya amechtacohuiliyayaj, analtepet Tiro ehuani. Huan amechnamaquiltiyayaj tequipanohuani huan tamantzitzi cati tachijchihuali ica bronce. ¹⁴ Masehualme ten altepet Togarma amechhualiquiliyayaj cahuayojme cati tequitij, huan cati ininpa huelis antejcose. Huan amechhualiquiliyayaj mulas. ¹⁵ Nojquiya nopa masehualme ten tali Dedán hualayayaj para amechtacohuilise huan amechtanamaquiltise. Huan miyac talme cati mopantíaj ipan hueyi at anquintanamaquiltiyayaj huan inijuanti amechtaxtahuiyayaj ica ébano cuahuit huan ica marfil.

¹⁶ “ Masehualme ten tali Edom amechco-huiliyayaj nochí tamanti cati anquipiyayayaj. Huan amechhualiquiliyayaj yejyectzitzi tet cati itoca perlas, yoyomit cati morado, yoyomit cati yejyectzi tajtzonti, lino yoyomit, piltetzitzi cati yejyectzitzi ten coral huan piltetzitzi cati itoca rubí. ¹⁷ Tali Judá huan tali Israel ehuani nojquiya amechtacohuiliyayaj, analtepet Tiro ehuani. Amechpatiliyayaj ica trigo ten

altepét Minit; pantzi, sayolnecti, aceite huan bálsamo aquí quihualicayabaj. ¹⁸ Masehualme ten altepet Damasco amechtacohuiliyabaj huan amechtaxtahuiyabaj ica xocomecat iayo ten Helbón huan chipahuac yoyomit cati tachijchihuali ica borregojme inijhuiyo cati amechhualiquiliyabaj ten Sahar. ¹⁹ Masehualme ten altepet Dan huan Javán amechtacohuiliyabaj huan amechtaxtahuiyabaj ica teposti tatejtzonti, canela huan ohuat cati ajhuiyac. ²⁰ Masehualme ten altepet Dedán amechnamaquiltiyabaj pejpechti cati quitalíaj icuitapa se cahuayo.

²¹ “ Tali Arabia ehuani huan nopa tayacanani cati más tominpiyani ten tali Cedar, amechhualiquiliyabaj borregojme, oquich borregojme huan chivojme para ica amechtaxtahuise cati amechtacohuiliyabaj. ²² Altepét Sabá huan Raama ehuani amechhualiquiliyabaj nochí tamanti taajhuiyacayot, piltetzitzi cati pajpatiyo huan oro para amechpatilise ica ten amechcohuiliyabaj. ²³ Masehualme cati ehuani ipan altepeme Harán, Cane, Edén, Sabá, Asiria huan Quilmad nojquiya amechtanamaquiltiyabaj huan amechtacohuiliyabaj. ²⁴ Itztoyaj tacame cati amechnamaquiltiyabaj ten hueli tamanti: yoyomit cati azultic, yoyomit cati yejyectzi tajtzonti, taquemit cati quipajtoque ica miyac tamanti tapali cati taxinepaloli ica hilo cati tetic huan nochí quihualicayabaj ipan cajas ten tiocuahuit. ²⁵ Huan nopa huejhueyi barcos ten Tarsis taloitzitzi ajsiyabaj para amechhualiquilise tamanti para antanamacase.

Yeca tahuel anmoricojchijtoque anTiro ehuani huan amoaltepe.

“ ‘Nelía altepet Tiro elqui se tamanti tahuel yejyectzi npona ipan hueyi at. ²⁶ Pero xiquitaca cati panos ica altepet Tiro cati eltoc quej se hueyi barco cati tahuel yejyectzi. Nopa tayacanani qui-huicaj nopa barco ipan nopa at cati más huejcata. Nopona monamiqui ihuaya se ajacat cati tahuel chicahuac cati huala ica campa hualquisa tonati huan nopa hueyi ajacat quitamisosolohua nopa barco tatajco hueyi at. Quej nopa panos ica altepet Tiro. ²⁷ Nochi polihuis. Polihuis altepet Tiro huan nochi cati ehuani npona. Polihuis nochi iricojyo, nochi tamanti cati anquinamacayayaj huan cati anquicohuayayaj huan nochi tacame cati campa hueli tequitiyayaj ipan altepet Tiro ipan ten hueli tequit. Nochi Tiro ehuani, nochi ixpolihuise. Elis quej se hueyi barco ipan hueyi at atzonpolihuis ica nochi cati quinnemiltíaj, nochi cati quicualchijchijque, nochi tanamacani huan tacohuani, nochi soldados huan nochi nopa mase-hualme cati más quiixmatij quicualchijchihuaj nopa barco. Nochi atzonpolihuise ipan nopa tonali quema yas nopa barco atatzinta. Huan quej nopa tamis altepet Tiro quema hualase tacame quej se hueyi at para quitamisosolose nopa altepet.

²⁸ “ ‘Nochi nopa altepeme cati mopantíaj iteno hueyi at nechca Tiro huihuipicase ica majma-jti quema quicaquise tzajtzij nopa tacame cati quinnemiltiyayaj barcos huan quimatij nochi tan-tiya. ²⁹ Nochi cati quinejnemiltíaj nopa barco ipan hueyi at o nochi cati tequitiyayaj ipan nopa altepet

cati ni camanali ten se barco quinextía; nochí yase atenti huan moquetzase para quitachilise ica huejca quema motamisodos amoaltepe por nopa tacame cati hualahuij. ³⁰ Nochi cati quiitase cati panos ica Tiro tzajtzise huan chocase ica miyac tequipacholi por amojuanti ten nopa altepet. Nojquiya motemilise taltepocti ipan inintzonteco huan momimilose ipan cuajnexti pampa tahuel fiero elis cati ipantis altepet Tiro. ³¹ Moximase huan moquentise se yoyomit fiero cati ica quinextise inintequipachol huan tahuel chocase por nopa altepet Tiro ica miyac tequipacholi.

³² “ ‘Huan quema quichoquilise nopa altepet huan nochí cati miquise nopona, huicase ni mijca huicat cati quijtohua:

Ipan nochí taltipacti,

¿canque eltoc seyoc altepet yejyectzi quej Tiro,
cati mocajqui tasosololi tatajco hueyi at?

³³ Nochi nopa miyac tamantzitzí cati quinamacayaya,

huan quipatiliyaya ica sequinoc,

quinpalehuiyaya masehualme ipan miyac talme.

Iricojoyo Tiro huan nochí tamantzitzí cati quinamacayaya,

quinricojchijqui miyac tanahuatiani ten ni taltipacti.

³⁴ Pero ama hualajtoque inijuanti cati quitamisosolojtoque nopa altepet,

huan huetztoc nopa altepet quej se hueyi barco cati atzonpolijtoc,

hasta tatzinta ten nopa hueyi at.

Nochi cati tanamacayayaj huan nopa tacame
cati nopona tequitiyayaj ya polijtoque no-
jquiya.

³⁵ Nochi masehualme cati itztoque ipan nopa
talme cati mopantíaj iteno nopa hueyi at
san quitachilíaj,
hasta amo hueli quineltocaj cati ipantitoc altepet
Tiro,
huan cati nopona ehuani.

Nochi nopa talme inintanahuatijcahua tahuel mo-
majmatíaj huan ipan inixayac nesi majma-
jti.

³⁶ Quena, nopa tanamacani ten campa hueli talme
momajmatíaj,
pampa tahuel fiero cati amopantitoc,
anTiro ehuani huan amoaltepe.
Ixpolijtoc Tiro para nochipa.
Ayecmo quema monextis.’ ”

28

Tatzacuiltli para nopa tanahuatijquet ten Tiro

¹ Teipa TOTECO sempa nechcamanalhui huan
techilhui: ² “Tacat, xijmaca nopa tanahuatijquet
ten altepet Tiro ni camanali. Xiquilhui para na,
niDIOS Cati Más Nijpiya Tanahuatili, niquipijtohua:
‘Ta tahuel timohueyimati ipan moyolo huan tiqui-
jtojtoc, na se niDios huan nimosehuía ipan isiya
Dios tatajco hueyi at. Quej nopa tiquijtojtoc. Pero
ta amo cana tise Dios. Ta san tieli se mase-
huali masque ipan moyolo tijmachilía para tahuel
titalnamiqui quej na, niDios. ³ ¿Huelis timoilhuía
titalnamiqui más que Daniel? ¿Huelis timoilhuía
tijmati nochí tamanti cati eltoc ixtacatzi? ⁴ Ica

motalnamiquilis huan moyajatil tahuel timorico-jchijtoc huan ticaajoctoc miyac oro huan plata.⁵ Ta nelía titalnamiqui para titanamacas huan yeca tahuel timoricojchijtoc. Pero nochí moricojyo mitzchijtoc tahuel ximohueyimati.

⁶ “ ‘Yeca na, niDIOS Cati Más Nijpiya Tanahu-tili, niquijtohua: Pampa timoilhuijtoc más tital-namiqui que na niDios,⁷ na nijchihuas ma hualaca soldados ten sequinoc talme cati más mosisiníaj que nochí sequinoc ipan taltipacti. In-juanti quiqxintise inimacheta para mitztehuise huan quitamiltise motalnamiquilis, moyejyeja huan mohueyitilis.⁸ Inijuanti mitzmictise huan tiyas ipan nopa ostot cati tahuel huejcata quej sequinoc cati miquij tatajco hueyi at.⁹ Quema ti-itztos iniixpa cati mitztzontamiltise, ¿tiisenhuiquilis tiquijtos para tieli tiDios? ¡Amo neli! Iniixpa inijuanti san tielis se masehuali huan amo tiDios.¹⁰ Quema mitztanise seyoc tali ehuani, timquis inimaco ica pinahualisti pampa quej nopa na, niDIOS Cati Más Nijpiya Tanahuatili, niquijtojtoc.’”

Mijca huicat para nopa tanahuatijquet ten altepet Tiro

¹¹ TOTECO nechcamanalhui huan techilhui:
¹² “Tacat, xihuica se mijcahuicat para nopa tanahuatijquet ten altepet Tiro huan xiquilhui para quej ni na, niDIOS Cati Más Nijpiya Tanahuatili, niquijtohua: ‘Ta tieliyaya cati más senquisa tijpiyayaya talnamiquilisti huan tieliyaya yejyectzi ten nochí sequinoc.¹³ Tiitztoya ipan Edén, ixochimil Toteco Dios. Nochi

moyoyo eliyaya tayectalili ica nopa piltetzitzi cati más pajpatiyo huan más yejyectzitz quej cornerina, topacio, jaspe, crisólito, berilo, ónice, zafiro, carbunclo huan esmeralda. Huan nochí tacualtalili nelyejectzi huan quitatzquiltijtoque ipan itencuayo ten oro. Nojquiya mitzmacaque nopa tambores huan flautas cati quisencajque para ta hasta ipan nopa tonali quema nimitzchijchijqui. ¹⁴ Na nimitztapejpeni huan nimitztequitali tielis nopa hueyi querubín cati tamocuitahuía inihuaya injuanti cati más nonechca. Nimitztali ipan ilhuicac ipan nopa tepet cati tatzejzelotic huan quihiya nosiya na. Tinejnenqui tatajco nopa teme * cati cahuanij quej tit.

¹⁵ “Tijchijqui cati senquisa xitahuac noixpa ten quema nimitzchijchijqui hasta nopa tonali quema mopanti tajtacoli ipan ta. ¹⁶ Pampa tahuel timoricojchijtoya, mitzchijqui ximosisini huan yeca titajtacolchijqui. Huan na, niDios, nimitzquixti ten notepe ipan ilhuicac. Quena, nimitzquixti ta, tiquerubín cati titamocuitahuiyaya. Nimitzixpolihuilti ten tatajco nopa teme cati nesij quej tit. ¹⁷ Moyejyejca mitzchijqui tahuel ximohueyimati. Huan mohueyitilis quisosolo motannamiquilis. Yeca na nimitzmajcajqui hasta talchi huan nimitztali iniixpa nopa tanahuatiani para ma mitztachilica huan ma amo quichihuaca quej ta. ¹⁸ Ta tiquinmahuispolo nopa tiopame campa ta pampa tijchijqui miyac tajtacoli ica nopa tamaquilsti cati tijchihuayaya. Yeca nijchijqui ma

* **28:14** 28:14 O sitalime.

quisa se tit ipan Tiro cati quitamitati. Huan nijcahuili ma tatas hasta mochihuas cuajnexti iniixpa cati quitachilijtoque. ¹⁹ Nochi tali ehuani cati quixmatiyaya j Tiro achtohuiya, tahuel momajmatíaj por cati ipantitoc. Nopa altepet mochijtoc quej se tamanti cati temajmatía. Ixpolijtoc Tiro para nochipa huan ayecmo quema sempa elis.’ ”

TOTECO quitatzacuiltis altepet Sidón

²⁰ TOTECO nechcamanalhui huan techilhui:
²¹ “Tacat, xitachiya ica campa altepet Sidón huan xiquinilhui cati nopona ehuani taya ininpantis.
²² Xiquinilhui para quej ni na, niDIOS Cati Más Nijpiya Tanahuatili, niquijtohua: ‘AnSidón ehuani, na nimochijtoc niamocualancaitaca. Monextis nohueyitilis por cati amopantis amojuanti. Huan quema nimechtatzacuiltis, nochi quiitase para nitatzejzeloltic huan nochi cati quitachilijtose quimachilise para na, niDIOS.

²³ “ ‘Nimechtitanilis se cocolisti cati tahuel tamahua huan temictía. Huan miyac soldados amechtehuise huan quitoyahuase miyac amoeseo ipan calles. Nopa soldados hualase ten nochilados huan amechmictise amojuanti cati anitztoque nopona. Huan huajca anquimachilise para na, niDIOS.

²⁴ “ ‘Huan quej nopa amojuanti huan nopa sequinoc talme ehuani cati mopantíaj nechca tali Israel ayecmo huelis anquincoalancaitase israelitame huan anquinhuetzquilise. Ayecmo huelis anquinco cose quej huitzti cati talojtzitzi quincuaso o quinhuahuatzohua. Huan huajca anquimachilise para na, niDIOS.’ ”

25 “Na, niDIOS Cati Más Nijpiya Tanahuatili, niquijtohua ya ni: Ajsis tonali quema niquinsentilis noisraelita masehualhua sempa ten nochí nopa talme campa niquinsemantoc. Huan inijuanti itztose ipan inintal, nopa tali cati nijmacac notequipanojca Jacob cati elqui inihuejcapan tata. Huan nopona ica nomasehualhua, niquinnextilis nochí masehualme ipan nochí tali para melahuac nitatzejtzeloltic. **26** Huan nomasehualhua itztose ipan tali Israel ica temachili. Huan quichijchihuase ininchaj, huan quitocase xocomecat huan quipiyase tasehuilisti nopona, pampa ya niquintatzacuiltijtos nochí masehualme ipan nopa talme cati mopantíaj nechca huan quincualancaitayabaj. Huan nochí quimachilise para na, niDios huan niininTECO.”

29

TOTECO quijito quintatzacuiltis Egipto ehuani

1 Ipan 12 itequi nopa metzti majtacti ipan toisraelita calendario*, quema yahuiyaya para majtacti xihuit quihuicatoyaj Tanahuatijquet Joaquín ipan seyoc tali, TOTECO nechcamanalhui huan techilhui: **2** “Tacat, xitachiya ica campa tali Egipto huan xijyolmelahua nopa tanahuatijquet Faraón huan nochí imasehualhua ten nopa tatza-cuilty cati quinajsis. **3** Xiquilhui para quej ni na, niDIOS Cati Más Nijpiya Tanahuatili, niquijtohua: ‘Ta tiFaraón cati titanahuatía ipan tali

* **29:1** 29:1 Ipan 7 de enero, 587 a.C. ipan tocalendario ten ama.

Egipto, tiitztoc quej se hueyi cocodrilo cati temajmatía huan cati quichiya para tecocos nopona ipan nopa hueyat Nilo. Faraón, na nimochijtoc nimocualancaitaca pampa tiquijtojtoc: Ni hueyat Nilo na noaxca pampa na nimochijchihuili. Quej nopa tiquijto. ⁴ Yeca na nimitztalilis se tebos chijcoli ipan mocamac huan nimitzhuahuatatzas ten nopa at hasta campa tali inihuaya momasehualhua cati itztoque quej pilmichtzitzi cati itztoque ipan nopa hueyat huan mopepechojtihualase ipan mopetayo. ⁵ Huan nimitzmajcahuas ta huan momasehualhua campa huactoc tali. Huan nimechcahuas para ximiquica nopona huan ta amo aqui mitztananas para mitztalpachos. Motacayo niquinmacas totome huan nopa tapiroalme cati mosisiníaj para ma quicuaca.

⁶ “Huajca nochí amasehualme ipan tali Egipto anquimachilise para na, niDIOS Cati Más Nijpiya Tanahuatili pampa nopa israelitame quitemojque tapalehuili ipan ta, Faraón, huan amo tijpixqui chicahualisti para tiquinpalehuis. ⁷ Tieliyaya quej se acat cati tapanqui quema se ipan motatzquili. Huan amo san tapanqui nopa acat pero nojquiya quicuaxajqui ipan iela cati ipan motatzquili.

⁸ “Yeca na, niDIOS Cati Más Nijpiya Tanahuatili, niquijtohua para nijchihuas ma hualaca ipan motal, Faraón, miyac soldados para mitztehuiquij ica machetas huan quintzontamiltise momasehualhua huan motapiroalhua. ⁹ Huan nopa tali Egipto mocahuas quej se huactoc tali huan nopa egiptome quimachilise para na, niDIOS.

“Ta Faraón, tiquijtojtoc para nopa hueyat Nilo moaxca pampa ta timochijchihuili. ¹⁰ Cualtitoc.

Huajca ama na nimochijtoc nimocualancaitaca huan icualancaitaca nopa hueyat cati tiquijtohua para moaxca. Huan nijtamisodos nopa tali Egipto ten altepet Migdol ica ajco hasta Sevne ica tatzinta huan ten nopona hasta campa inepa tali Etiopía. Nochi elis quej huactoc tali. ¹¹ Huan para 40 xihuit amo aqui itztos nopona. Amo panose nopona masehualme, yon tapiyalme. ¹² Tali Egipto mocahuas tasosololi hasta quipanos nochi sequinoc talme cati nojquiya tasosololme. Huan ialtepehua tali Egipto mocahuase quej huactoc tali para 40 xihuit. Huan nopa masehualme ten tali Egipto niquntitanis ipan campa hueli talme para ma itztotij quej seyoc tali ehuani.

¹³ “ ‘Huan na, niDIOS Cati Más Nijpiya Tanahutili, niquijtohua: Quema tamis nopa 40 xihuit, niquinquixtis nopa egiptome ten nopa talme campa itztose quej seyoc tali ehuani huan sempa niquinhuasicas ipan inintal. ¹⁴ Niquinhuasicas ipan tali Patros cati mocahua ica tatzinta ten tali Egipto campa pejque nopa masehualme. Pero Egipto nochipa mocahuas se tanahuatijcayot cati pisiltzi huan amo teno ipati. ¹⁵ Quena, tali Egipto huan itanahuatijcayo elis más teicneltzi ten nochi sequinoc talme. Ayecmo quema mohueyilis hasta huelis quinnahuatis sequinoc talme pampa ayecmo quipyas chicahualisti.

¹⁶ “ ‘Huan israelitame ayecmo quitemose inintapalehuil tali Egipto ehuani. Nochipa quema quiitase ten panoc ica Egipto, quielnamiquise quenicatza tajtacolchijque achtohuiya quema motemachijque ipan amojuanti, anEgipto ehuani, huan amechtajtanijque xiquinpalehuica. Huan

huajca nopa israelitame quimachilise para san na, niDIOS Cati Más Nijpiya Tanahuatili.’”

¹⁷ Ipan nopa achtohui tonali ten nopa achtohui metzti ipan toisraelita calendario[†], quema tanahuatijquet Joaquín yahuiyaya para 27 xihuit quiquipintijtoyaj huan quihiucatoyaj ipan seyoc tali, TOTECO nechcamanalhui huan techilhui: ¹⁸ “Tacat, isoldados Tanahuatijquet Nabucodonosor ten tali Babilonia tahuel quintehujque chicahuac nopa altepet Tiro ehuani. Huan nojquiya tahuel chicahuac tequitique quema quimamayayaj ten hueli para quichihuase quej se puente para ajsise ipan nopa altepet ica hueyi at yahualtic. Huan nopa cuaxhuacti cati quitequihujque quintamitzoncaltepejque huan mocajque cuapepestique nopa soldados. Huan iniajcolhua tamicojque ica cati quihiucayayaj para quichihuase nopa puente. Pero Tanahuatijquet Nabucodonosor amo quipanti ricojyot cati ica quintaxtahuisquía nopa soldados por nopa tequit cati quichijque. ¹⁹ Huajca na, niDIOS Cati Más Nijpiya Tanahuatili, niquipijtohua ya ni: Huajca nijmactilis Tanahuatijquet Nabucodonosor ten tali Babilonia nopa tali Egipto. Huan Nabucodonosor quiichtequis nochí iricojyo tali Egipto huan nochí cati quihiuya para ica quintaxtahuis isoldados. ²⁰ Quena, na nijmacas nopa tanahuatijquet ten tali Babilonia tali Egipto quej se taxtahuili por nopa tequit cati quichijqui ipan altepet Tiro quema quitehui nopa

[†] **29:17** 29:17 Ipan 26 itequi abril, 571 a.C. ipan tocalendario ten ama.

altepet pampa yaya tequitiyaya para na. Quej nopa niquipijohua na, niDIOS Cati Más Nijpiya Tanahuatili.

²¹ “Huan ipan nopa tonali quema panotosa nochí ni tamanti, sempa chamanis ininchicahualis israelitame huan elis quej achtohuiya. Huan ta, tiEzequiel, ticamanaltis miyacapa tatajco ten inijuanti huan quitepanitase mocamanal, huan quimachilise para na, niDIOS.”

30

Itatzacuiltl tali Egipto

¹ TOTECO nechcamanalhui huan techilhui:
² “Tacat, xiquinyolmelahua masehualme taya panos huan taya na, niDIOS Cati Más Nijpiya Tanahuatili, niquipijohua. Xiquinilhui: ‘Xichocaca pampa monechcahuía nopa tonali cati tahuel temajmati. ³ Quena, monechcahuía nopa tonali ten TOTECO quema yaya tetatzacuiltis. Elis se tonali cati tahuel tamixtentoc huan tzintayohua. Ipan nopa tonali tahuel mocuesose nochí masehualme ipan nochí tali. ⁴ Oncas se hueyi tatehuilisti ipan tali Egipto huan miquise miyac masehualme hasta nopa mijcatzitzitzi quitamiixtzacuase nopa tali. Nopa tacame cati hualase quinichtequilise Egipto ehuani nochí iniricojyo huan nochí calme quintamisosolose hasta campa tatzquitoque. Huan tahuel momajmatise Etiopía ehuani. ⁵ Inisoldados Etiopía, Fut, Lud, Arabia, Libia huan nochí sequinoc talme cati san sejco motatzquilijtoque ica Egipto ehuani nojquiya miquise ipan nopa tatehuilisti.

6 “ ‘Pampa TOTECO quijtojtoc: Nojquiya miquise nochí cati quipalehuíaj tali Egipto ipan tatehuilisti. Miquise ica macheta ten altepet Migdol ica huejcpa hasta Sevne ica tatzinta. Huan tamis nochí nopa chicahualisti cati ica mohueyimatiyayaj Egipto ehuani. Quej nopa na, niDIOS Cati Más Nijpiya Tanahuatili, niquijtohua.’ **7** Nopa tali Egipto mocahuas tasosololi hasta quipanos sequinoc talme cati mocajtoque tasosololme. Huan nochí ialtepehua Egipto mocahuase más tasosololme que sequinoc altepeme. **8** Huan nopa masehualme ipan tali Egipto quimachilise para na, niDIOS quema nijtatis nopa tali huan niqintzontamiltis nochí ten sequinoc talme cati quipalehuiyayaj.

9 “Ipan nopa tonali quema nijtatzacuiltis tali Egipto, niqintitanis tayolmelahuani ipan barcos ipan hueyi at para quintemajmatitij nopa masehualme ten tali Etiopía cati amo quimatiy taya onca huan tahuel momajmatise. Nochi ya ni melahuac mochihuas.

10 “Quej ni na, niDIOS Cati Más Nijpiya Tanahuatili, niquijtohua: Nijtequihuis Tanahuatijquet Nabucodonosor ten tali Babilonia para nijtamiltis iricojyo tali Egipto. **11** Yaya huan isoldados cati más tahuel mosisiníaj huan temajmatíaj que nochí sequinoc, hualase para quitamisosolose nopa tali. Injuanti quitehuise tali Egipto ica macheta huan quitemitise nopa tali ica mijcatzitz. **12** Na njchihuas para nopa hueyat Nilo ma huaqui huan niquinmactilis masehualme cati fiero ininemilis nopa tali. Nijuntequihuis seyoc tali ehuani para

nijtamisosolos nopa tali huan nochí catí onca no-
pona. Na niDIOS niquijtojtoc.

¹³ “Na, niDIOS Catí Más Nijpiya Tanahuatili,
niquijtohua: Niquintapanas nochí nopa teteyome
catí quinhueyimatij ipan tali Egipto huan
nojquiya niquintamiltis nopa teteyome huan
taixcopincayome catí onca ipan altepet Menfis.
Ayecmo oncas seyoc Faraón para tanahuatis ipan
tali Egipto. Huan nopona ipan Egipto nijchihuas
para nochí masehualme ma momajmatise miyac.
¹⁴ Nopa tali Patros catí mocahua ica huejcapa
ipan Egipto nijtamisosolos. Nijtamatatis altepet
Zoán ica huejcapa huan altepet Tebas senquisa
nijtamiltis.

¹⁵ “Altepet Sin catí quipixqui nopa calme más
cuajcuali tasencahualí huan temachti ipan tali
Egipto, nijnextilis nohueyi cualancayo. Huan
nopa masehualme ten altepet Tebas, niquintami-
ixpolihuiltis. ¹⁶ Quena, tali Egipto nijtatis. Huan
altepet Sin ehuani niquinchihuas ma momim-
iloca ica tacuajcualoli. Nijcoyonis itepa altepet
Tebas para nicalaquis huan niquintatzacuiltis.
Huan mojmosta senquisa momajmatise nopa al-
tepet Menfis ehuani. ¹⁷ Misque ica macheta
ipan tatehuilisti nopa telpocame ten altepet Avén
huan Pibeset. Quinhuicase nopa sihuame catí
nopona ejque hasta seyoc tali. ¹⁸ Huan quema
nijssolos ichicahualis tali Egipto catí ica mohuey-
imatiyaya, nojquiya oncas quej tzintayohuilot
ipan altepet Tafnes. Elis quej quiixtzacuas nochí
tali Egipto se hueyi mixti catí yayahuic. Huan
nopa masehualme quinhuicase ilpitoque para
seyoc tali. ¹⁹ Quena, chicahuac nijtatzacuiltis tali

Egipto huan huajca quimachilise para na, niDIOS.”

²⁰ Ipan 7 itequi nopa achtohui metzti ipan toisraelita calendario*, quema Tanahuatijquet Joaquín yahuiyaya para 11 xihuit quiqxijtoyaj huan quihuicaque seyoc tali, TOTECO nechcamanalhui huan techilhui: ²¹ “Tacat, ya njtantoc Faraón, nopa tanahuatijquet ten tali Egipto. Eltoc quej njpostequilijtoc imax, pero amo aqui quipajtijtoc, yon amo quipictoque ica yoyomit campa cocojtoc para pachihuis huan sempa quipiyas chicahualisti para quitananas imacheta. ²² Yeca na, niDIOS Cati Más Nijpiya Tanahuatili, niquijtohua para nimochijtoc niicualancaitaca nopa Faraón cati tanahuatía ipan tali Egipto. Huan njpostequilis nochí ome imax. Njpostequilis nopa imax cati noja cuali huan nopa seyoc cati ya cocojtoc. Quej nopa njchihuas para nopa macheta cati quipixtoc imaco, ma huetzi talchi huan ayecmo huelis tatehuis. ²³ Huan nopa egiptome niqintitanis ipan campa hueli talme para ma itztotij quej seyoc tali ehuani. ²⁴ Huan njimacas chicahualisti nopa tanahuatijquet ten tali Babilonia huan njitalis imaco nomacheta. Pero nopa Faraón cati tanahuatía ipan tali Egipto, njpostequilis nochí ome imax. Huan yaya tahuel chocas iixpa nopa tanahuatijquet ten tali Babilonia quej choa se cati tahuel quicocojtoque hasta miquis. ²⁵ Quena, njimacas chicahualisti nopa tanahuatijquet ten tali Babilonia, pero nopa Faraón njpostequilis imax huan ayecmo teno huelis quichihuas. Huan

* **30:20** 30:20 Ipan 29 itequi abril, 587 a.C. ipan tocalendario ten ama.

quema nijtalis nomacheta imaco nopa tanahuatijquet ten tali Babilonia para ma quisosolo tali Egipto, nochi quimatisse para na, niDIOS. ²⁶ Huan nopa masehualme ten tali Egipto niquintitanis ipan campa hueli talme para ma itztotij quej seyoc tali ehuani, huan huajca quimachilise para na, niDIOS.”

31

Tanahuatijquet Faraón eltoc quej se tiocuahuit

¹ Ipan nopa achtohui tonali ten metzti eyi ipan toisraelita calendario, quema Tanahuatijquet Joaquín yahuiyaya para 11 xihuit quiqxijtoyaj huan quihuicaque ipan seyoc tali, TOTECO nechcamanalhui huan techilhui: ²⁻³ “Tacat, quej ni xiquilhui Tanahuatijquet Faraón ten tali Egipto huan imasehualhua: ‘¿Ica taya huelis timitzhuicalotise ta huan motal Egipto ica nochi amochicahualis? Na nijhuicalotis ica tali Asiria huan quenicatzá eliyaya achtohuiya. Quej nopa anquimatisse taya amopantis sintá ihuical anquichihuase. Asiria elqui se hueyi tali cati quipixqui miyac chicahualisti. Asiria elqui quej se hueyi tiocuahuit quej cati onca ipan tali Líbano. Quipixqui imacuayohua cati huejhueyi huan yejyectzitzí huan eliyaya huejcapantic hasta onajsiyaya ilhuicac. ⁴ Nochi inelhuayohua motatzquilijque cuali ipan tali cati quipiyayaya miyac at huan nopa at quipalehui para ma moscalti. Huan campa ijcatoya oncayaya miyac pilhueyatitzí cati quinatequiyaya nochi nopa cuame cati quiyahualohuayayaj. ⁵ Nopa cuahuit elqui más huejcapantic que nochí

sequinoc cuame. Quipixqui miyac ixihuiyo huan imacuayohua tahuel mohuehueyaquilijque pampa nopa at cati quipixqui ipan inelhuayohua quipalehui miyac. ⁶ Nochi totome quichihuayabaj inintepasol ipan imacuayohua. Huan nopa borre gojme huan huacaxme quintacatiltiyabaj inincone hua ipan iecahuilo. Elqui hueyi hasta nochis nopa huejhueyi talme ica inimasehualhua ipan taltipacti mocajque ipan iecahuilo. ⁷ Quipixqui chicahualisti huan elqui yejyectzi pampa nochis inelhuayohua motatzquilijtoyaj nelhuejcata hasta campa onca miyac at. ⁸ Ni cuahuit mochijqui más huejcapantic ten nochis sequinoc tiocuame cati oncayaya ipan ixochimil Toteco Dios. Yon se ciprés cuahuit amo quipiyayaya imacuayohua quej ya. Yon se castaño cuahuit ipan ixochimil Toteco Dios amo quipiyayaya ixihuiyo quej ya. Yon se ten ni cuame amo quipiyayaya iyejyejca quej ya. ⁹ Na nijchijqui nopa cuahuit ma eli tahuel yejyectzi huan ma quipiya miyac imacuayohua. Huan yeca nochis sequinoc cuame cati oncayabaj ipan Edén, ixochimil Toteco Dios, quiixtocayabaj para nojquiya elisquíaj quej ya.

¹⁰ “ ‘Pero ama na, niDIOS Cati Más Nijpiya Tanahuatili nimechilhuis ten panoc ica nopa hueyi cuahuit cati quiixnextía tali Asiria. Elqui quej nopa cuahuit mohueyichijqui huan mohueyimatqui. Motali más huejca que nochis nopa sequinoc cuame huan moscalti hasta onajsiyaya ilhuicac. ¹¹ Huajca na nijtemactili imaco nopa tanahuatijquet cati más quipiya chicahualisti ten nochis sequinoc para ma quitatzaculti quej

quinamiqui ica cati fiero quichijtoya. ¹² Hualase soldados ten nopa tali cati tahuel mosisiniáj huan temajmatíaj. Inijuanti quitamisosolose nopa tali Asiria quej se quitzintzontequi se cuahuit huan quitahuisohua hasta talchi. Huan elis quej nochí ixihuiyo huan imacuayohua tepehuise ipan campa hueli tepeme. Tepehuise ipan tamayamit huan ipan nopa hueyame cati onca ipan nopa tali. Huan nochí masehualme ten miyac talme cati itztoyaj itantita nopa cuahuit mohuejcatalise huan quicahuase iseltitzi. ¹³ Huan totome hualase para quichihuase inintepasol ipan imacuayohua nopa cuahuit cati huetztoc. Huan tapiyalme cati mosisiniáj cochise itzala imacuayohua. ¹⁴ Huajca ten ama huan teipa yon se cuahuit masque quipiya miyac at amo mochihuas hueyi quej ni hasta moscaltis más huejcapa ten mixti. Nochi tali huan inimasehualhua elise quej ni cuahuit huan miquise huan yase ipan nopa ostot cati tahuel huejcata inihuaya tacame cati mohueyimatque ten nochí taltipacti.

¹⁵ “Quej ni na, niDIOS Cati Más Nijpiya Tanahuatili, niquipijtohua: Ipan nopa tonali quema nijtahuiso talchi nopa cuahuit cati quiixnextía tali Asiria, nijchijqui para nochí ma mocuesoca. Nopa huejhueyi hueyame nopona niquinquetzqui huan huajque. Huan por cati ipantic Asiria, nijtzajqui nopa tepet ten Líbano ica tzintayohuilot huan nochí cuame cati onca nopona pilinque. Elqui quej nochí mocuesohuayayaj por Asiria. ¹⁶ Huan quema huetzqui Asiria, quichijqui ma huihuipicaca ica majmajti nochí talme cati eltoyaj inechca. Huan nijtitanqui tatzinta campa

tanahuatía miquilisti para mocahuas inihuaya sequinoc cati mictoque. Huan nepa tatzinta campa tanahuatía miquilisti, moyolchicajque nochí nopa sequinoc cuame cati tahuel mohueyimatiyayaj cati eltoyaj ipan Edén. Nopa cuame itztoyaj cati más tapejpenilme huan más cuajcualme ipan tepeet Líbano huan cati quipixtoyaj ininelhuayohua motatzquilijtoque huejcata campa onca miyac at. Huan moyolchicajque nopa cuame pampa quiitaque pampa nojquiya ajsitoya nopona campa tanahuatía miquilisti nopa hueyi cuahuit cati más mohueyimatiyaya cati quiixnextía Asiria.¹⁷ Huan nochí nopa talme cati itztoyaj ipan iecahuilo Asiria, quiijtosnequi cati quipalehuiyayaj, nojquiya ya tantoque huan yajtoque nopona campa tanahuatía miquilisti, nopona campa nojquiya itztoque nopa masehualme cati ya mijque ipan tatehuilisti.

¹⁸“Huajca ta titanahuatijquet ipan Egipto, ¿taya seyoc cuahuit cati hueyi huan tahuel yejyectzi onca quej ta? Tiquintani sequinoc cuame cati onca ipan ni taltipacti o ipan Edén. Ni quinextía para tahuel timohueyichijtoc tatajco nochí tali, pero san tapic, pampa tiyas hasta tatzinta ten nopa hueyi ostot campa tanahuatía miquilisti inihuaya nochí nopa sequinoc talme. Nopona tiitztoti inihuaya nopa masehualme ten nopa talme cati tiquincualancaita huan amo tiquinita sinta ininpati cati mijque ipan tatehuilisti.

“Huajca quej ni ininpantis imasehualhua tali Egipto huan nopa Tanahuatijquet Faraón cati ni cuahuit quiixnextía. Quej nopa na, nidiOS Cati Más Nijpiya Tanahuatili, niquijtohua.”

32

Tanahuatijquet Faraón eltoc quej se león

¹ Ipan nopa achtohui tonali ipan metzti doce ipan toisraelita calendario * quema Tanahuatijquet Joaquín yahuiyaya para 12 xihuit ica quiquixtijtoyaj huan quihuicatoyaj seyoc tali, TOTECO nechcamanalhui huan techilhui: ² “Tacat, xihuica ni mijca huicat para nopa Faraón cati tanahuatía ipan tali Egipto huan xiquilhui ni camanali ten na para tijyolmelahuas cati ipantis: ‘Ta, tiFaraón, timoilhuía tiitztoc quej se león cati sanoc motantoc huan tahuel quipyia chicahualisti. Quej nopa timoilhuía para tali Egipto nelía quipyia miyac chicahualisti tatajco ten nochí sequinoc talme. Pero ta san tieli quej se hueyi cocodrilo cati itztoc iteno nopa hueyat Nilo huan ica iyacatzol quimomolotza nopa at huan ica iicxihua quichihua tetetztic.

³ “ ‘Huajca quej ni na, niDIOS Cati Más Nijpiya Tanahuatili, niquijtohua: Na nihualas ica miyac masehualme ten miyac talme huan nimitzmajcahuilis nomata huan nimitzmasiltis. ⁴ Nimitzquixtis ten nopa at huan nimitztalism ipan huactoc tali para ximiqui. Huan nijchihuas para nochí totome cati patantinemij ajacatipa ma moquetzaca mopani huan nopa tapiyalme cati nejnemij talchi ma quicuaca monacayo hasta ixhuise. ⁵ Huan monacayo huan moomiyohua niquijzelos ipan nochí tepeme huan nochí tamayamit. ⁶ Nijchihuas ma xoloni ica moeso

* **32:1** 32:1 Ipan 3 itequi marzo, 585 a.C. ipan tocalendario ten ama.

nopa tali campa ta tiitztoc ica momasehualhua. Huan mosemanas amoeseo hasta quitemitis hueyame huan ajsis hasta ipan nochitepeme.

⁷ Huan quema nimitzixpolihuiltisihuaya motal, niquixtzacuas ilhuicacti para ma amo nesi. Huan nijchihuas para sitalime ma amo taahuica. Huan ne tonati niquixtzacuas ica se mixti huan nijchihuas ne metzti para ma amo taahui. ⁸ Quena, quema nimitztatzacuiltis, nijsehuis nochitamanti cati más chicahuac taahuíaj ipan ilhuicac. Huan ipan nochitepal, oncas san tzintayohuilot. Quej nopa na, niDIOS Cati Nijpiya Nochi Tanahuatili, niquijtohua.

⁹ “Huan quema nimitztontamiltis inihuaya cati itztoque ipan motal, nijhuicas camanali ten cati panoc hasta masehualme ipan campa hueli talme cati amo quema tiquinixmajtoya. Huan inijuanti nojquiya, mocuesose ipan iniyolo.

¹⁰ Quena, nijchihuas para se hueyi majmajti ma quinajsi miyac masehualme ipan miyac talme por nochitamanti nimechchihuili ipan nopa tonal. Huan inintanahuatijcahua miyac masehualme huihuipicase quema niquixtis nomacheta cati petani huan nitatzohuitequis iniixpa. Quena, momajmatise miyac por ininemilis ipan nopa tonali quema nimitztontamiltis inihuaya momasehualhua.

¹¹ “Pampa na, niDIOS Cati Más Nijpiya Tanahuatili, niquijtohua: Hualas nopa tanahuatijqueten tali Babilonia para amechtehuis ica macheta. ¹² Nimechtzontamiltis ica nopa soldados ten tali Babilonia cati más quipiyaj chicahualisti huan más mosisiníaj ten nochitsequinoc

ipan taltipacti. Quitamisosolose nochi tamanti cati ica anmohueyimatiyaj ipan tali Egipto huan quintzontamiltise nochi momasehualhua. ¹³ Niquintzontamiltis nochi amohuacaxhua huan amocahuayojhua cati atij iteno nopa hueyat. Huan yon se tacat o tapiyali ayeclmo quichihuas tetetztic nopa at ica iicxi. ¹⁴ Huan huajca nopa at ipan nopa hueyat ipan tali Egipto elis tapajpactic. Oncas tasehuilisti huan nochi hueyame motalose ica yejyectzi huan elise alaxtic quej aceite. Quej nopa na, niDIOS Cati Más Nijpiya Tanahuatili, niquijtohua. ¹⁵ Huan quema nijtamisosolos tali Egipto huan niquixpolihuiltis nochi cati quipiya huan niquinmictis nochi momasehualhua, huajca anquimachilise para na, niDIOS.’

¹⁶ “Ya ni se mijca huicat huan sihuame ipan nochi taltipacti huicase quema quichoquilise tali Egipto huan imasehualhua. Quej nopa na, niDIOS Cati Más Nijpiya Tanahuatili, niquijtohua.”

Egipto ehuani miquise

¹⁷ Ipan 15 itequi nopa metzti doce ipan toisraelita calendario † quema yahuiyaya para 12 xihuit techhuicatoyaj, TOTECO nechcamanalhui huan techilhui: ¹⁸ “Tacat, xiquinchoquili nopa masehualme ten tali Egipto huan nojquiya nopa masehualme cati ehuani ipan sequinoc talme cati nelia quipiyaj chicahualisti. Na niquintitanis ipan nopa tali cati mas tatzinta campa miquilisti tanahuatia huan campa mocahuaj nochi mijcätzitzi. Xiquinhuicati ni mijca huicat:

† **32:17** 32:17 Ipan 17 itequi marzo, 585 a.C. ipan tocalendario ten ama.

19 ‘¡Ay Egipto ehuani!

Anmoilhuiyaj para más yejyectzi Egipto,
que nochí sequinoc talme.

Pero san tapic pampa ama anmiquise huan
anyase hasta tatzinta,
ipan nopa ostot ipan nopa tali campa miquilisti
tanahuatía.

Nopona anmocahuase inihuaya nopa
masehualme cati mijque ica pinahualisti
quema sequinoc quintanque ipan
tatehuilisti.’

20 “Nopa egiptome huetzise mictoque san se
quej nopa miyaqui masehualme cati miquij ipan
tatehuilisti. Pampa nopa macheta ya eltoc xolot
para quinmictise nochí Egipto ehuani. **21** Huan
nopona ipan nopa tali tatzinta, nopa tayacanani
cati más quipiyaj chicahualisti quinhuihuitase
nopa tali Egipto ehuani huan nochí inintapale-
huijcahua huan quiijtose: ‘Ya antemotoque para
anmocahuase inihuaya tacame cati mijque ica
pinahualisti quema sequinoc quintanque ipan
tatehuilisti huan masehualme ten miyac talme
cati tahuel anquincualancaitayaj.’

22 “Nopona mocahuaj nopa tanahuatiani ten
tali Asiria huan yahualtic quintalpachojoque
inisoldados cati mijque ipan tatehuilisti.

23 Quintalpachojoque ipan ostot cati eltoc hasta
más tatzinta campa tanahuatía miquilisti. Huan
yahualtic ten inijuanti quintalpachojoque nopa
masehualme cati quinpalehuiyayaj. Pero nochí
inijuanti eliyayaj tacame cati más mosisínáj huan
tahuel temajmatíaj ipan taltipacti, pero ama ya
mictoque inimaco inincualancaitacahua.

24 “Nojquiya mocahuaj nopona nopa tanahuatiani ten tali Elam. Huan yahualtic mocahuaj inisoldados cati mijque ica pinahualisti quema sequinoc quintanque ipan tatehuilisti. Ama ya ajsitoque nopona campa más huejcata ipan tali pampa quema itztoyaj ipan ni taltipacti quintaijyohuiltijque masehualme ipan miyac talme.

25 Pero ama cati ehuani Elam mocahuaj nopona campa mijcatzitz. Huan yahualtic quintalpachojtoque nochi inisoldados cati mijque ica pinahualisti quema sequinoc quintanque ipan tatehuilisti. Quema itztoyaj ipan ni taltipacti, inijuanti quintemajmatijque miyac talme, pero ama huetztoque ica miyac pinahualisti ipan nopa ostot ipan nopa tali ten miquilisti.

26 “Nojquiya mocahuaj nopona nopa tayacanani ten tali Mesec huan Tubal. Huan yahualtic ten inijuanti quintalpachojtoque inisoldados cati mijque ica pinahualisti quema sequinoc quintanque ipan tatehuilisti. Nochi inijuanti tahuel mosisiniyayaj huan quintemajmatiyayaj miyac talme quema itztoyaj ipan taltipacti, pero ama nochimictoque.

27 Amo quintalpachojtoque ica miyac tatepanitacayot quej quichijque ica huejhueyi soldados huejcajquiya cati tahuel mosemacaque huan teipa mijque ica pinahualisti quema sequinoc quintanque ipan tatehuilisti. Inijuanti quintalpachojque ihuaya inintepos. Quipixtoque macheta tatzinta ten inintzonteco huan inintepostzajca cati quinmanahui ipan tatehuilisti ipan inintacayo. Quej nopa quintalpachohuayayaj pampa quema itztoyaj

ipan ni taltipacti quintemajmatijque nochimasehualme.

²⁸ “Huan nojquiya amojuanti antali Egipto ehuani anmocahuase ica amotacayohua postectoque inihuaya nopa sequinoc catitemotoque nopona tatzinta ica nopa sequinoc tacame cati mijque ica pinahualisti quema sequinoc quintanque ipan tatehuilisti.

²⁹ “Nojquiya mocahuaj nopona nopa tayacanani huan tanahuatiani ten tali Edom. Masque quipiyayayaj tahuel miyac chicahualisti, ama nojquiya ya quintalpachojtoque tatajco ten nopa sequinoc cati mijque ica pinahualisti quema sequinoc quintanque ipan tatehuilisti. Huan ya temoque ipan nopa hueyi ostot campa tanahuatía miquilisti.

³⁰ “Nojquiya temotoque nopona nochinopa tayacanani ten nopa talme cati mocahuaj ica norte huan nochinopa masehualme ten tali Sidón. Nochi injuanti mijque ica pinahualisti quema sequinoc quintanque ipan tatehuilisti. Huan masque quema itztoyaj ipan ni taltipacti tahuel mosisiniyayaj huan temajmatiyayaj, ama ya mocahuaj ica hueyi pinahualisti ipan nopa hueyi ostot campa tanahuatía miquilisti inihuaya nopa masehualme cati mijque ipan tatehuilisti.

³¹ “Quema Tanahuatijquet Faraón ajsis nopona huan quinitas nochinopa sequinoc, moyolchicahuas se quentzi pampa amo san yaya cati mijqui ipan tatehuilisti ica nochisoldados. Quej nopa na, niDIOS Cati Más Nijpiya Tanahuatili, niquijtohua. ³² Huan masque nijchijqui para nopa Faraón ma temajmati ipan ni taltipacti, ama yaya huan

nochi isoldados nojquiya mocahuaj tatajco nopa masehualme cati mijque ica pinahualisti quema sequinoc quintanque ipan tatehuilisti. Quej nopa na, niDIOS Cati Más Nijpiya Tanahuatili, niquijtohua.”

33

*Itequi se tamocuitahuijquet
(Ez 3:16-21)*

¹ Sempa TOTECO nechcamanalhui huan techilhui: ² “Tacat, xiquincamanalhui momasehualhua huan quej ni xiquinilhui: ‘Quema niquinhualica soldados ipan se tali para ma quitehuica, nopa masehualme cati itztoque ipan nopa tali quitapejpeníaj se ten inijuanti huan quitalíaj para ma tamocuitahui huan ma quitachili canque hualahuij inincualancaitacahua. ³ Huan quema nopa tamocuitahuijquet quiita monechcahuíaj nopa soldados para quitehuise nopa tali, quipitzá nopa tapitzali para quinyolmelahuas nopa masehualme ma mocualtalica. ⁴ Huan sintia se acajya quicaquis nopa tapitzali huan amo quichihuilis cuenta huan icualancaitacahua quimictise, huajca amo aqui quihiucas tajtacoli por imiquilis, san elis yaya itajtacol. ⁵ Pampa yaya quicajqui quema quipitzque nopa tapitzali, pero amo quichihuili cuenta. Huajca melahuac yaya itajtacol para mijqui pampa, sintia quichihuilitosquía cuenta, hueltosquía quimanahuijtosquía inemilis. ⁶ Pero sintia nopa tamocuitahuijquet quiitas monechcahuíaj nopa soldados cati icualancaitacahua huan amo quipitzas nopa tapitzali para quinyolmelahuas nopa masehualme ma mocualtalica, huan

ajsiquij nopa soldados huan quimictise se acajya, nopa masehuali miquis por ya itajtacolhua, pero na nijtajtanis cuenta nopa tamocuitahuijquet.'

⁷ "Huan quej nopa eltoc ica ta, tacat. Na nimitzalijtoc quej se titamocuitahuijquet campa israelitame. Monequi tijcaquis nochí cati nimitzilhuía huan tiquinyolmelahuas cati niquijtojtoc para quimatise taya ininpantis. ⁸ Sinta na niquijtos para temachti se masehuali cati amo cuali miquis, huan ta amo tiquilhuis cati niquijtohua para ma moyolcuepa; huajca nopa masehuali cati amo cuali miquis por itajtacol, pero na nimitztajtanis cuenta por imiquilis. ⁹ Pero sinta ta tiquilhuis nopa masehuali cati amo cuali para ma moyolcuepa, huan yaya amo moyolcuepas; huajca miquis por itajtacolhua, pero ta tijmanahuis monemilis.

*Itequi se masehuali
(Ez 18:21-32)*

¹⁰ "Huajca ama, tacat, quej ni xiquinilhui nopa israelitame: 'Amojuanti anquijtohuaj para nochí amotajtacolhua huan amotaixpanolhua eltoc amopani huan yeca ya tantiya amonemilis huan anmotatzintoquilíaj, ¿quenicatza huelis noja timocahuase tiyoltoque? ¹¹ Huajca xiquinilhui para na, niDIOS Cati Más Nijpiya Tanahuatili, niquijtohua: Temachti amo nijnequi ma miqui yon se masehuali cati amo cuali. Na nijnequi ma quicahua iojhui cati amo cuali huan ma quipyia nemilsti. Huajca anisraelitame, ximoyolcuepaca

huan xijcahuaca amotajtacolhua pampa na amo nijnequi ximiquica*.

¹² “Huan ta, titacat nojquiya xiquinilhui ya ni: ‘Cati cuali quichihua se cuali tacat amo quimanahuis inemilis sintia pehuas tajtacolchihuas. Yon amo quinenpolos se tajtacolchijquet itajtacol, sintia yaya quicahuas itajtacolhua huan pehuas quichihuas cati xitahuac. ¹³ Sinta niquidhuis se tacat cati quichihua ten xitahuac para temachti itztos, huan teipa pehuas tajtacolchihuas, ma amo moilhui para nopa ten cuali quichijqui achtohuiya quimanahuis inemilis pampa na ayecmo nijchihuolis cuenta cati achtohuiya quichijqui. Huan yaya miquis por nopa tajtacoli cati quichijqui teipa. ¹⁴ Huan sintia niquidhuis se masehuali cati quichihua ten amo cuali para temachti miquis, pero teipa yaya moyolcuepas ten itajtacolhua huan pehuas quichihuas cati cuali huan cati xitahuac, yaya itztos. ¹⁵ Cuali elis sintia yaya sempa quicuepas cati quiprendajcahuilíaj quema tetanejtía se tamanti huan quicuepas cati teichtequilijtoc. Cuali elis sintia monejnemiltis senquisa quej quijjohua nopa tanahuatili cati temaca nemilisti huan ayecmo quichihuas cati amo cuali. Huan sintia nopa masehuali quichihuas ni tamanti, huajca temachti itztos. Amo miquis[†]. ¹⁶ Huan amo nijchihuolis cuenta itajtacolhua cati achtohuiya quichijqui pampa ama

* **33:11** 33:11 Nica para miquis quinequi quijjtos para miquis ica macheta o ica tatzacultili o quema ayemo huehuejtixtoc. Temachti noch i masehualme miquise se tonali masque cuajcualme o amo cuajcualme. † **33:15** 33:15 Xijtachili 33:11.

ya quichihua nochí catí cuál huan catí xitahuac.
Huajca temachti itztos. Amo miquis.'

17 "Tacat, nopa momasehualhua quiijtohuaj para na amo nijchihua catí xitahuac, pero eltoc inijuanti catí amo quichihuaj catí xitahuac.
18 Huajca seyoc huelta nimechilhuis ya ni: Sinta se tacat catí quichihua catí xitahuac pehua tajtacolchihua, huajca miquis por itajtacolhua.
19 Huan sinta se tacat catí amo cuál moyolcuepas huan quicahuas catí amo cuál quichihuayaya huan pehuas quichihuas catí cuál huan catí xitahuac, huajca temachti itztos. **20** Anisraelitame, anquisenhuiquilíaj anquijtohuaj para na niamotECO amo nijchihua catí xitahuac, pero nimechilhuía, nimechtajtolsencahuas sesen ten amojuanti anisraelitame quej quinamiqui ica catí anquichihuaj."

Ya huetzqui altepet Jerusalén

21 Ipan 5 itequi ten metzti majtacti ipan toisraelita calendario ‡ quema tiyahuiyayaj para 12 xhuit techquixtijtoyaj ten total, ajsico campa na se tacat catí cholojtejqui ipan altepet Jerusalén huan techilhuico: "Tocualancaitacahua ya quitzquitoque altepet Jerusalén." **22** Huan TOTECO quitalijtoya imax ipan na ica tiotac ten nopa seyoc tonali quema nopa tacat ayemo ajsiyaya. Huan quema techitzqui quitapo notoscac, pampa nieliyaya ninono§. Techtoscatapo para huelis

‡ **33:21** 33:21 Elqui 8 itequi enero, 585 a.C. ipan tocalendario ten ama. § **33:22** 33:22 Xijtachili Ez 3:26, 27 quema Ezequiel pejqui mochihua nono.

nicamanaltisihuaya nopa tacat quema ajsisquía campa na.

Inintajtacolhua nopa masehualme

²³ Huan Toteco nechcamanalhui huan techilhui: ²⁴ “Tacat, nopa masehualme cati noja itztoque ipan nopa altepeme cati tasosololme ipan tali Israel quisenhuiquiliáj quiijtohuaj para itztoque quej Abraham cati itztoya iseltitzi huan moaxcati nochí ni tali huan inijuanti itztoque miyaqui, huajca noja más huelise moaxcatise nopa tali seyoc huelta. ²⁵ Huajca ama xiquinilhui nopa israelitame ni camanali cati na, niDIOS Cati Más Nijpiya Tanahuatili, niquijtohuá: ‘Amo anmoaxcatise sempa nopa tali pampa tahuel antajtacolchihuaj. Anquicuaj nacat ihuaya esti, anquinhueyichihuaj teteyome huan antemictiáj. Sinta quej nopa anquichihuaj, ¿anmoilhuiáj anmoaxcatise nopa tali? ²⁶ Nojquiya tahuel antatehuiáj ica macheta, anquinsihuacuiliáj amohuampoyohua, huan anquichihuaj miyac tamanti cati na amo nijnequi niquitas. Huajca amo ximoilhuica para anmoaxcatise nopa tali.’

²⁷ “Nojquiya xiquinilhui para quej ni na, niDIOS Cati Más Nijpiya Tanahuatili, niquijtohuá: ‘Temachti nimechilhuía para nopa masehualme cati itztoque ipan nopa altepeme cati tasosololme, miquise ipan tatehuilisti. Huan cati itztoque ipan cuatitamit, quincuase tecuanime. Huan cati motatijtoque campa tepamit cati tilahuac huan ipan ostot, miquise ica cocolisti. ²⁸ Huan nopa tali nijchihuas quej se huactoc tali. Huan nopa chicahualisti cati ica mohueyimatiyayaj, nijtamiltis.

Huan nochí tepeme ten tali Israel mocahuase tasosololme hasta amo aqui huelis panos nopona. ²⁹ Huan quema ya nijtamisosolojtos nopa tali por inintajtacolhua, huajca inijuanti quimachilise para na niDIOS.'

³⁰ "Tacat, momasehualhua camanaltij ten ta ipan ininchaj huan campa icaltejyo nopa tepamit. Quijtohuaj se ica seyoc: 'Xihualaca huan ma timopaquiltica. Ma tijtacaquilica nopa camanali cati huala ten TOTECO.' ³¹ Huan quena, inijuanti hualahuij quej nelia elisquiáj nomasehualhua huan mosehuíaj moixpa para quitacaquilise taya tiquijtohua, pero masque quicaquij, amo quichihuaj cati na niquinilhuía. Ica ininamac quiijtohuaj para teicnelíaj, pero amo cana. Pampa ipan iniyolo achi más quiicnelíaj inintomi. ³² Inijuanti san quicaquij mocamanal para mopaquiltíaj. Mitzitaj quej tielisquía se tacat cati yejyectzi itoscac para huicas huicat ten teicnelijcayot, o se cati yejyectzi tatzotzona. Quicaquij mocamanal, pero amo quichihuaj cati tiquinilhuía ma quichihuaca. ³³ Pero quema panos nochí nopa tatzacuiltyli cati tiquinyolmelajtoc, inijuanti quimachilise para melahuac oncac se tajtolpanextijquet tatajco ten inijuanti."

34

Tatzacuiltyli para nopa tamocuitahuiani ten tali Israel

¹ Toteco nechcamanalhui huan techilhui: ² "Tacat, xiquincamanalhui nopa tamocuitahuiani cati tayacanaj ipan tali Israel huan xiquinilhui taya ininpantis teipa.

Xiquinilhui para quej ni na, niDIOS Cati Más Nijpiya Tanahuatili, niquijtohua: ‘Nelía anteicneltique, antamocuitahuiani ten tali Israel pampa san ammotamacaj amojuanti, pero amo anquintamacaj amomasehualhua cati itztoque quej borregojme.³ Eltoc quej anquijj nopa lechi, anmochijchihuiláj yoyomit ica iniijhuiyo nopa borregojme huan anquinmictíaj nopa borregojme cati más tomahuaque para anquincuase, pero inijuanti amo anquintamacaj.⁴ Amo anquinpalehuíaj cati cocoxquetzitz. Amo anquinpajtíaj cati mococohuaj, amo anquinhuíjcomaj ica yoyomit cati quipostectoc imetz. Amo anquinchihuaj ma mocuepaca cati quitoquiláj seyoc ojti, yon amo anquitemohuaj cati mocuapolojtoc. Antamocuitahuiani anmochijtoque tahuel anyoltetique huan anquinyacanaj amomasehualhua ica cualanti huan san anquintaijyohuilitáj.⁵ Huajca israelitame itztoque quej borregojme cati motamisemanque. Ayecmo quipixque intamocuitahuijca. Ama sesen ten inijuanti ya huetztoque inimaco nopa tecuanime cati onca ipan cuatitamit.⁶ Nochi noisraelita masehualhua mocuapolojque quej borregojme huan yajtoque ipan campa hueli cuatitamit huan tepeme huan ipan nochitaltipacti. Huan amo oncac yon se cati mocuatotoni por inijuanti para yas quintemoti huan quinmocuitahuis.

⁷ “ ‘Huajca ama antamocuitahuiani, xijtacaquilica nocamanal na niDIOS:⁸ Na, niDIOS Cati Más Nijpiya Tanahuatili, niquijtohua para temachti nimechtatzacuiltis

antamocuitahuiani cati anquintahuelcajtoque noborregojhua. Anquincahuilijtoque para tecuanime ma quintzontamiltica huan ma quincuaca. Amo anquinmocuitahuijtoque quej quinamiqui pampa amo anquintemojtoque cati mocuapolojtoque. Amojuanti nochipa anquicuajtoque tacualisti cati más cuali, pero noborregojhua anquincajtoque ma mayancamiquica.⁹ Yeca ama antamocuitahuiani, xijtacaquilica nocamanal na niDIOS: ¹⁰ Na, niDIOS Cati Más Nijpiya Tanahuatili, niquijtohua para nimochijtoc niamocualancaitaca, antamocuitahuiani. Huan nimechtajtanis cuenta por nochí cati ininpanti nomasehualhua cati itztoque amomaco quej borregojme. Na nimechquixtilis nopa tequiticayot cati anquipiyaj para anquinmocuitahuise nomasehualhua. Quena, na niquinmanahuis noborregojhua amocamaco huan ayecmo huelis anquincause.'

Nopa cuali tamocuitahuijquet

¹¹ "Quej ni na, niDIOS Cati Más Nijpiya Tanahuatili, niquijtohua: Na noseltitzi niyas niquinemoti noborregojhua huan niquinixmatis. ¹² Quej se cuali tamocuitahuijquet mocuesohua por iborregojhua quema mocuapolohuaj huan yahui quintemoti, na niquinemos nomasehualhua cati campa hueli yajtoque huan mocuapolojtoque. Huan quema niquinpantis, niquinquixtis ten nochí nopa lugares campa mosemantoque ipan nopa tonali quema tamixtentoya huan nopa tonali ten tzintayohuilot. ¹³ Quena, niquinquixtis ten

nopa talme huan altepeme campa mopantíaj huan niquinsejcotilis huan niquinhualicas ipan inintal. Huan nopona niquntamacas ipan nopa tepeme ten tali Israel campa onca cuali sacat, huan iteno hueyat huan ipan lugares yejyectzitz campa itztoque miyac masehualme.

¹⁴ Niquinhuicas ma quicuati j nopa cuali sacat cati onca ipan nopa huejcapantique tepeme ipan tali Israel. Huan nopona mosiyajquetzase ica paquilisti huan quicuase nopa sacat cati ajhuiyac cati mopantía nopona.

¹⁵ Na noselti niquinmocuitahuis noborregojhua huan niquinchihuas ma mosiyajquetzaca ica paquilisti. Quej nopa na, niininTECO Cati Más Nijpiya Tanahuatili, niquijtohua:

¹⁶ Niquintemos noborregojhua cati mocuapolojtoque huan sempa niquinhualicas ipan ininchaj huan nopona itztose temachme. Huan nijhuijcomas imetz cati postectoc huan niquinpalehuis cati cocoxquetzitz. Pero nopa cati itztoque tomahuaque huan nelía quipiyaj chicahualisti, niquinmictis.

Huan niquinmocuitahuis noborregojhua quej quinamiqui.

¹⁷ “Huan ica amojuanti annoborregojhua na, niamoTECO Cati Más Nijpiya Tanahuatili, niquijtohua: Na nimechtajtolsencahuas. Huan niquiniyocatalis ten amojuanti ica cati cuajcualme huan cati amo cuajcualme. Huan nojquiya niquiniyocatalis oquich borregojme ica nopa oquich chivojme.

¹⁸ Sequij ten amojuanti amo san anquicuaj nopa sacat cati más cuali pero anquitamixacualohuaj nopa sacat cati noja mocahua. Nojquiya amo san

anquijj nopa at cati más tapajpactic, pero nopa cati noja mocahua anquichihuaj tetetztic ica amoicxi. ¹⁹ Huan nopa sacat cati mocahua para noborregojhua ma quicuaca san eltoc nopa sacat cati anquitamixacualojoque. Huan para atise, san quipiyaj nopa at cati anquichijtoque tetetztic ica amoicxi.

²⁰ “Yeca na, niDIOS Cati Más Nijpiya Tanahuatili, niquipijtohua: Na niqintajtolsencahuas nopa borregojme cati tomahuaque huan inijuanti cati cocoxquetzitz. ²¹ Pampa anisraelitame cati quipiyaj chicahualisti, cati anitztoque quej borregojme tomahuaque quintonpojhuiáj huan quincuatopehuaj nopa borregojme cati mococohuaj huan cati cocoxquetzitz. Huan anquinchihualtijoque ma mosemanaca huan ma yaca huejca. ²² Huajca na noseltitzni niquinmanahuis noborregojhua huan quej nopa ayecmo huetzise inimaco tecuanime. Huan ayecmo aqui noja quincocos huan quinichequis. Huan niqintajtolsencahuas noborregojhua huan niquipijcatalis cati tomahuaque huan mosisiníaj huan cati cocoxquetzitz huan quinchihuilíaj cati amo cuali. ²³ Huan nijtal is se tamocuitahuijquet cati elis notequipanojca David para quinmocuitahuis noborregojhua. Yaya quintamacas nomasehualhua huan elis inintamocuitahuijca. ²⁴ Huan na, niDIOS nielis niininTeco huan nijtal is notequipanojca David para elis inintanahuatijca. Quej nopa na, niDIOS niquipijtohua.

²⁵ “Huan nijsencahuas se camanali ica inijuanti para quipiyase tasehuilisti. Huan niquinijcuenis

nochi tecuanime ipan nochis nopa tali. Quej nopa nochis nomasehualhua itztose ica temachili ipan nopa tepeme campa amo aquijme masehualme. Huan cochise ipan nopa cuatitamit huan amo majmahuise.

²⁶ “Huan niquintiochihuas nochis nomasehualhua huan inihuicalhua cati itztose yahualtic notepe cati tatzejzeloltic. Huan nijchihuas ma huetzi at quema monequi. Huan nijchihuas ma huetzi tatiochihualisti quej elisquia at ipan nomasehualhua. ²⁷ Huan nochis cuame ipan cuamili temacase inintajca. Huan inimilhua temacase miyac pixquisti. Huan noisraelita masehualhua itztose ica temachili ipan ten inijuanti inintal. Huan quema ya niquinmanahuijtos ten inintaijyohuilis huan ten inintecohua ipan sequinoc talme cati quinhuihuiitayayaj, quimachilise para na, niDIOS. ²⁸ Ayecmo quintachtequilise cati ehuani ipan sequinoc talme huan ayecmo huetzise inimaco tecuanime. Itztose temachti huan ayecmo aqui quintemajmatis.

²⁹ “Huan nijchihuas para nochis quiixmatise tali Israel por nopa yejectzi tzonti cati nopona moscaltia. Huan quej nopa nomasehualhua ayecmo quipanose mayanti, yon ayecmo quinpinahaultise sequinoc talme cati fiero ininemilis. ³⁰ Huan huajca nopa israelitame quimachilise para na niDIOS Cati Más Nijpiya Tanahuatili. Huan quimatise para na niitztoc inihuaya huan inijuanti nomasehualhua. Quej nopa na, niinTECO Cati Más Nijpiya Tanahuatili, niquijtohua. ³¹ Quena, amojuanti annoborregojhua cati anitz-

toque ipan noprero. Annomasehualhua huan na niitztoc niamOTECO. Quej nopa na, niDIOS Cati Más Nijpiya Tanahuatili, niquijtohua.”

35

Tatzacuiltli para altepet Seir

¹ TOTECO nechcamanalhui huan techilhui:
² “Tacat, xitachiya ipan tali Edom campa tepet Seir huan xiquinyolmelahua nopa masehualme nopona taya ininpantis. ³ Xiquinilhui para na, niDIOS Cati Más Nijpiya Tanahuatili, niquijtohua: ‘Na nimochijtoc niamocualancaitaca huan nijtananas nomax para nimechtatzacultis huan nijcahuas amotal quej se huactoc tali campa amo aquijme masehualme. ⁴ Niquinsosolos nochí amoaltepehua huan nijchihuas amotal ma eli quej se huactoc tali. Huan anquimachilise para na, niDIOS.

⁵ “ ‘Pampa anEdom ehuani, nochipa anquin-cualancaitztoque israelitame. Huan anquinte-huiyayaj quema na niquintatzacultiyaya por nochí inintajtacolhua huan ayecmo quipiyayayaj fuerza. ⁶ Yeca ama na, niDIOS Cati Más Nijpiya Tanahuatili, nimechilhuía para temachti nijtoyahuas amoese pampa amo anmajmahuiyayaj anquitoyahuase inieso sequinoc. Huan ama amech-tocaros amojuanti para anmiquise. ⁷ Nochi tepet Seir nijchihuas quej se huactoc tali. Nimecht-zontamiltis nochí amojuanti cati nopona anehuani huan niquinmictis nochí cati quinequise panose nopona. ⁸ Nijchihuas ma temica nochí tepeme, tachiquilme, tamayame huan hueyame

ipan amotal ica mijcatzitzi cati miquise ica macheta ipan tatehuilisti. ⁹ Huan ayecmo quema motananas amotal. Mocahuas quej se huactoc tali para nochipa. Ayecmo aqui quincualchijchihuas amoaltepehua, yon ayecmo aqui itztos npona. Huan anquimachilise para na, niDIOS.

¹⁰ “ ‘Nijchihuas pampa amojuanti ipan tali Edom anquijtojque: Nopa tali Israel huan nopa tali Judá elise toaxcahua. Quena, timoaxcatise masque DIOS itztoc npona. Quej nopa anquijtojque. ¹¹ Pero na, niDIOS Cati Más Nijpiya Tanahutili, niquijtohua para temachti nimechcuepilis pampa anquincualancaque israelitame huan anquijxtocaque cati quipiyayaj. Huajca anquimatise para nimechtatzacuiltía por cati anquinchihuilijque. ¹² Huan anquimachilise para melahuac na, niDIOS, nijcajqui nochí nopa fiero camanali cati anquijtojque ten nopa tepeme cati onca ipan tali Israel. Anquijtojque tasosolijtoc ipan nopa altepeme huan para eltoque quej se tacualisti para anquincuase huan para anmoaxcatise. ¹³ Quena, anmohueyimatque ica amocamac huan antechtaijilhuijtoque ica camanali cati fiero huan na nijcajqui nochí cati anquijtojque.

¹⁴ “ Quej ni na, niDIOS Cati Más Nijpiya Tanahutili, niquijtohua: Na nijchihuas amotal sosolijtoc huan nochí talme ipan taltipacti paquise quema quiitase cati nimechchihuilis. ¹⁵ Pampa amojuanti anhuetzcaque quema quitamisosolojque inintal nopa israelitame. Pero ama ya ajsic hora para na nojquiya nihuetcas quema nijtamisosolos nochí amotal. Quena, nimechtamiixpolihuiltis nochí amojuanti ipan altepet Seir huan nochí

cati itztoque ipan tali Edom. Huan huajca anquimachilise para na, niDIOS.'

36

Tali Israel sempa motananas teipa

¹ "Tacat, xitachiya ica campa nopa tepeme ten tali Israel huan xiquinyolmelhua israelitame ten ininpantis nopa tepeme. Xiquijto: 'Xijtacaquilica Icamanal TOTECO.' ² Huan xiquinilhui para na, niininTECO Cati Más Nijpiya Tanahuatili, niquijtohua: Nochi amocualancaitacahua, anisraelitame, mohueyimajtoque huan quijtojtoque para nochi nopa huejhueyi tepeme cati nochipa eltoyaj, ama iniaxcahua. ³ Huajca tacat, xiquinyolmelhua israelitame ni camanali ica notequiticayo huan xiquinilhui para quej ni na, niininTECO Cati Más Quipiya Tanahuatili, niquijtohua: 'Quema amocualancaitacahua ipan sequinoc talme hualajque huan quitamisosolojque campa hueli ipan amotal huan amechhuicaque anisraelitame ipan sequinoc talme para xitetequipanotij san tapic, nochi sequinoc talme ehuani amechpinajtijque huan ten hueli amechilhuijque. ⁴ Huajca xijtacaquilica nocamanal na, niamoTECO Cati Más Nijpiya Tanahuatili. Xijtacaquilica cati niquijtohua ten nochi tepeme, tachiquilme, tepeme, taixtemolis, hueyame, tamayame, talme huan altepeme ipan tali Israel cati quinsosolojque huan cati quinpinahualtijque nopa sequinoc talme. ⁵ Quej ni na, niamoTECO Cati Más Nijpiya Tanahuatili, niquijtohua: Tahuel nicualantoc ica nochi nopa talme cati amechyahualojoque, anisraelitame. Pero

achi más nicualantoc ica tali Edom ehuani pampa inijuanti moaxcatijque natal ica noch i ininchicahualis huan ica paquilsti para quisosolojque huan quitachtequilijque.'

⁶ "Huajca, tacat, xiquinyolmelahua israelitame por na cati niquistohua ten nopa tepeme, tachiquilme, hueyame huan tamayame ten tali Israel. Xiquinilhui para quej ni na, niamotECO Cati Más Nijpiya Tanahuatili, niquistohua: 'Nelía nicualantoc ica masehualme ten miyac talme pampa tahuel quinpinahualtijtoque nopa tepeme. ⁷ Yeca na, niamotECO Cati Más Nijpiya Tanahuatili, niquistohua para temachtli nopa talme cati amechyahualohuaj ica noch i cati nepa ehuani nojquiya huetzise ipan pinahualisti. ⁸ Pero nopa tepeme ten tali Israel sempa quinpiyase miyac cuame ica miyac inimacuayohua. Huan temacase miyac inintajca para ica mopanoltise nomasehualhua pampa nechcatitoc para sempa mocuepase nomasehualhua ipan inintal. ⁹ Na niitztoc para niquinpalehuis nopa tepeme. Huan nijchihuas masehualme ma quicualtalica nopa tali, huan tatojtose huan quimocuitahuise cati quitoque nopona. ¹⁰ Huan nijchihuas para tahuel ma momiyaquilica nopa israelitame cati itztoque nopona ipan tali Israel. Nochi nopa altepeme cati tasosololme sempa quincualtalise huan temise ica masehualme. ¹¹ Pero amo san niquinmiyaquilis masehualme. Nojquiya tahuel niquinmiyaquilis nopa borregojme huan huacaxme. Quej nopa, nopa tepeme ten tali Israel sempa temise ica familias huan quipiyase más riconjot que achtohuiya. Huan huajca,

anisraelitame, anquimatise para na niamoTECO. ¹² Huan nijchihuas para noisraelita masehualhua sempa ma nejnemica ipan nopa tepeme. Huan nopa tepeme sempa elise iniaxcahua huan nopa tali ayecmo quema quincahuilis iconehua ma mayancamiquica pampa amo quipiya itajca.

¹³ “ ‘Na, ni amoTECO Cati Más Nijpiya Tanahuatili, niquijtohua: Melahuac achtohui sequinoc talme ehuani quijtohuayaya j para nopa tali Israel quinchihuayaya ma miquica imasehualhua ica mayanti. ¹⁴ Pero ama nopa tali quipiyas itajca cati yejyectzi huan ayecmo quincahuilis imasehualhua ma mayancamiquica, yon quinmictis iconehua pampa amo quipiya itajca. Quej nopa na, ni amoTECO Cati Más Nijpiya Tanahuatili, niquijtohua. ¹⁵ Huan ayecmo aqui quicaquis sinte sequinoc talme ehuani quintaijilhuise israelitame huan quinpinajtise. Ayecmo mocahuas Israel quej se tali cati amo quinpiya iconehua, yon imasehualhua. Quej nopa na, ni amoTECO Cati Más Nijpiya Tanahuatili, niquijtohua.’ ”

¹⁶ Teipa TOTECO sempa nechcamanalhui huan techilhui: ¹⁷ “Tacat, quema nopa israelitame itztoyaj ipan inintal, quichijque amo tapajpactic nopa tali noixpa ica miyac tamanti cati amo cuali quichihuayaya j. Nopa tamanti cati injuanti quichijque niquitayaya para nelfiero quej se yoyomit espoltic cati amo nijnequi niquitas. ¹⁸ Huajca na niquinnextili nopa israelitame nohueyi cualancayo pampa tahuel temictijque ipan inintal huan quinhueyichijque teteyome. ¹⁹ Yeca niquintitanqui ipan miyac talme para ma itztotij

quej seyoc tali ehuani. Quej nopa niqintatza-culti por nochí nopa fiero tamanti catí inijuanti quichijtoyaj. ²⁰ Pero campa hueli campa ajsique nomasehualhua, nopa tali ehuani techtaijilhui-jque na catí nitatzejzeloltic, pampa quijtojque: ‘Ya ni imasehualhua DIOS pero monejqui quisase ten inintal pampa amo huelqui quinmocuitahui cuali.’ ²¹ Huajca nelía nimocueso pampa mase-hualme ipan sesen tali ipan taltipacti campa ajsitoj nomasehualhua techtaijilhuiyayaj na catí nitatzejzeloltic por inijuanti.

²² “Yeca ama xiquincamanalhui israelitame huan xiquinilhui para quej ni na, niinintECO Cati Más Nijpiya Tanahuatili, niquijtohua: ‘Na sempa nimechhualicas ipan amotal, pero amo nijchihuas por amojuanti. Nijchihuas para ma ayecmo techtaijilhuica na catí nitatzejzeloltic. Pampa quema anitztoque ipan sequinoc talme, anquichijtoque ma techtaijilhuica masehualme catí nopona itztoque. ²³ Na nijnextis para nelía nihueyi huan nitatzejzeloltic masque amojuanti anquichijtoque ma techtaijilhuica ipan nochí talme. Huan nochí masehualme ipan taltipacti quimachilise para na, niDIOS quema nimechquixtis ten campa inijuanti huan nijnextis para nitatzejzeloltic por amojuanti. Quej nopa na, niamotECO Cati Más Nijpiya Tanahuatili, niquijtohua. ²⁴ Pampa na nimechquixtis anisraelitame huan nimechsentilis ten nochí nopa talme huan sempa nimechhualicas ipan amotal.

²⁵ “ ‘Huan nimechpajpacas ica at catí senquisa cuali huan nimechpajpacas ten nochí tamanti catí

ica ammosoquihuijtoque huan nimechtapajpac-chihuas ten nopa teteyome cati anquinhueyichi-huayayaj. ²⁶ Huan nimechmacas se amoyolo cati yancuic huan nijtalis ipan amojuanti se tonaltzi cati yancuic. Huan nimechquixtilis amoyolo cati tetic quej se tet cati quipactía tajtacolchihuas huan nimechmacas seyoc amoyolo cati yamanic para techneltucas. ²⁷ Huan nijtalis notonaltzi ipan amojuanti para anquitepanitase notanahuatilhua huan anquichihuase nochi cati na nimechilhuis.

²⁸ “Huan anitztose ipan nopa tali Israel cati na niquinmacac amohuejcapan tatahua. Huan amojuanti anelise annomasehualhua huan na nielis niamTECO. ²⁹ Na nimechmocuitahuis ten nochi tamanti cati huelis amechsoquihuis. Huan nijchihuas nopa trigo para ma temaca miyac pixquisti huan ayecmo nimechcahuilis xijpanoca mayanti. ³⁰ Nojquiya nijchihuas para nopa cuame ma temacase miyac intintajca huan amomilhua ma temacaca miyac pixquisti. Huan cati ehuani ipan nopa tali cati amechyahualojtoque ayecmo huelis amechpinajtise pampa ayecmo anquipanose mayanti. ³¹ Huan quema anquielnamiquise nochi amotajtacolhua cati anquichijque huecjajquiya, amojijiyase amoselti por nochi nopa tamanti cati amo cuali cati anquichijque. ³² Pero nochipa xiquelnamiquica para ni tamanti amo nijchihuas pampa quinamiqui anquiselise tatiochihualisti. Quinamiqui anisraelitame xipinahuaca por nochi nopa tamanti cati amo cuali cati anquichijtoque. Quej nopa na, niamTECO Cati Más Nijpiya Tanahuatili, niquijtohua.

³³ “ ‘Na, niamoTECO Cati Más Nijpiya Tanahu-
atili, niquijtohua: Quema nimechtapajpacchi-
huas ten nochi amotajtacolhua, sempa nimech-
hualicas ipan tali Israel huan nimechcahuilis an-
itztose ipan amoaltepehua. Huan nochi tamanti
cati ama eltoc tasosololi sempa anquincualtalise.
³⁴ Huan nochi mili cati elqui quej huactoc tali
huan elqui nelía sosolijtoc hasta cati panoyayaj
ama huelque quineltocase, ipan nopa mili sempa
antatojtocase. ³⁵ Huan quema sempa niquin-
hualicas israelitame ipan inintal, nochi sequinoc
masehualme quijtose: Ni tali cati quitahuelcaj-
toyaj huan mocajtoya quej se huactoc tali, ama
mochijtoc quej nopa xochimili Edén. Huan nopa
altepeme cati quintamisosolojtoyaj; ama sempa
quincualtajtoque. Huan quinyahualojoque ica
tepamit huan temitoque ica masehualme. ³⁶ Huan
huajca nochi nopa talme cati noja mocahuaj
yahaultic ten amojuanti, quimatise para na, ni-
amoTECO, nijcualtalía cati eltoya tasosololi. Huan
niquintoca cuame ipan nopa tali cati mocajtoya
quej huactoc tali. Na niamoTECO nijtencahua
para nijchihuas ya ni huan temachti nijchihuas.

³⁷ “ ‘Na, niamoTECO, niquijtohua: Ya niitztoc
para niquintacaquilis israelitame quema motata-
jtise huan techtajtanise ma niquinmaca nochi
ni tatiochihualisti. Quena, ya niitztoc para
niquinmacas cati techtajtanise. Huan niquin-
miyaquilis israelitame cati itztoque ipan nopa tali
quej momiyaquilíaj borregojme. ³⁸ Itztose tahuel
miyac israelitame ipan altepeme ipan Israel quej
quema temi nopa calles ipan Jerusalén ica miyac
borregojme para tacajcahualisti ipan nopa tonali

ten ilhuit. Huan nopa altepeme cati mocajtoyaj tasosololme sempa temise ica masehualme. Huan nochi quimatise para na ni amoTECO.’ ”

37

Nopa omime cati huactoque

¹ Huan TOTECO quitali imax ipan na huan Itonal techhuicac huan techtali ipan se tamayamit cati temitoya ica miyac omit cati huactoc. ² Huan yaya techyacanqui para ma nipano tatajco huan niquitac para oncayaya tahuel miyac omime ipan nopa tamayamit. Huan nochi nopa omime eliyayaj senquisa huactoque. ³ Huajca yaya techtatzintoquili: “Tacat, ¿timoilhuía para ni omime sempa huelise mocuepase masehualme cati yoltoque?”

Huan na niquilhui: “Toteco, san ta tijmati sinta noja huelise itztose o amo.”

⁴ Huajca Toteco techilhui: “Xiquincamanalhui nopa omime huan xiquinilhui taya ininpantis. Xiquinilhui: ‘Anomime cati anhuactoque, xijta-caquilica icamanal TOTECO.’ ⁵ Xiquinilhui para na, niDIOS Cati Más Nijpiya Tanahuatili, niquinilhuía nopa omime: ‘Na nijchihuas antaijyotilanase huan nijchihuas para sempa anmocuepase anyoltoque. ⁶ Nimechtlialis amotalijcho, huan nijchihuas para sempa anquipiyase amonacayo huan sempa nimechtzacuas ica amocuetaxo. Huan nimechtlialis amoijiyo para xitaijyotilanaca huan xijpiyaca nemilisti. Huan huajca anquimachilise para niDIOS.’ ”

⁷ Huajca na, niEzequiel, niquincamanalhui nopa omime senquisa quej Toteco technahuatijtoya ma nijchihua. Huan quema noja nicamanaltiyaya, pejqui tacaquisti quej mocacapatzayaya ipan nochi nopa tamayamit. Nochi nopa tali mojmoliniyaya huan nopa omime ten sesen mijcatzi pejque mosejcotilíaj se ica seyoc senquisa quej eliyayaj achtohuiya.
⁸ Huan niquitac para ipan inijuanti motaliyaya inintalijcho, ininacayo huan inincuetaxo. Pero noja amo quipiyayabaj nemilsti.

⁹ Huajca TOTECO techilhui: “Xijnotza nopa tonaltzi cati temaca nemilsti huan xiquilhui para na, niDIOS, niquijtohua: ‘Tonaltzi, xihuala ten nopa nahui lados huan xiquinilpitza ni mijcatzitzti para sempa ma quipiyaca nemilsti.’ ”

¹⁰ Huajca na nijnotzqui nopa tonaltzi senquisa quej TOTECO technahuatijtoya. Huan nopa tonaltzi hualajqui huan calajqui ipan inintacayo nopa mijcatzitzti. Huan nopa mijcatzitzti mocuetque yoltoque huan moquetzque ica iniicxihua. Huan elque tahuel miyaqui inijuanti quej se pamit ten soldados cati tahuel hueyi.

¹¹ Teipa TOTECO techpohuili taya quiijtosnequi nopa tanextili. Techilhui: “Ni omime quinixnextíaj nopa israelitame. Pampa inijuanti quiijtohuaj: ‘Nochi tojuanti tiitztoque quej se tamontomit ten omime cati huactoque. Ayecmo temachti para tiitztose huan san tipolijtoque.’ ”

¹² Huajca ama xiquinilhui para quej ni na, niDIOS Cati Más Nijpiya Tanahuatili, niquijtohua: ‘Annomasehualhua, na nijmati para eltoc quej antalpachijtoque nopona ipan sequinoc talme.

Pero nijtapos amoosto, huan nimechquixtis ten nopa talme campa anitztoque huan sempa nimechhualicas ipan tali Israel. ¹³ Huan quema nijtapos amoosto huan nimechquixtis, huajca anquimachilise para na, niDIOS. ¹⁴ Na nijtal is noTonal ipan amoyolo huan anquipiyase nemilisti huan sempa nimechhuicas ipan amotal. Huan huajca anquimachilise para na, niDIOS. Huan para nochí cati niquipojtoc para nijchihuas, ya nijchijqui. Quej nopa na, niamoTECO, niquipojtocua.’ ”

Tali Judá huan tali Israel sempa mosejcotilise

¹⁵ Huan TOTECO sempa nechcamanalhui huan techilhui: ¹⁶ “Tacat, xijcui se cuahuit quej para tit huan ipani xiquicuilo ni camanali: ‘Cuahuit cati quiixnextía tali Judá huan nopa familias ten israelitame cati itztoyaj nopona.’ Teipa xijcui seyoc cuahuit huan ipani xiquicuilo ni camanali: ‘Cuahuit cati quiixnextía nopa hueyi familia ten José, Efraín huan nochí nopa sequinoc familias cati itztoyaj ica norte ipan tali Israel.’ ¹⁷ Teipa ipan momax xiquinsejcotili huan xiquinitzqui quej elisquía san se cuahuit. ¹⁸ Huan quema nopa israelitame mitztatzintoquilise taya quijitosnequi ya nopa, ¹⁹ xiquinilhui para quej ni na, niin-TECO Cati Más Nijpiya Tanahuatili, niquipojtocua: ‘Na nijcuis nopa hueyi familia José, Efraín huan nochí nopa sequinoc huejhueyi familias cati itztoque ipan tali Israel ica norte; huan niquinsejcotilis inihuaya nopa familias cati itztoque ipan tali Judá ica sur. Huan inijuanti elise quej setzi

cuahuit ipan nomax.' ²⁰ Pero quema tiquinilhuis ya ni, monequi tijpixtos momaco nopa ome cuame cati ininpani titajcuilojtoc para huelise quiitase ten tijchihuas.

²¹ "Teipa xiquinilhui para quej ni na, niininTECO Cati Más Nijpiya Tanahuatili, niquijtohua: 'Na niyas huan niquinquixtis israelitame cati itztoque ipan campa hueli talme ipan nochitaltipacti huan niquinhualicas ipan inintal. ²² Huan nopona niquinsejcotilis para elise setzi tanahuatijcayot ipan nopa tali huan ipan nopa tepeme ten tali Israel. Huan oncas setzi tanahuatijquet cati quinnahuatis nochini injuanti. Ayecmo quema motajcoxelose para mochihuase ome talme, yon ayecmo oncas ome tanahuatiani. ²³ Nojquiya ayecmo momahuispolose ica teteyome huan taixcopincayome huan ica sequinoc tamanti tajtacoli. Ayecmo moicancuepase ica na pampa na niquinmaquixtis ten nochini tamanti cati amo cuali cati ica techixpanoche huan niquintapajpacchihuas. Huan injuanti elise nomasehualhua huan na nielis niiniDios.

²⁴ " 'Huan notequipanojca David elis inintanahuatijca huan san quipiyase se intamocuitahuijca. Huan injuanti quitepanitase notanahuatilhua huan quichihuase cati niquinilhuía. ²⁵ Huan nomasehualhua itztose ipan nopa tali campa huejcajquiya itztoyaj inihuejcapan tatahua cati nijmacac notequipanojca Jacob. Huan injuanti huan ininconebla huan iniixhuihua nopona itztose para nochipa. Huan notequipanojca David elis inintayacanca para nochipa. ²⁶ Huan

nijchihuas se camanal sencahuali inihuaya cati quinilhuis para temachti quipiyase tasehuilisti ipan inintal. Huan nopa camanali mocahuas para nochipa. Quena, na niqquintalis ipan nopa tali huan niquinmiyaquilis. Huan nijtalnis notiopa tatajco inijuanti para nochipa. ²⁷ Huan nopona nimochantis huan niitztos tatajco inijuanti, huan na nielis niiniDios huan inijuanti elise nomasehualhua. ²⁸ Huan quema ya nijtalijtos notiopa tatajco inijuanti para nochipa, nochi tali ehuani quimachilise para na, niDIOS, niqquintapejpenijtoc israelitame huan niquiniyocatalijtoc para elise noaxcahua.’ ”

38

TOTECO quitequihuis Gog

- ¹ TOTECO nechcamanalhui huan techilhui:
- ² “Tacat, xitachiya ica norte campa tali Magog huan xijcamanalhui Gog cati quinnahuatía Mesec huan Tubal huan xiquilhui taya ipantis.
- ³ Ica notequiticayo xiquilhui para quej ni na, niDIOS Cati Más Nijpiya Tanahuatili, niquipijtohua: ‘Gog, ta cati tijnahuatía tali Mesec huan Tubal, na nimochijtoc nimocualancaitaca.
- ⁴ Na nimitzcuepas huan nimitzquixtis ten motal huan nimitztalilis tepos chijcoli ipan mocamachal huan nimitzhualicas ta huan nochi mosoldados, huan nopa cahuayojme cati ininpa tejcotoque. Nochi inijuanti quihuicase inimacheta, inintepos para ica tatehuise huan inintepostzajca cati ica quimanahuise intacayo.
- ⁵ Nojquiya nopa soldados ten tali Persia, Etiopía huan Libia yase mohuaya

ica inintepostzajcahua cati ica quimanahuise inintacayo huan inintepostzontzajca para quimanahuise inintzonteco. ⁶ Nojquiya yase mohuaya nopa soldados cati tahuel mosisiníaj ten tali Gomer huan nopa soldados ten tali Togarma cati mocahua ica norte. Huan sequinoc talme nojquiya yase mohuaya.

⁷ “ Huajca ximocualtali huan xiquincualtali mosoldados huan nochí inisoldados nopa talme cati mitzyahualojoque huan ta xiquinyacana. ⁸ Huan quema panos miyac xihuit, nimitznahuatlis para xijtehui tali Israel cati nochipa mopantiyaya ipan tatehuilisti, pero ama ya eltoc ica cuali. Tiquintehuis nopa masehualme cati mosemantoyaj ipan miyac talme campa hueli, pero ama sempa mosejcotilijoque ipan inintal huan itztoque ica paquilsti. Huan tiquintehuis ipan nopa tepeme ten tali Israel. ⁹ Quena, ta tihuales ica nochí nopa miyac soldados cati itztoque mohuaya ten sequinoc talme, soldados cati tahuel mosisiníaj. Huan nochí amojuanti anhualase quej se hueyi ajacat huan anquixtzacuase nopa tali quej se mixti.

¹⁰ “ Na, niDIOS Cati Más Nijpiya Tanahuatili, niquijtohua para ipan nopa tonali, pehuas timoyolilhuis miyac tamanti cati fiero. Huan tijnequis tijchihuas miyac tamanti cati amo cuali. ¹¹ Huan tiquijtos: Israel itztoc se tali cati amo quimati quenicatza momanahuis. Imasehualhua itztoque ica paquilsti huan inialtepehua amo moyahualojoque ica tepamit. Nochí tapojtoque. Huajca na nijtehuiti huan niquintasosolhuilis nopa masehualme cati itztoque ica temachili.

¹² Niyas ipan nopa altepeme cati achtohuiya el-toyaj tasosololme pero ama sempa quitemitij-toque nopa masehualme cati mocuectoque ten sequinoc talme. Niquinichequilis miyac tamanti pampa nopa masehualme ama neltahuel moricochijtoque ica tapiyalme. Huan intital eltoc tatajco ten nochi tanamacalisti ten ni taltipacti. Quej nopa tiquijtos. ¹³ Pero nopa masehualme ten tali Sabá huan Dedán, huan nochi tanamacani ten Tarsis, mitzilhuise: ¿Para ten titachtequiti huan timoaxcatis nopa plata, oro huan tapiyalme cati quipiyaj huan tiquincahuas san inimax? ¿Ajquiya ta para tijchihuas ya nopa?

¹⁴ “Huajca ama, tacat, xijcamanalhui Gog huan xiquilhui taya ipantis. Xiquilhui para quej ni na, niDIOS Cati Más Nijpiya Tanahuatili, niquijtohua: ‘Ipan nopa tonali quema noisraelita masehualhua itztose ipan tasehuilisti ipan intital, ta tijmatis huan nimantzi ximocualtali. ¹⁵ Huan nimantzi xiquisa ten campa tiitztoc ipan nopa tali ica norte huan xiquinhualica nochi nopa miyac soldados cati nelía quipiyaj chicahualisti huan nochi nopa cahuayojme. Huan xiquintehuiqui noisraelita masehualhua. ¹⁶ Huan tiquintehuis nomasehualhua quej se hueyi ajacat. Huan nochi nopa miyac soldados cati tahuel quipiyaj chicahualisti quitzacuase nopa tali Israel quej elisquía se hueyi mixti. Pero ya ni amo panos hasta teipa, ipan itamiya tonali. Na nimitzhualicas ipan notal quema nochi masehualme quitachilijtose huan nijnextis notatzejtzelolhui iniixpa nomasehualhua pampa nimitztzontamiltis, Gog, ica nochi nochicahualis. Quema panos nochi ya ni, niquinnextilis nochi tali

ehuani para nitatzejzeloltic por cati nijchihua ica ta.

17 “ ‘Na, niDIOS Cati Más Nijpiya Tanahuatili, niquijtohua: Huejcajquiya nicamanaltic ten ta, Gog, ica noisraelita tajtolpanextijcahua. Nitay-olmelajqui para se tonali na nijchihuasquía xihuala xiquintehuiqui noisraelita masehualhua.’

Tatzacuiltyli para Gog

18 “Pero na, niDios Cati Más Nijpiya Tanahuatili, niquijtohua: Quema tihualas, Gog, tihualas para tijtehuis tali Israel, tahuel nicualanis ica ta. **19** Nimitzilhuis para temachti nicualanis miyac. Huan ipan nopa tonali nijchihuas ma mojmolini tahuel chicahuac nopa tali Israel. **20** Huan nochimichime cati itztoque ipan hueyi at, nochimotome, tecuanime, cohuame huan masehualme huihuipicase noixpa ica miyac majmajti. Nochi tepeme huelonise, huan teme ipan tepexit momimilose huan nochimepamit huelonise hasta talchi. **21** Huan na, niDIOS Cati Más Nijpiya Tanahuatili, nijchihuas para campa hueli ipan tali Israel mitztehuise ica macheta. Huan mosoldados pehuase para momictise se ica seyoc ica macheta pampa tahuel momajmatise huan amo quimatise taya onca. **22** Nimitztatzacuiltyli ica cocolisti, ta huan nochimosoldados huan nochimacheta amechpalehuíaj. Nojquiya tahuel miyac mosoldados miquise ica macheta ipan tatehuilisti. Nijchihuas amopani ma huetzi at cati tahuel chicahuac, huan huetzis tesihuit. Huan huetzis tit huan azufre. **23** Huan quej nopa nijnextis iniixpa miyac talme para nelia nihueyi huan nitatzejzeloltic. Huan nochim

tali ipan taltipacti quimatisé cati nijchijtoc huan quimachilise para na niininTECO israelitame.

39

TOTECO quitanis Gog huan isoldados

¹ “Huajca, tacat, xijcamanalhui Gog ica na note-quiticayo huan xiquilhui para na, niDIOS, niquijtohua: ‘Gog, ta cati tijnahuatía tali Mesec huan Tubal, na nimochijtoc nimocualancaitaca. ² Na nimitzquixtis ten nopa tali cati mocahua ica norte huan nimitzhuicas ipan nopa tepeme ipan tali Israel para xiquintehuiti. ³ Teipa nimitzquixtilis nopa cuahuitoli cati tijhuica ipan momaarraves huan nijchihuas ma tepehui nopa cuataminti cati tijhuica ipan momanejmat. ⁴ Huan ta, huan mosoldados huan nochí nopa masehualme cati mitzpalehuíaj, miquise ipan nopa tepeme ten tali Israel. Nopona nimechtemactilis ica nopa tzopilome huan tecuanime para ma amechcuaca. ⁵ Anhuetzise ipan campa hueli cuatitamit pampa amo nimechcahuilis anajsitij ipan nopa altepeme. Quej nopa na, niDIOS Cati Más Nijpiya Tanahu-tili, niquijtojtoc. ⁶ Huan nijchihuas ma huetzi tit ipan tali Magog huan ininpa nochí amohuam-poyohua cati itztoque cuali ipan nopa talme cati mopantíaj iteno hueyi at. Huan huajca anquimachilise para na, niDIOS.

⁷ “ ‘Huan quej nopa, nochí noisraelita masehualhua techixmatise huan quimatisé para nitatzejzeloltic. Huan ayecmo niquincahuilis ma techtaijilhuica. Huan nochí nopa sequinoc talme quimatisé para na, niDIOS Cati Nitatzejzeloltic

huan niitztoc inihuaya israelitame. ⁸ Nochi ya ni melahuac panos pampa monechcahuía nopa tonali ten tatzacuiltili cati ya nimitzpo huilijtoc. Quej nopa na, niDIOS Cati Más Nijpiya Tanahuatili, niquijtohua.'

⁹ "Huan nochi nopa masehualme cati itztoque ipan nopa altepeme ten tali Israel quisase huan quitatise nochi tamanti cati ica tatehuiyaj, tamanti cati huejhueyi huan cati pisiltitzi cati ica quitzacuayayaj inintacayo. Quitatise cuahuitoli huan cuataminti, huan huejhuehueyac cuataminti para ica tatehuise huan cototzitzi. Huan nopa israelitame quipiyase cuahuit hasta mocahua para quitatise ipan ininti para chicome xi-huit. ¹⁰ Huan quej nopa ayecmo monequis yase ipan cuatitamit para quicuitij cuahuit para quitatise, yon ayecmo quitzontequise cuame ipan tepeme pampa nochi nopa tamanti cati ica tatehuiyaj quinpalehuis miyac para quipiyase ten ica tipitzase. Huan quej nopa, nopa israelitame quitequihuise nopa tamanti cati iniaxca nopa tacame cati hualajque para quintachtequilisquíaj. Quej nopa na, niDIOS Cati Más Nijpiya Tanahuatili, niquijtohua.

Imiquilis Tanahuatijquet Gog

¹¹ "Ipan nopa tonali, na nijmacas Gog se lugar ipan tali Israel campa huelis quintalpachose isoldados huan nojquiya nopona quitalpachose ya. Itoca nopa lugar elis: Nopa Tamayamit Campa Panoj Paxalohuani, huan mocahuas ica campa hualquisa tonati ten nopa Mictoc Hueyi At. Huan nopa campo santo quitzacuas ojti para

paxalohuani ayecmo huelis panose nopona. Yeca
 nopa lugar quipatase itoca huan quitocaxtise:
 Tamayamit Campa Quintalpachojoque Itatehui-
 jcahua Pamit Gog. ¹² Nopa israelitame tequitise
 chicome metzti para quintalpachose nochi nopa
 mijcatzitz huan para quitapajpacchihuase nopa
 tali. ¹³ Huan nochi israelitame tapalehuise ipan
 nopa tequit. Huan ipan nopa tonali quema ni-
 njextis nohueyitis elis se hueyi paquilisti para
 inijuanti pampa ya tatantose. Quej nopa na, niin-
 inTECO Cati Más Nijpiya Tanahuatili, niquijtohua.
¹⁴ Huan quema tamis nopa chicome metzti, quin-
 tapejpenise tacame huan quintitanise ma yaca
 ipan nochi nopa tali para quitalpachose iniomiy
 nopa mijcatzitz cati noja tepejtoque talchi. Huan
 quej nopa quitapajpacchihuase nopa tali. ¹⁵ Huan
 quema inijuanti quipantise tepejtoc se ome omit,
 quitalise nopona se tanextili. Huan quej nopa,
 quema nopa masehualme cati tetalpachohuaj aj-
 sisse nopona, quiitase nopa tanextili huan qui-
 huicase nopa omit huan quitalpachose ipan nopa
 Tamayamit Campa Quintalpachojoque Itatehui-
 jcahua Pamit Gog. ¹⁶ Huan nopona nechca nopa
 campo santo eltos se altepet cati quitocaxtise:
 Tatehuiani. Huan quej nopa quitapajpacchihuase
 nopa tali.”

¹⁷ Huan TOTECO techilhui: “Tacat, quej ni na,
 niDIOS Cati Más Nijpiya Tanahuatili, niquijtohua:
 Xiquinnotza nochi tamanti totome huan nochi
 tamanti tecuanime cati itztoque cuatita. Huan
 xiquinilhui ma mosentilica huan ma hualaca ipan
 nopa hueyi tacajcahualisti cati nijchihuas para
 inijuanti. Elis se hueyi tacualisti ipan nopa te-

peme ten tali Israel. Huan huelis hualase huan quicuase nacat huan quiise esti. ¹⁸ Ma quicuaquij ininacayo huan ma quiiquij inieso soldados huan huejhueyi tanahuatiani ten ni taltipacti quej elisquia ininacayo oquich borregojme, pilborregojtzitzi, oquich chivojme, huacaxme huan torojme cati tomahuaque quej cati itztoque ipan tali Basán. ¹⁹ Quema niquinmictis nochí nopa masehualme quej tacajcahualisti, nopa totome huan tecuanime ma quicuaquij nacat hasta cuali ixhuise huan ma quiiquij esti hasta moihuintise. ²⁰ Ma monechcahuica campa nopa mesa huan tacuase tahuel miyac ipan ni ilhuit cati nijcualtalijtoc para inijuanti. Quicuaquij ininacayo cahuayojme huan cati tejcoj cahuajtipa. Huan quicuaquij ininacayo nopa huejhueyi tatehuiani cati más mosemacayayaj. Quej nopa na, niDIOS Cati Más Nijpiya Tanahuatili, niquijtohua.

Tali Israel sempa motananas teipa

²¹ “Huan quej nopa, nijnextis nohueyitilis iniixta masehualme cati ehuani ipan nochí talme. Huan nochí inijuanti quiitase quenicatzá nijtequihui nochicahualis para niquintatzacuiltis masehualme quema ya niquintajtolsencajtoya por cati amo cuali quichijque. ²² Huan ipan nopa tonali huan teipa, israelitame quimachilise para na, niDIOS niininTeco. ²³ Huan nochí talme ehuani quimachilise para niquinquixti nopa israelitame ten intal por intintajtacolhua. Quena, tahuel techixpanoyayaj nopa israelitame huan yeca niquintahuelcajqui. Huan niquincahuili inincualancaitacahua

ma quintanica huan ma quintzontamiltica ipan tatehuilisti. ²⁴ Na niquintatzacuilty quej quinamiqui pampa fiero inintajtacolhua. Inijuanti mosisinijque ica na huan yeca nimoicancuetqui ica inijuanti.

²⁵ “Pero ama na, niininTECO Cati Más Nijpiya Tanahuatili, niquijtohua: Ama niquintasojtas iix-huihua Jacob * huan sempa niquinhualicas noisraelita masehualhua ten campa quinhuicatoque ipan miyac talme. Sempa niquinhualicas ipan inintal pampa nijnequi nochi ma techtepanitaca na cati nitatzejzeloltic. ²⁶ Quema nopa israelitame sempa itztose ipan inintal huan itztose ica yejyectzi huan ica temachili, ayecmo teno quinmajmatis. Huan huajca quielcahuase ininpinahualis huan nochi inintajtacolhua cati ica techixpanoche. ²⁷ Quej nopa elis quema na niquinquixtis ten inintal inincualancaitacahua huan sempa niquinhualicas ipan inintal. Huan quema nijchihuas ya nopa, masehualme cati ehuani nochi talme quitase para nitatzejzeloltic. ²⁸ Huan nomasehualhua quimatise para na, ni-DIOS niininTeco niquintitanqui ipan sequinoc talme huan na cati niquinsentili sempa ipan inintal. Huan amo nijcajtehuas yon se masehuali ipan nopa talme campa itztoyaj quej seyoc tali ehuani. ²⁹ Huan ayecmo quema nimoicancuepas ica noisraelita masehualhua pampa nijtalis no-Tonal ipan inijuanti. Quej nopa na, niininTECO Cati Más Nijpiya Tanahuatili, niquijtohua.”

* ^{39:25} 39:25 O Israel.

40

Tanextili ten nopa tiopamit cati oncas teipa

¹ Ipan 10 itequi nopa achtohui metzti ipan toxihui ipan toisraelita calendario * quema yahuiyaya 25 xihuit para quinhuicatoyaj israelitame ipan sequinoc talme huan quipiyayaya 14 xihuit para quitantoyaj huan moaxcatijtoyaj altepet Jerusalén, TOTECO quitali imax ipan na. ² Huan ipan se tanextili techhuicac ipan tali Israel huan techquetzqui ipan se huejcapantic tepet. Huan ica tatzinta ten nopa tepet niquitac miyac calme cati nesiyaya quej se hueyi altepet. ³ Huan teipa techhuicac nopona campa nopa altepet huan niquitac se tacat cati petaniyaya ixayac quej nopa teposti cati itoca bronce. Huan nopa tacat moquetztoya campa icalteyo nopa tepamit, huan ipan imax quipiyayaya se lazo cati tachijchihuali ica lino hilo huan se vara cati quitequihuíaj para tatamachihuaj.

⁴ Huan nopa tacat techilhui: “Tacat, xitachixto huan xitacacto. Cuali xijtachili nochí tamanti cati nimitznextilis pampa TOTECO mitzhualicatoc nica para ma nimitznextili miyac tamanti. Pero teipa monequi sempa timocuepas campa nopa israelitame ipan Babilonia huan tiquinpohuiliti nochí cati tiquistzoc.”

Nopa caltemit ica campa hualquisa tonati

⁵ Huan nopa tiopamit quipixtoya se tepamit cati quiyahualojtoya. Huan nopa teposbarra cati

* **40:1** 40:1 Ipan 28 itequi abril ipan 573 a.C. ipan tocalendario ten ama.

nopa tacat quipixtoya imaco quipiryayaya 3 metros ihuehueyaca. Huan yaya pejqui quitamachihuia nopa tepamit. Huan quipixqui 3 metros itilajca huan 3 metros ihuejcapanca.

6 Teipa hualajqui campa nopa caltemit ica campa hualquisa tonati para ticalaquise ipan tiopamit. Huan yaya tejcoc ipan nopa escalera cati quipiryayaya 7 escalones para ajsis campa nopa caltemit huan quitamachijqui itamapayo nopa caltemit huan quipixqui 3 metros ipatajca. **7** Teipa tinejnentiyajque ipan nopa pasillo, huan ipan sesen lado niquitac onca 3 cuartos para tamocuitahuiani. Sesen ten nopa cuarto quipiryayaya 3 metros ihuehueyaca huan 3 metros ipatajca. Huan tatajco ten sesen ome cuarto ipan nopa pasillo eltoya se tapepecholi ten 2 metro huan tajco. Huan ipan itamiya nopa pasillo eltoya seyoc cuarto quej se sala ica se caltemit cati motapohua huan nopa caltemit quipiryayaya 3 metros ihuehueyaca. Nopa caltemit tapojtoya para huelqui niquitac nopa tiopamit. **8-9** Huan yaya nojquiya quitamachijqui nopa sala cati tapojtoc huan huelqui niquitac nopa tiopamit. Huan elqui 4 metros huan ya nopa elqui itamiya nopa pasillo para calaquise ipan tiopamit. Huan quipixqui ome itaquetzalhua ica nahui esquinas huan sesen quipixqui 1 metro itilajca. **10** (Huan quej niquijto achtohuiya, ipan nopa pasillo quipixqui 3 cuartos ipan sesen lado huan nochí elqui san se inihuexca. Huan nopa taquetzalme ica nahui esquinas cati moquetzque ipan sesen lado elqui san se inihuexca.) **11** Huan nopa tacat quitamachijqui campa calaquij ipan nopa caltemit huan

quipixqui 5 metros ipatajca huan 6 metros huan tajco ihuehueyaca. ¹² Huan iixmelac sesen ten nopa cuarto para tamocuitahuiani oncayaya se piltepantzi cati quipiyayaya 52 centímetros ihuejcapanca huan 52 centímetros ipatajca. Huan sesen cuarto quipixqui eyi metro ihuehueyaca huan ipatajca.

¹³ Teipa yaya quitamachijqui quesqui metros ipatajca nochí nopa pasillo huan cuartos campa calaquij. Quitamachijqui ten icalteyo campa calaquij ipan nopa cuartos para tamocuitahuiani ipan se lado hasta icalteyo nopa cuartos para tamocuitahuiani ipan seyoc lado huan quipixqui 12 metros huan tajco. ¹⁴ Teipa quitamachijqui nopa sala huan quipixqui 10 metros. Huan nopa sala quipixqui icaltehua cati tapojqui ipan nochí lados para nopa calixpamit cati quiyahualojtoya. ¹⁵ Huan nopa pasillo ten nopa caltemit campa calaquij hasta campa más calijtic quipixqui 25 metros ihuehueyaca. ¹⁶ Huan ipan nochí lados ten nopa cuartos para tamocuitahuiani huan nopa taquetzalme huan ipan nopa tepancalme oncayaya ventanas cati eltoya ipan nopa pasillo. Huan nopa ventanas quipixqui teposbarras para calijtic. Nojquiya oncayaya ventanas ipan sesen lado ten nopa sala ica calijtic. Huan sesen taquetzali ica nahui esquinas quiyectalijtoyaj ica iixcopinca epachi cuahuit.

Nopa calixpamit cati calteno

¹⁷ Teipa nopa tacat techhuicac para tipanose ipan nopa calixpamit cati mocahua calteno ten

nopa tiopamit. Huan nopona quipixqui se tesohuali yahualtic nopa calixpamit huan nojquiya niquitac 30 cuartos cati tatzquitoque ipan nopa tepamit huan motapohuayayaj ipan nopa tesohuali.¹⁸ Ni tesohuali tatzquitoya calijtic ipan nopa tepamit cati más calteno huan elqui más tatzinta ten nopa tiopamit. Huan nopa tesohuali quipixqui san se ipatajca quej ihueyaca nopa pasillos para nopa caltemit.¹⁹ Teipa nopa tacat quitamachijqui nopa calixpamit ten nopa caltemit ica tatzinta ipan nopa tepamit huan cati más calteno. Huan quitamachijqui hasta nopa caltemit cati calaqui ipan nopa pasillo para nopa calixpamit cati calijtic. Huan quipixqui 50 metros ica norte huan ica campa hualquisa tonati.

Nopa caltemit ica norte

²⁰ Teipa quitamachijqui ipatajca huan ihuehueyaca nopa pasillo campa calaquij ica norte ten nopa calixpamit cati calteno.²¹ Huan ipan sesen lado ten nopa pasillo nojquiya oncayaya eyi cuartos para tamocuitahuiani huan tapepecholi tatajco ten nopa cuartos. Huan quipixqui se sala ica arcos huan taquetzalme ica nahui esquinas. Huan eliyaya san se inihuexca quej cati oncayaya ipan nopa achtohui pasillo ica nopa caltemit cati eltoya ten campa hualquisa tonati. Huan nopa pasillo quipixqui 25 metros ihuehueyaca huan 12 metros huan tajco ipatajca.²² Nopa ventanas, nopa sala ica arcos huan nopa taixcopinti ten epachi cuame eliyaya san se ica nopa pasillo ten nopa caltemit ten tiopamit cati mocahua ica campa hualquisa

tonati hasta calixpamit cati calteno. Ten calixpamit calteno nojquiya oncayaya se escalera cati quipiyayaya 7 escalones cati ajsiyaya ipan nopa pasillo para calaquis campa nopa calixpamit cati calijtic. Huan nopa sala ica arcos mocajqui campa tanqui nopa pasillo ica más calijtic. ²³ Huan nica ipan ni lado norte quipixqui seyoc caltemit para calaquise ipan nopa calixpamit cati calijtic nechca nopa tiopamit. Huan nopa caltemit elqui iixmelac nopa caltemit cati más calteno. Huan quitamachijqui 50 metros tatajco nopa ome caltemit. Huan san se eliyaya ica nopa caltemit ica campa hualquisa tonati.

Nopa caltemit ica sur

²⁴ Teipa nopa tacat techhuicac ica sur campa nopa pasillo huan nopa caltemit ica sur. Huan quitamachijqui nopa pasillo huan nochí nopa cuartos nopona huan quiitac para quipiyayaya j san se inihuejhuexca quej nopa sequinoc. ²⁵ Campa calaquit huan campa sala quipiyayaya ventanas ipan nochí lados huan ipan nochí nopa tapepecholi huan nochí elqui quej cati nopa sequinoc pasillos quipiyayaya j. Huan nopa pasillo, quej nopa sequinoc, quipiyayaya 25 metros ihuehueyaca huan 12 metros huan tajco ipatajca. ²⁶ Huan para calaquise ipan ni caltemit huan pasillo monequi tejcose ipan se escalera cati quipiyayaya 7 escalones. Huan iixmelac campa calaquit quipixqui nopa sala. Huan quipixqui taquetzalme ica nahui esquinas ipan nopa sala huan quinixcopintoyaj epachi cuame. ²⁷ Huan nopa calixpamit cati calijtic nojquiya quipixqui

se caltemit huan se pasillo cati tachiyayaya ica sur. Huan nopa tacat quitamachijqui quesqui ihuejcaca quipiya nopa calixpamit ten se caltemit ipan se pasillo hasta seyoc huan quiitac para quipiyayaya 50 metros.

Nopa calixpamit calijtic huan nopa caltemit ica sur

²⁸ Teipa nopa tacat techhuicac campa nopa caltemit ica sur cati panoc campa nopa pasillo hasta nopa calixpamit cati calijtic. Huan quitamachijqui nopa pasillo cati mocajqui ica sur huan quiitac para quipiyayaya san se ihuejhuxca quej nopa sequinoc. ²⁹ Nochi nopa cuartos para tamocuitahuiani, huan nopa tapepecholi tatajco nopa cuartos huan nopa sala ica arcos elque san se inihuejhuxca quej sequinoc pasillos. Huan campa calaquij huan ipan nochi tapepecholi oncayaya ventanas huan nojquiya oncayaya ipan nopa sala ica arcos. Huan quej nopa sequinoc, nopa pasillo quipiyayaya 25 metros ihuehueyaca huan 12 metros huan tajco ipatajca. ³⁰ Huan quitamachijqui nopa sala ica arcos cati tapohuiyaya ipan nopa calixpamit cati calijtic huan quipixqui 12 metros ihuehueyaca huan 2 metros huan tajco ipatajca. ³¹ Nopa sala ica arcos tapojtoya hasta nopa calixpamit cati eltoya calteno. Huan nopa sala quipixqui taquetzalme ica nahui esquinas cati quinfectalijtoyaj ica iixcopinca epachi cuame. Huan nopa escalera cati ipan tejose para nopa pasillo quipiyayaya 8 escalones.

Nopa calixpamit calijtic huan nopa caltemit campa hualquisa tonati

³² Teipa nopa tacat techhuicac ipan nopa calixpamit cati calijtic huan ticalajque ipan nopa pasillo huan caltemit ica campa hualquisa tonati. Huan quitamachijqui nopa pasillo huan quiitac para quipiyayaya san se ihuexca quej nopa sequinoc. ³³ Nochi icuartos para tamocuitahuiani, huan nopa tapepecholi cati tatajco nopa cuartos huan nopa sala ica arcos eliyaya san se inihuexca quej cati quipixque sequinoc pasillos. Huan nopa caltemit huan sala quipiyayaya ventanas ipan nochl lados quej nopa sequinoc pasillos huan quipiyayaya 25 metros ihuehueyaca huan 12 metros huan tajco ipatajca. ³⁴ Nopa sala ica arcos tapojqui ipan nopa calixpamit cati calteno. Huan sesen lado itaquetzalhua cati quipixque nahui esquinas quinyectalijtoyaj ica iixcopinca epachi cuame. Huan nopa escalera cati ipan tejcose ipan nopa pasillo quipiyayaya 8 escalones.

Nopa calixpamit calijtic huan nopa caltemit ica norte

³⁵ Teipa nopa tacat techhuicac hasta nopa caltemit ica norte ica ipasillo cati yahui ipan nopa calixpamit cati calijtic. Huan quitamachijqui nopa pasillo huan quiitac para quipiyayaya san se ihuexca quej nopa sequinoc. ³⁶ Nojquiya quipixqui nopa cuartos para tamocuitahuiani, huan nopa tapepecholi cati tatajco nopa cuartos huan nopa sala ica arcos. Huan quipixqui ventanas yahualtic nopa cuartos. Huan quitamachijqui huan quipiyayaya 25 metros ihuehueyaca huan 12 metros huan tajco ipatajca. ³⁷ Huan nopa sala ica arcos ipan nopa pasillo tapojqui ipan nopa calixpamit cati calteno. Huan nopa taquetzalme

ica nahui esquinas quipiyayaj epachi cuame ipan sesen lado huan nopa escalera para ipan tejcose para calaquine quipiyayaya 8 escalones.

Nopa calme para quipajpacase tacajcahualisti

³⁸ Huan oncac se cuarto cati tapojqui ipan nopa sala ipan nopa pasillo ipan sesen caltemit. Nopona ipan nopa cuarto quipajpacayayaj nochí nopa nacat ten tapiyalme cati teipa temacayayaj quej tacajcahualisti tatatili. ³⁹ Huan ipan nopa sala ipan sesen caltemit huan pasillo oncayaya nahui mesas. Ome ipan sesen lado. Nopona ipan nopa mesas quinmictiyayaj nopa tapiyalme cati quintencahuayayaj quej tacajcahualisti tatatili, tacajcahualisti para tajtacoli huan tacajcahualisti para cati quimajtoc tajtacoli. ⁴⁰ Nojquiya oncayaya nahui mesas ica calixpa ten nopa sala huan pasillo. Eltoya nopona campa tejcoj para calaquine ipan nopa caltemit ica norte. Oncayaya ome ipan sesen lado ten nopa escaleras cati ipan tejcoj para calaquine ipan nopa pasillo. ⁴¹ Para nochí oncayaya chicueyi mesas; nahui mesas ica calijtic ipan nopa sala huan nahui mesas ipan nopa calixpamit cati calteno. Ni mesas quitequihuiyayaj para ipan quinmictise nopa tapiyalme. ⁴² Para nopa tacajcahualisti tatatili quipixqui nahui mesas cati tachijchihuali ica tet para ipan quinmictise. Ni mesas quipiyayaj 75 centímetros inihuehueyaca, 75 centímetros ininpatajca huan 50 centímetros inihuejcapanca. Huan ipan ni mesas quitaliyayaj nopa cuchillos, huan nochí tamanti cati quitequihuiyayaj para quinmictise nopa tapiyalme para tacajcahualisti

tatatili huan sequinoc tamanti tacajcahualisti.
43 Huan calijtic ipan nopa cuarto quipiyayaya
 tepos chijcoli cati quipiyayaya 7 centímetros ini-
 huehueyaca tatzquitoque ipan nopa tapepecholi.
 Huan quitaliyayaj nopa nacat para tacajcahualisti
 ipan nopa mesas.

44 Ipan nopa calixpamit cati mocahua calijtic,
 pero calteno nopa caltemit para calaquise ipan
 tiopamit, oncayaya ome cuartos. Se cuarto moc-
 ahuayaya ipan se lado ten nopa pasillo para nopa
 caltemit ica norte huan ni cuarto tachiyayaya ica
 sur. Huan nopa seyoc cuarto mocahuayaya ipan
 se lado ten nopa pasillo para nopa caltemit ica sur
 huan tachiyayaya ica norte.

45 Huan nopa tacat techilhui: “Ni cuarto cati
 tachiya ica sur elis para nopa totajtzitzi cati
 tequipanohuaj ipan tiopamit. **46** Huan nopa
 cuarto cati tachiya ica norte elis para nopa
 totajtzitzi cati iixhuihua Sadoc cati tequipanose
 campa nopa taixpamit pampa san inijuanti
 ten nochí nopa levitame quipiyase tanahuatili
 para monechcahuise campa TOTECO para
 quitequipanose.”

Nopa calixpamit calijtic huan nopa tiopamit

47 Teipa nopa tacat quitamachijqui nopa
 calixpamit cati mocahua calijtic, huan quipixqui
 50 metros ihuehueyaca huan 50 metros ipatajca.
 Huan ipan nopa calixpamit iixmelac nopa
 tiopamit oncayaya nopa taixpamit. **48** Teipa
 techhualicac ipan nopa sala campa calaquij
 ipan nopa tiopamit. Huan quitamachijqui
 nopa taquetzalme cati nopona onca huan

quipanti para quipiyayaya 2 metros huan tajco inintilajca. Huan ipatajca nopa caltemit campa sala quipiyayaya 7 metros ipatajca huan nopa tepamit cati eltoya ipan sesen lado quipiyayaya se metro huan tajco itilajca. ⁴⁹ Nopa sala campa calaquij quipiyayaya 10 metros ipatajca huan 6 metros ihuehueyaca. Huan quipixtoya se escalera ten nopa calixpamit cati mocahua calijtic hasta nopa sala para calaquise ipan tiopamit huan quipiyayaya 10 escalones. Huan quipixqui se ten nopa taquetzalme ipan sesen lado.

41

¹ Teipa techhuicac ipan nopa cuarto Campa Tatzejzeloltic cati mocahua tatajco ipan tiopamit huan elqui nopa cuarto cati más hueyi. Huan quitamachijqui nochí nopa ome taquetzalme ica 4 esquinas campa calaquij huan ininpatajca huan inintilajca eliyaya 3 metros. ² Nopa campa calaquij quipiyayaya 5 metros ipatajca huan nopa tepamit ipan sesen lado quipiyayaya 2 metros huan tajco ipatajca. Huan nopa cuarto cati más hueyi ipan nopa tiopamit cati itoca Campa Tatzejzeloltic quipixqui 20 metros ihuehueyaca huan 10 metros ipatajca.

³ Teipa nopa tacat iseltitzi yajqui ipan nopa cuarto cati mocahua más calijtic. Huan quintamachijqui nopa taquetzalme campa calaquij. Huan quipixque se metro ininpatajca huan se metro inintilajca. Huan nopa caltemit campa calaquij quipixqui 3 metros ipatajca. Huan nopa tepame ipan sesen lado ten campa calaquij ipan

nopa cuarto quipiyayaya 3 metros huan tajco intilajca. ⁴ Teipa yaya quitamachijqui nopa cuarto más calijtic huan quipiyayaya 10 metros ipatajca huan 10 metros ihuehueyaca. Huan techilhui: “Ya ni Campa Más Tatzejzeloltic.”

Nopa pamit ten cuartos cati quiyahualojtoya tiopamit

⁵ Teipa quitamachijqui nopa tepamit cati quiyahualojtoya tiopamit huan quipiyayaya eyi metros itilajca. Huan ica calijtic ten nopa tepamit oncayaya se pamit ten cuartos cati quiyahualojtoya nopa tiopamit huan sesen quipiyayaya ome metro ihuejcaca. ⁶ Ni pilcuartojtzitzi motecpantoyaj se ipan seyoc huan mochijque eyi pisos ten pilcuartojtzitzi huan oncayaya 30 pilcuartojtzitzi ipan sesen piso. Nopa pisos huejcapa ipan nochí lados ten nopa tiopamit mosehuijtoyaj ipan cuatetomit cati mosehuijtoyaj ipan se itencuayo nopa tepamit, pero nopa cuatetomit cati ipan mosehuijtoyaj nopa cuartos amo calaquiyyaj ipan nopa tepamit cati quiyahualojtoya nopa tiopamit. ⁷ Nopa sesen piso cati huejcapa eliyaya achi más patahuac que nopa piso cati mocahua tatzinta. Quej nopa eliyaya pampa nopa piso achi más mocahuayaya nechca ten nopa tepamit cati quiyahualojtoya nopa tiopamit. Huan nopa tepamit mochijqui más pitzaactzi ica sesen piso ten cuartos para nopa cuatetomit ipan ma mosehuis nopa itencuayo tepamit. Huan oncayaya se escalera cati panoc ipan nopa ompa piso hasta nopa expa piso.

⁸ Niquitac para nopa tiopamit motatzquilijtoya ipan se tepejpechti cati tilahuac huan quipiyayaya eyi metro ihuejcapanca, huan elqui patahuac huan nopa pilcuartojojtzitzi cati tatzinta nojquiya mosehui ipani. ⁹ Nopa tepamit cati mocahuayaya ica calteno ten ni pilcuartojojtzitzi quipiyayaya ome metro huan tajco itilajca. Huan tatajco se lado nopa tiopamit, ¹⁰ huan nopa pilcuartojojtzitzi cati quitequihuijque totajtzitzi cati quiyahualojtoya nopa tiopamit mocajque se lugar cati amo teno quipixqui huan eliyaya 10 metros ipatajca cati quiyahualojtoya nopa tiopamit. ¹¹ Huan hueli se calaquis ipan nopa pilcuartojojtzitzi ica sur ten nopa lugar cati amo teno quipixqui ipan se caltemit cati mocajqui ica sur ten nopa pilcuartojojtzitzi. Huan hueli se calaquis ipan nopa pilcuartojojtzitzi ica norte ten nopa lugar cati amo teno quipixqui ipan se caltemit cati mocajqui ica norte ten nopa pilcuartojojtzitzi. Huan ipatajca nopa lugar cati amo teno quipixqui cati quiyahualo nopa pilcuartojojtzitzi elqui ome metro huan tajco.

Nopa hueyi cali ica campa oncalaque tonati

¹² Nojquiya oncayaya se hueyi cali ica nopa lado campa oncalaque tonati huan quipiyayaya 35 metros ipatajca huan 45 metros ihuehueyaca. Nopa tepamit ten nopa cali quipiyayaya 2 metros huan tajco itilajca. Huan nopa cuarto tachiyayaya iica tiopamit huan nopa cuarto quipixqui se calix-pamit cati tzactoc.

Ihuexca nochí nopa tiopamit

¹³ Teipa nopa tacat quitamachijqui nopa tiopamit calteno huan quipixqui 50 metros

ihuehueyaca. Huan ten iica nopa tiopamit quitamachijqui nopa calixpamit nopona cati tzactoc huan nopa hueyi cuarto ica itepa huan quipixqui seyoc 50 metros ihuehueyaca. ¹⁴ Huan ipatajca campa calaquij ipan tiopamit ica nopa calixpamit ica campa hualquisa tonati cati mocajqui iixpa nopa tiopamit nojquiya quipiyayaya 50 metros. ¹⁵ Huan teipa quitamachijqui ihuehueyaca nopa hueyi cali cati eltoc iica tiopamit ica campa oncalaque tonati ica nopa galerías ipan sesen lado huan nojquiya quipiyayaya 50 metros.

Huan nopa cuarto Campa Tatzejzeloltic huan nopa seyoc Campa Más Tatzejzeloltic, nochí quincualtalijtoyaj nopa tapepecholi ica huapali. ¹⁶ Nojquiya nopa salas ica arcos huan ventanas huan nopa pilcuartojtzitzi ica eyi pisos quincualtalijtoyaj ica huapali ten tatzinta hasta huejcapa campa ventanas. ¹⁷ Huan itzonatipa nopa caltemit campa calauiyayaj tiopan calijtic huan ipan nochí tapepecholi ipan tiopa quitzajque calijtic huan calteno ica huapalme. ¹⁸ Huan ipan nochí nopa huapalme ipan tapepecholi quinixcopintoyaj miyac iilhuicac ejcahua TOTECO cati inintoca querubines huan tatajco ten nochí querubines, quiixcopintoyaj se epachi cuahuit. Huan nopa querubines quipixque ome inixayac. ¹⁹ Ipan se lado quipiyayaj inixayac quej se tacat ixayac huan quitachiliyayaj nopa epachi cuahuit cati eltoya ipan ni lado. Huan ipan nopa seyoc lado quipiyayaj inixayac quej se león ixayac huan quitachiliyayaj nopa epachi cuahuit cati eltoya

ipan nopa seyoc lado. ²⁰ Huan quinixcopintoyaj nopa querubines ipan nochí tapepecholi calijtic ten nopa piso hasta itzompac nopa caltemit. Nojquiya quej nopa quichijque ipan nopa tapepecholi calteno ipan nopa cuarto Campa Más Tatzejzeloltic.

Nopa taixpamit cati tachijchihuali ica huapalme

²¹ Campa calaquij ipan nopa tiopamit quipixqui ome taquetzalme ica nahui esquinas huan nojquiya iixpa nopa cuarto Cati Tatzejzeloltic oncayaya ome taquetzalme cati nesiyaya san se. ²² Huan nopona oncayaya se taixpamit cati tachijchihuali ica huapalme huan quipiyayaya se metro ipatajca huan ihuehueyaca huan se metro huan tajco ihuejcapanca. Nochi iesquinas huan ielchiquitipa huan iicxi eliyaya tachijchihuali ica huapalme. Huan nopa tacat techilhui: “Ya ni nopa mesa cati eltoc iixpa TOTECO.”

Nopa calteme

²³ Nopa cuarto Campa Tatzejzeloltic huan nopa cuarto Campa Más Tatzejzeloltic quipiyayaya ome caltemit cati monamiquiyayaj para huelis motapose tatajco. ²⁴ Huan sesen caltemit quipiyayaya ome huapali cati mohuilpachojque se ipan seyoc. ²⁵ Huan ipan nopa caltemit campa calaquiyayaj ipan nopa cuarto Campa Más Tatzejzeloltic quinixcopintoyaj ilhuicac ejcahua TOTECO cati inintoca querubines huan epachi cuahuit san se quej quichijtoyaj ipan nochí nopa tecalme. Huan campa onca nopa tamapamit campa calaquij ipan tiopamit oncayaya huejcapa

se itzontzajca cati tachijchihuali ica huapali.
²⁶ Ipan nochí ome lados ten nopa tamapamit oncayaya ventanas cati calactoyaj ipan nopa tepancalme. Huan quinixcopintoyaj nopa tecalme ica apachij cuame. Huan quej nopa nojquiya elqui nopa cuartos huan nopa salas.

42

Nopa calme nechca tiopamit

¹ Teipa nopa tacat techhuicac ten nopa tiopamit ipan nopa pasillo huan caltemit ica norte huan tiyajque ipan nopa calixpamit cati calteno cati quiyahualojtoya nopa tiopamit. Huan tiyajque campa sequij cuartos cati mocahuaj ica nopa lado norte ten nopa tiopamit. Huan nojquiya mocahua ica norte ten nopa calixpamit cati tzacctoc cati iixpa nopa hueyi cali cati eltoc iica tiopamit. ² Huan ni lado campa ni cuartos quipiyayaya 50 metros ihuehueyaca huan 25 metros ipatajca. Huan inincaltenhua nopa cuartos motapoique ica norte. ³ Sequij ten nopa cuartos tachiyayaya imelac nopa calixpamit cati quiyahualojtoya tiopamit huan nopona campa iquespa tiopamit quipiyayaya 10 metros ipatajca. Huan nopa sequinoc cuartos tachiyayaya imelac nopa tamapamit ten nopa calixpamit cati más calteno. Nochi nopa ome pamit ten cuartos quipiyayayaj eyi pisos. Huan eltoya ipan sesen lado ten se pasillo ipan nopa pasillo tatzinta. ⁴ Iixpa nopa pilcuartojtitzitzi, oncayaya se pasillo cati quipiyayaya 5 metros ipatajca huan 50 metros ihuehueyaca. Huan nochí caltemit ipan ni

cuartos tachiyayabaj ica norte. ⁵ Nopa cuartos ipan nopa ome pisos cati más huejcapa eliyabaj más pitzahuac quej cati tatzinta pampa monequi quipiyas icaltenteno campa nejnemise para aj-sise campa nopa cuartos. ⁶ Pampa nopa pamit ten cuartos quipiyayabaj eyi pisos, pero amo quipiyayabaj taquetzalme huan cuatetomit quej nopa pilcuartojtzitzti cati mocahuayabaj campa nopa tamayamit cati calixpa. Yeca nopa pisos cati huejcapa amo eliyabaj pajpatahuac quej nopa pisos cati tatzinta.

⁷⁻⁸ Nopa pamit ten ni cuartos cati mocahuaj más nechca tiopamit quipiyayabaj 50 metros ihuehueyaca. Huan nopa pamit ten cuartos cati más calteno san quipixqui 25 metros ihuehueyaca. Pero oncayaya se tepamit ten 25 metros ihuehueyaca cati quichijqui más huehueyac nopa lado cati más calteno, huan quiyyocatali campa cuartos huan nopa calixpamit cati mocahua calteno. ⁹ Huan ten nopa calixpamit oncayaya se caltemit para calaquise ipan ni pamit ten cuartos cati más ica campa hualquisa tonati.

¹⁰ Huan ipan nopa seyoc lado ten nopa tiopamit ica sur, oncayaya ome pamit ten cuartos cati elque san se ica cati mocahua ica norte. ¹¹ Nojquiya oncayaya se pasillo iniixpa nopa cuartos huan eliyaya san se ica nopa pasillo cati oncayaya iniixpa nopa cuartos cati mocahuayabaj ica norte. Huan inihuehueyaca, ininpatajca huan inincaltehua, nochí eliyaya san se ica nopa sequinoc. ¹² Huan oncac se caltemit para calaquise ipan nopa cuartos cati tatzinta cati tachiyayaya ica sur huan elqui iixpa nopa tepamit cati tachiyayaya

para campa hualquisa tonati nopona ica iica
campa pejque nopa pasillos.

¹³ Huan nopa tacat techilhui: “Nochi nopa cuartos cati mocahuaj ica norte huan ica sur cati nechca nopa tamayamit ipan iquespa nopa tiopamit elij tatzejzeloltique. Nopa totajtzitzi cati quitencahuaj tacajcahualisti para TOTECO, nopona quicuase nopa tacajcahualisti cati tahuel tatzejzeloltic. Huan nojquiya nopona quiajocuise nopa tacajcahualisti ten harina, tacajcahualisti para tajtacoli, huan tacajcahualisti para cati quimajtoc tajtacoli, pampa nopa cuartos eltoque tatzejzeloltique.

¹⁴ Quema nopa totajtzitzi quisase ten nopa cuarto Campa Más Tatzejzeloltic, amo hueli yase xitahuac ipan nopa calixpamit cati más calteno. Achtohui monequi quipatase iniyoyo cati ica quitequipanohuaj Toteco pampa nopa yoyomit eli tatzejzeloltique. Yeca monequi quipatase iniyoyo huan quicahuase cati tatzejzeloltic ipan ni cuartos huan moquentise seyoc iniyoyo para huelise yase más calteno ipan nopa calixpamit campa nejnemi cati hueli masehuali.”

¹⁵ Teipa quema nopa tacat ya tanto ya tatamachihua ica calijitic ipan nopa tiopamit, techhuicac campa nopa pasillo huan caltemit cati mocahua ica campa hualquisa tonati hasta nopa calixpamit cati más calteno huan pejqui quitamachihua yahualtic nopa tiopamit ica nochicuertos huan calixpamit huan iteno itepa cati más calteno. ¹⁶ Huan yaya quitamachijqui nopa lado cati más calteno ica campa hualquisa tonati huan quipixqui 250 metros. ¹⁷ Huan ica norte

nojquiya quipixqui 250 metros. ¹⁸ Huan ica sur nojquiya quipixqui 250 metros. ¹⁹ Huan ica campa oncalaqui tonati nojquiya quipixqui 250 metros. ²⁰ Huajca quipixqui 250 metros ihuehueyaca huan ipatajca huan se tepamit quiyahualojoya para quiiyocatalis ni lugar cati tatzejzelotic para TOTECO ica nopa tali cati eltoc para cati hueli masehuali.

43

Itatanex TOTECO sempa motali ipan nopa tiopamit

¹ Teipa nopa tacat sempa techhualicac ipan nopa caltemit huan pasillo cati mocahua ica campa hualquisa tonati. ² Huan niquitac ica campa hualquisa tonati hualayaya itatanex Toteco Dios ten tiisraelitame. Huan caquistiyaya chicahuac quej mocojcoxonía nopa hueyi at, huan nochí nopa tali taahui ica itatanex Toteco. ³ Ni tanextili eliyaya san se ica nopa tanextili cati niquitac quema Toteco hualajqui huan quisosoloco altepet Jerusalén. Huan nojquiya san se ica nopa tanextili cati niquitac iteno hueyat Quebar. Huan nimotancuaquetzqui huan nimixtapacho. ⁴ Huan itatanex TOTECO calajqui ipan nopa tiopamit ipan nopa caltemit cati mocahua ica campa hualquisa tonati.

⁵ Teipa Itonal TOTECO techtanqui huan techhuicac ipan nopa calixpamit cati mocahua calijtic. Huan itatanex TOTECO quitemiti nopa tiopamit. ⁶ Huan nijcrajqui se cati techtzajtzili calijtic ten

nopa tiopamit, huan nopa tacat cati tatamachi-huayaya, moquetztoya nohuaya. ⁷ Huan elqui TOTECO cati techtzajtzili huan techilhui: “Tacat, ya ni eltoc campa nimosehuis para nitanahuatis. Nica campa nijtalis noicxi para nijsiyajquetzas. Nica niitztos para nochipa inihuaya noisraelita masehualhua. Inijuanti huan inintanahuatijcahua ayecmo quema techmahuispolose na cati nitatzejzeloltic. Pampa nopona ipan nopa tepeme cati más huejcapantique ayecmo quinhueyichi-huase teteyome, yon ayecmo quitepanitase taixcopincayome ten fiero tanahuatiani cati ya mic-toque. ⁸ Inijuanti quichijchijque inintaixpa para teteyome nechca campa na notiopa ica se pil-tepantzti cati motajcotaliyaya ten na notiopa ica inijuanti inintiopa huan nopona quinhueyichi-huayayaj teteyome. Yeca na niquintzontamilti ica nohueyi cualancayo pampa quichijtoque amo tapajpactic notoca, na cati nitatzejzeloltic ica noch tamanti cati amo cuali. ⁹ Pero ama ma quinhuejcamajcahuaca ininteteyohua huan nopa taixcopincayome ten inintanahuatijcahua, huan na niitztos tatajco ten inijuanti para nochipa.

¹⁰ “Huan ta, tacat, xiquinpo huiliti nopa israeli-tame noch cati nimitznextilijtoc ten quenicatza eli nopa tiopamit. Huan xiquinilhuiti quenicatza itachiyalis huan quenicatza ihuexca para ma pinahuaca por noch inintajtacolhua. ¹¹ Huan sintia inijuanti nelía pinahuase por noch cati quichijtoque, huajca teipa xiquinpo huili sesen piltamantzitzti ten quenicatza eltos tachijchihuali nopa tiopamit. Nojquiya xiquinpo huili ten ical-tehua huan nopa pasillos campa calaquise huan

quisase. Huan xiquinpoihuili ten nochí tamanti cati nopona oncas. Huan xiquijcuilo nochí ni tatamachihuali huan nochí nopa camanali huan tanahuatili para quenicatza ma quichi-huaca. ¹² Huan ya ni elis nopa tanahuatili cati más hueyi ten nopa tiopamit: ‘Nochí nopa tepet campa eltoc nopa tiopamit elis tatzejzeloltic.’ ”

Nopa taixpamit

¹³ Huan ya ni nopa taixpamit itamachijca cati technextili. Huan nopa tatamachihuali elqui san se quej quitequihuijtoya ipan nopa taixpamit ten tiopamit. Huan yahualtic itzinpehualtil quipixqui se itencuayo cati quipixqui tajco metro ihuejcapanca. Tatajco mocahuayaya cactoc quej se aojti cati quipiyayaya tajco metro ipatajca huan tajco metro ihuejcatanca. Iteno quipixqui seyoc itencuayo cati quipixqui 25 centímetros. ¹⁴ Huan ten nopa itencuayo hasta más huejcapa campa quipixqui seyoc itencuayo elqui 1 metro pero polihuiyaya tajco metro ipan sesen lado para elis san se ipatajca huan ihuehueyaca quej nopa parte cati mocahua tatzinta. ¹⁵ Huan teipa nopa taixpamit tejcoc 2 metros más huejcapa, pero polihuiyaya tajco metro ipan sesen lado para elis san se ipatajca huan ihuehueyaca quej nopa parte cati itantita. Huan nica iixpa elqui campa quitatise tacajcahualisti huan nopa taixpamit quipixqui se icuacua ipan sesen ten nopa nahui esquinas. ¹⁶ Huan iixpa nopa taixpamit campa quitatise tacajcahualisti elqui nopa parte más huejcapa. Huan quipixqui 6 metros ipatajca huan ihuehueyaca. Huan itencuayo quipixqui se tajco metro

ipan nochí lados. ¹⁷ Huan nopa ompa parte cati elqui itantita iixco nopa taixpamit quipixqui 7 metros ipatajca huan ihuehueyaca. Huan itencuayo quipixqui se tajco metro ipan nochí lados. Huan nopa escalera para ipan tejcose para huelis quitalise se tacajcahualisti iixco nopa taixpamit eltoya ica campa hualquisa tonati.

¹⁸ Teipa Toteco techilhui: “Tacat, quej ni na, ni amoTECO Cati Más Nijpiya Tanahuatili, niquijtohua: Ipan nopa tonali teipa quema ajsis hora para quichihuase nopa taixpamit huan para nopona quitatise tacajcahualisti huan quitoyahua esti, ya ni nopa tanahuatilme cati monequi ma quitoquilica. ¹⁹ San nopa tacame cati iixhuihua Sadoc cati hualajqui ipan nopa hueyi familia ten Leví huejcajquiya huelis elise nototajtzitzi huan monechcahuise campa na para techtequipanose. Quej nopa na, ni amoTECO Cati Más Nijpiya Tanahuatili, niquijtohua. Huan ipan nopa tonali quinmacase se becerro para quitencahuase noixpa por inintajtacolhua. ²⁰ Huan tijcuis se quentzi ieso huan tijtalis ipan nopa nahui cuacuajti cati eltoc ipan iesquinas nopa taixpamit. Nojquiya tijtalis ipan iesquinas nopa parte ten nopa taixpamit cati mocahua tatzinta iixco cati huejcapa. Huan nojquiya xijtali ipan itencuayo nopa taixpamit cati quipixtoc yahualtic. Huan ya nopa quitapajpacchihuas huan quitatzejzelolchihuas nopa taixpamit. ²¹ Teipa xijcui nopa becerro cati amo teno cati amo cuali quipiya ipan itacayo huan xijtencahuaca quej se tacajcahualisti para tajtacoli. Huan xijtatiti campa niquijtojtoc ipan icalixpa nopa tiopamit.

22 “Ipan nopa ompa tonali, xijtencahua se pilchivojtzi cati amo teno cati amo cuali quipiya ipan itacayo quej se tacajcahualisti para tajtacoli. Xijtapajpacchihuas nopa taixpamit ica ieso san se quej quitapajpacchijque ica ieso nopa becerro. **23** Huan quema titantosa tijtapajpacchihuas nopa taixpamit, xijcui se becerro ten campa nopa huacaxme huan se oquich borrego ten campa quintzactoque. Nochi ome monequi amo quipiyase yon se tamanti cati amo cuali ipan inintacayo. **24** Huan xiquintati noixpa na, niamoTECO. Huan nopa totajtzitzi quitalise istat ininpani huan quitatise quej se tacajcahualisti para na.

25 “Mojmosta para chicome tonati anquitencahuase se oquich chivo, se becerro huan se oquich borrego quej se tacajcahualisti para tajtacoli. Nochi ni tapiyalme monequi amo quipiyase yon se tamanti cati amo cuali ipan inintacayo. **26** Quena, monequi nopa totajtzitzi quej nopa quichihuase mojmosta para chicome tonati para quitapajpacchihuase huan quitatzejzelchihuase nopa taixpamit. **27** Huan quema ya panotos nopa chicome tonati, nopa totajtzitzi quipehualtise ipan tonali chicueyi para mojmosta quitencahuase nopa tacajcahualisti cati masehualme quihualicaj quej tacajcahualisti tatatili huan nopa tacajcahualisti para tayoltalili. Huan na nimechselis ica miyac paquili. Quej nopa na, niamoTECO Cati Más Nijpiya Tanahuatili, niquijtohua.”

Itequi nopa caltemit ica campa hualquisa tonati

¹ Teipa nopa tacat sempa techhualicac campa nopa caltemit ipan nopa tepamit cati más calteno ica campa hualquisa tonati, pero nopa caltemit tzactoya. ² Huan TOTECO techilhui: “Ni caltemit mocahuas tzactoc huan amo quema amo aqui huelis quitapos. Huan yon se masehuali amo huelis calaquis nopona pampa niDIOS cati niamotECO anisraelitame nicalajqui nopona. Yeca mocahuas tzactoc. ³ San huelis calaquis nopa tanahuatijquet para mosehuis nopona para quicuas tacualisti cati tatzejzeloltic noixpa na, niamotECO. Pero monequi calaquis ipan nopa pasillo ten nopa calixpamit. Huan calaquis huan quisas nopona huan amo quitapos nopa caltemit cati calteno.”

Ajquiya inijuanti huelise calaquise ipan nopa tiopamit

⁴ Teipa techhuicac ipan nopa pasillo huan caltemit cati eltoc ica norte hasta iixpa nopa tiopamit. Huan niquitac nopa tiopamit temitoya ica itatanex TOTECO. Huan nimotancuaquetzqui huan nimixtapacho iixpa.

⁵ Huan TOTECO techilhui: “Tacat, xitachiya cuali huan xijtacaquili ica miyac tamocuitahuili nochí cati nimitzilhuía ten nopa tanahuatilme ten notiopa na, niamotECO. Quena, xijtacaquili cuali ten ajquiya inijuanti quinamiqui calaquise huan ajquiya inijuanti amo.

⁶ “Huan xiquinilhui nopa mosisini jca israelitame cati amo quinequij techneltocase para quej ni na, niDIOS Cati Más Nijpiya

Tanahuatili, niquijtohua: ‘Ayecmo niquijyohuis nopa fiero tamanti cati anquichihuaj.⁷ Amojuanti tahuel anquimahuispolojoque notiopa pampa anquincahuilíaj ma calaquica nopona masehualme cati sequinoc talme ehuani huan yon quentzi amo techneltocaj na, yon amo moyolpatatoque. Anquincahuilijtoque ma calaquica ipan nopa tiopamit quema antechtencahuilíaj nopa pantzi, nopa tachiyajcayot huan nopa esti huan quej nopa anquimahuispolohuayayaj notiopa quema antechmacayayaj tacajcahualisti. Huan ica nochí cati anquichijtoque, anquiixpanotoque nopa camanali cati nijchijtoc amohuaya.⁸ Amo anquitepanitztoque nopa tanahuatili cati nimechmacac ten notiopa huan taya monequi anquichihuase nopona ica nochí tamanti cati tatzejtzeloltic. Huan amojuanti anquicajtoque notiopa inimaco sequinoc talme ehuani para ma tequitica nopona.’

⁹ “Yeca na, niDIOS Cati Más Nijpiya Tanahuatili, niquijtohua: Masque itztoque miyac masehualme cati sequinoc talme ehuani nopona campa amojuanti, yon se cati seyoc tali ehua amo huelis calaquis ipan notiopa sintia amo motequilijtoc ipan itacayo nopa machiyot circuncisión o amo moyolcuectoque huan techneltoca na.¹⁰ Huan nopa levitame cati mohuejcatalijque ten na quema nopa israelitame techtahuelcajque para quinhueyichihuase teteyome, monequi quiselise tatzacuiltili por inintajtacolhua.¹¹ Pero levitame, quena, huelise tequipanose quej tamocuitahuiani campa caltemit huan ipan

sequinoc tamanti tequit cati monequi ipan nopa tiopamit. Huelis quinmictise nopa tapiyalme cati quintencahuase quej tacajcahualisti tatatili cati quinhualicase nopa masehualme. Huan itzose nopona mocualtalijtoque para quinpalehuise masehualme. ¹² Elque levitame cati quintequipanohuayayaj nopa israelitame iniixpa nopa teteyome huan quinmacayayaj nopa teteyome tacajcahualisti. Quej nopa quinchihualtijque israelitame ma quichihuaca huejhueyi tajtacoli. Huajca pampa quichijque ya nopa, ama nijtanantoc nomax ica inijuanti. Huan na, niDIOS Cati Más Nijpiya Tanahuatili, nitatestigojquetza para melahuac nopa levitame quiselise intintzacuiltyil. ¹³ Ama huan teipa levitame amo huelise monechcahuise campa na para tequipanose quej totajtzitzi. Amo huelis quiitzquise tamanti cati tatzejzelotic huan yon quentzi amo hueli tequipanose ica cati más tatzejzelotic. Quinamiqui para inijuanti ma pinahuaca por nochí nopa tajtacoli cati quichijtoque. ¹⁴ Ama iniixhuihua levitame san huelise tamocuitahuise ipan notiopa huan quinpalehuise nopa masehualme ipan nochí piltamantzitzí.

Nopa totajtzitzi

¹⁵ “Pero nopa levitame cati elij totajtzitzi huan eliyayaj iteipa ixhuihua Sadoc quisenhuiquilijque techtequipanojque ipan notiopa quema nochí israelitame techtahuelcahuayayaj para quinhueyichihuase teteyome. Huajca san inijuanti cati iteipa ixhuihua Sadoc huelis

techtequipanose. San injuanti elise totajtzitzi huan hualase noixpa para techtencahuilise nopa tachiyajcayot huan inieso nopa tapiyalme cati quinmictise para tacajcahualisti. Quej nopa na, ni amoTECO Cati Más Nijpiya Tanahuatili, niquijtohua. ¹⁶ Injuanti elise cati calaquise ipan notiopa Campa Tatzejzeloltic huan monechcahuise campa nomesa para techtequipanose huan quichihuase cati na njnequi.

¹⁷ “Quema calaquise ipan nopa calixpamit cati calijtic, monequi moquentijtiyase iniyoyo cati tachijchihuali ica lino cati más cuali. Amo hueli quihiucase yon se yoyomit cati tachijchihuali ica borregojme inijhuiyo quema tequipanose ipan nopa calixpamit cati más nechca nopa tiopamit o quema tequipanose calijtic ipan nopa tiopamit. ¹⁸ Monequi quihiucase se tzonyahuali ipan intzonco cati tachijchihuali ica lino huan incalzo nojquiya monequi elis tachijchihuali ica lino. Huan amo hueli quihiucase yon se tamanti cati quinchihuas ma mitonica. ¹⁹ Huan quema nopa totajtzitzi monequis mocuepase ipan nopa calixpamit cati más calteno campa itztoque nopa masehualme, monequi achtohui quiquixtise iniyoyo cati quitequihuijque quema tequipanojque noixpa huan quicajtehuase ipan nopa pilcuarto-jtzitzi cati tatzejzeloltique. Huan moquentise seyoc iniyoyo cati amo tatzejzeloltic para amo quinmahuase masehualme ica tatzejzeloltijcayot ica iniyoyo huan quitzacuilis ica cati hueli quichihuase.

²⁰ “Totajtzitzi amo hueli quicahuase intzoncal

ma eli huehueyac, pero nojquiya amo hueli quitamihuatanise inintzontereo quema moximase. Monequi quicahuase san cuali ihuehueyaca inintzoncal. ²¹ Yon se totajtzi amo huelis quiis xocomecat iayo quema calaquis ipan nopa calixpamit cati calijtic nechca nopa tiopamit. ²² Huan quema mosihuajtise totajtzitzi, monequi mocuilise se israelita ichpocat cati amo quiixmajtoc yon se tacat. O nojquiya huelis mocuilise se sihuat cati eliyaya isihua se totajtzi cati mijqui. Amo hueli mocuilise se sihuat cati quicajtoc ihuehue. ²³ Inijuanti quinmachtise nomasehualhua quenicatza quiixmatise se tamanti cati tatzejzeloltic huan se tamanti cati amo. Huan quinnextilise taya tapajpactic noixpa huan taya amo.

²⁴ “Nojquiya nopa totajtzitzi tetajtolsencahuase quej jueces huan quixitahuase nochí cualanti cati oncas campa nomasehualhua. Huan tetajtolsencahuase senquisa quej quijtohua notanahuatilhua. Huan nopa totajtzitzi monequi ma quitepanitase notanahuatilhua huan ipan nochí tamanti ilhuit monequi quichihuase senquisa quej quijtohua nopa tanahuatili. Huan nojquiya quichihuase para nopa masehualme ma quitepanitaca nopa tonali para mosiyajquetzase para ma elica tonali cati tatzejzeloltique.

²⁵ “Se totajtzi amo hueli monechcahuis campa eltoc itacayo se mijcatzi para amo mochihuas amo tapajpacti noixpa. San quena, hueli monechcahuis campa eltoc itacayo itata, inana, itelpoca o iichpoca, itacaicni o se isihuaicni cati amo quipixqui ihuehue. ²⁶ Pero sintia monechcahuis campa

se cati ihuical, amo huelis tequipanoti ipan notiopa hasta motapajpacchihuas huan mochiyas seyoc chicome tonati. ²⁷ Huan teipa ipan nopa achtohui tonali quema sempa yas para techtequipanos huan calaquis ipan nopa calixpamit cati mocahua calijtic ipan notiopa, monequi quitencahuas se tacajcahualisti para itajtacol. Quej nopa na, niDIOS Cati Más Nijpiya Tanahuatili, niquijtohua.

²⁸ “Nopa totajtzitzi amo hueli quipiyase yon se tali para iniaxca ipan tali Israel. Pampa na noseltitzi nielis niinixaca huan san ya nopa monequi. ²⁹ Inijuanti quicuase nopa tacajcahualisti ten harina, nopa tacajcahualisti para tajtacoli huan nopa tacajcahualisti para cati quimajtoc tajtacoli cati nomasehualhua quihualicase ipan notiopa. Nochi tamanti cati israelitame quihualicase para techmacase na, niininTECO, elis para nopa totajtzitzi. ³⁰ Nojquiya nopa totajtzitzi quiselise nochi cati achi cuali cati achtohui quipixcase ipan mila huan nochi tamanti tacajcahualisti cati israelitame techmacase niininTECO. Huan quema israelitame quixacualose harina para quichihuase pantzi, monequi quinmacase quentzi harina cati más cuali. Huan quej nopa niquintiochihuas inihuaya nochi cati itztoque ipan ininchaj. ³¹ Huan nopa totajtzitzi amo quema huelise quicuase se tapiyali cati mijqui ica iselti o cati quimictijque sequinoc tapiyalme.

45

*Nopa piltaltzi cati iaxca TOTECO
(Ez 48:9-20)*

¹ “Quema sempa tijxelos tali Israel para tiquin-majmacas sesen ten nopa huejhueyi familias ten israelitas cati elis iniaxca, achtohui monequi tiquiyocatalis se quentzi para elis na noaxca, ni-amotECO. Monequi quipiyas 12 kilómetros huan tajco ihuehueyaca huan 10 kilómetros ipatajca. Huan nochí ni tali mocuepas tali tatzejzeloltic. ² Huan ten nopa tali cati noaxca na, monequi tiquiyocatalis se quentzi cati quipiyas 250 metros ihuehueyaca huan 250 metros ipatajca para nopona anquichijchihuase nopa tiopamit. Huan yahualtic nopa tiopamit quipiyas quej se calle cati quipiyas 25 metros ipatajca. ³ Nopa tali cati elis na noaxca xijtajcoita ica ome huan sesen piltaltzi quipiyas 12 kilómetros huan tajco ihuehueyaca huan 5 kilómetros ipatajca. Nopa achtohui pedazo 12 kilómetros huan tajco huan 5 kilómetros ipatajca elis tali tatzejzeloltic huan nopona anquichihuase nopa tiopamit ica nopa cuarto Campa Más Tatzejzeloltic. ⁴ Huan ipan ni tali tatzejzeloltic campa eltoc nopa tiopamit, nopa tali cati mohahuas elis para nopa totajtzitzi cati tequipanohuaj noixpa Campa Más Tatzejzeloltic. Huan quitequihuise para quichijchihuase ininchaj.

⁵ “Huan nopa seyoc pedazo cati nojquiya quipiya 12 kilómetros huan tajco ihuehueyaca huan 5 kilómetros ipatajca elis para nopa levitame cati tequipanohuaj ipan nopa tiopamit. Huan quitequihuise para quichijchihuase ininchaj ipan pilaltepetzitzti.

⁶ “Huan nechca ten nopa pedazo cati tatzejzeloltic, tijtamachihuas seyoc piltaltzi cati quipiyas 12 kilómetros huan tajco ihuehueyaca

huan 2 kilómetro huan tajco ipatajca. Huan ni tali elis para se altepet huan nopona cati hueli israelita cati quinequi huelis hualas huan nopona mochantis.

*Nopa tali cati iaxca nopa tanahuatijquet
(Ez 48:21-22)*

⁷ “Nojquiya oncas ome pedazos ten tali cati taiyocatalili para nopa tanahuatijquet. Nopa pedazos elis ipan sesen lado ten nopa tali cati tatzejzelotic huan cati para altepet. Huan nopa pedazos yase para campa hualquisa tonati huan campa oncalaque tonati hasta campa ontami inintal nopa huejhueyi familias ica campa hualquisa tonati huan oncalaque. Huan nopa pedazo ica campa hualquisa tonati huan ica campa oncalaque tonati quipiyas san se ininpatajca. ⁸ Huan nopa ome pedazos elis iaxca nopa tanahuatijquet. Huan quej nopa, nopa tanahuatiani ayecmo quintaijyohuiltise israelitame, yon ayecmo quinichequilise noisraelita masehualhua inintal. Huan nochitali cati mocahua ipan Israel quimacase sesen hueyi familia para ma moaxcatica para inintal.

Tanahuatili para nopa tanahuatijquet

⁹ “Na, niamoTECO, niquijtohua: ¡Antanahuatiani ten tali Israel, ayecmo xiquintaijyohuiltica nomasehualhua! Ayecmo xiquintachtequilica, yon ayecmo xiquinquixtica ten ininchaj. Monequi nochipa xitequichihuaca xitahuac huan xitatempanitaca. Quej nopa na, niamoTECO Cati Más Nijpiya Tanahuatili, niquijtohua.

10 “Xijtequihuica teme cati xitahuac quema antatamachihuaj ipan balanza. Amo aqui xijquixtilica yon se pilquentzi. **11** Nochi tatamachihuali para tamanti cati huactoc quej sinti huan et huan nopa tatamachihuali para cati atic quej aceite, nochi monequi elise cati xitahuac. Se homer cati xitahuac quipiyas 220 litros para tamanti huactoc. Se bato cati quitequihuáj para quitamachihuaj tamanti cati atic huan nopa efa para cati huactoc quej sinti, monequi quipiyas 22 litros.

12 “Huan para quitamachihuase tamanti cati etic, monequi elis 20 geras para se siclo cati quipiya 11 gramos ietica huan 60 siclos elis se mina.

13 “Ya ni nopa ofrendas cati monequi anquimacase nopa tanahuatijquet para tacajcahualisti. Xijtajcoitaca cati anquipixcase ten trigo huan cebada ica 60 pamit cati san se huan xijmaca se nopa tanahuatijquet. **14** Huan ipan se 100 litros ten aceite ten oliva, anquiquixtilise se litro para anquimacase. **15** Huan ipan sesen 200 borregojme, anquimacase se borrego cati tomahuac cati tacuajtinemij ipan potreros cati más cuajcuali ipan tali Israel. Nochi ya ni imiyaca cati monequi antemacase para tacajcahualisti ten harina, tacajcahualisti tatatili, tacajcahualisti para tayoltalili huan tacajcahualisti cati oncas para quiixtzacuase intintajtacol nopa masehualme cati quihualicase. Quej nopa na, niamoTECO Cati Más Nijpiya Tanahuatili, niquijtohua.

16 “Nochi israelitame monequi quihualicase ni ofrendas para nopa tanahuatijquet ipan Israel, **17** pampa elis yaya icuenta para temacas nopa

tapiyalme cati quintencahuase noixpa ipan nochí tonali ten ilhuit, huan ipan nopa tonali quema pehua yancuic metzti, huan ipan sesen tonali quema ammosiyajquetzase huan ipan nochí se-quinoc tamanti ilhuit. Yaya itequi para ma onca tacajcahualisti para tajtacoli, huan tacajcahualisti tatatili huan nopa tacajcahualisti cati quitoyahuase noixpa, huan nopa tacajcahualisti para tayoltalili nohuaya huan para ma onca tapojpol-huili para israelitame.

Nopa Pascua ilhuit

18 “Quej ni na, niamoTECO Cati Más Nijpiya Tanahuatili, niquijtohua: Ipan nopa tonali quema pehua se yancuic xihuit ipan toisraelita calendario*, anquitencahuase se becerro cati amo quihiya yon se tamanti cati amo cuali ipan itacayo para anquitapajpacchihuase nopa tiopamit. **19** Huan nopa totajtzi quicuis se quentzi ieso ni tapiyali cati quitencajtoque quej se tacajcahualisti para tajtacoli, huan quitalis ipan itenuayo nopa caltemit ipan tiopamit. Nojquiya quitalis ipan nopa nahui esquinas ten nopa taixpamit, huan ipan taquetzalme campa caltemit campa calaquij ipan nopa calixpamit cati mocahua calijitic. **20** Huan nojquiya quej nopa anquichihuase ipan tonali chicome ten nopa metzti para nopa masehualme cati quichijque tajtacoli, pero quichijque pampa mocajcayajque o pampa amo

* **45:18** 45:18 inixhui pehua ipan itamiya marzo o ipan ipejya abril ipan tocalendario ten ama.

quimatiyayaj sintu cati quichijque eliyaya tajtacoli. Huan quej nopa anquitapajpacchihuase nopa tiopamit.

21 “Ipan 15 itequi nopa achtohui metzti ipan nopa yancuic xihuit, anquichihuase nopa Pascua ilhuit. Huan nopa ilhuit huejcahuas chicome tonati. Huan ipan nochu ni tonali san hueli anquicuase pantzi cati amo quipyia tasonejcayot.

22 Huan ipan nopa tonali ten Pascua, nopa tanahuatijquet quinmacas totajtzitzi se becerro para quitencahuase quej se tacajcahualisti para itajtacolhua huan para inintajtacolhua nochu nopa israelita masehualme. **23** Huan ipan sesen tonali ipan nopa chicome tonati ten Pascua ilhuit, nopa tanahuatijquet monequi temacas chicome becerros huan chicome oquich chivojme cati tapajpactic inintacayo para ma quintencahuaca noixpa niamotECO quej tacajcahualisti tatatili. Huan nojquiya mojmosta quitencahuas se oquich borrego quej se tacajcahualisti para tajtacoli. **24** Ihuaya sesen becerro cati quitencahuase quej tacajcahualisti, monequi temacase ihuaya 20 litros ten harina huan eyi litros huan tajco ten aceite. Huan nojquiya san se quichihuase ica sesen oquich borrego.

Nopa Ilhuit Quema Quichihuase Pilxajcaltzitzitzi

25 “Huan ipan 15 itequi nopa metzti chicome ipan toisraelita calendario†, ajsis nopa Ilhuit Quema Anquichihuase Pilxajcaltzitzitzi huan ipan anitztose para chicome tonati. Huan ipan nopa

† **45:25** 45:25 Ni ilhuit eltoc ipan itamiya septiembre o ipejya octubre ipan tocalendario ten ama.

tonali nopa tanahuatijquet quichihuas quej quichijqui mojmosta ipan nopa ilhuit ten Pascua. Yaya quinmacas nopa totajtzitzi san se imiyaca nopa tacajcahualisti para tajtacoli huan nopa tacajcahualisti tatatili huan nopa tacajcahualisti ten harina ica nopa aceite cati monequi huan nopa totajtzitzi quitencahuase noixpa.

46

Inintequi tanahuatiani huan masehualme quema quichihuaj ilhuit

¹ “Na, niamotECO, niquijtohua: Nopa caltemit ica campa hualquisa tonati ipan nopa calixpamit cati más calijtic mocahuas tzactoc ipan nopa chicuase tonali sesen samano quema masehualme tequitij, pero quitapose ipan nopa tonali quema mosiyajquetzase huan ipan nopa tonali quema pehua sesen yancuic metzti. ² Nopa tanahuatijquet calaquis ipan nopa sala ten nopa caltemit huan pasillo cati pano ten nopa calixpamit cati más calteno hasta nopa calixpamit cati calijtic. Huan quema calaquis, moquetzas campa nopa taquetzali nechca caltemit huan quitachilis nopa calixpamit cati calijtic quema nopa totajtzitzi quitencahuase nopa tacajcahualisti tatatili huan nopa tacajcahualisti para tayoltalili cati quihualicac nopa tanahuatijquet. Huan yaya motancauetzas huan techhueyichihuas ipan nopa pasillo iixmelac nopa caltemit. Huan teipa yaya quisas, pero nopa caltemit mocahuas tapojtoc huan amo quitzacuase hasta tiotac. ³ Ipan nopa tonali quema amosiyajquetzase huan quema

pehua yancuic metzti, nopa masehualme nojquiya huelise quihueyichihuase Toteco nopona iixmelac nopa caltemit.

⁴ “Ipan nopa tonali quema mosiyajquetzase, nopa tanahuatijquet quitencahuilis TOTECO chicuase pilborregojtzitzi huan se oquich borrego cati amo quipiyaj yon se tamanti cati amo cuali ipan inintacayo. ⁵ Huan nopa tanahuatijquet quihualicas 20 litros ten harina ihuaya nopa oquich borrego. Huan quema temacas nopa tacajcahualisti ten pilborregojtzitzi, temacas imiyaca harina cati quinequi temacas. Huan ihuaya nopa tacajcahualisti ten harina quihualicas 3 litros huan tajco ten aceite ten oliva. ⁶ Huan ipan nopa tonali quema pehua yancuic metzti, quitencahuas se becerro, chicuase pilborregojtzitzi huan se oquich borrego. Huan yon se ten ni tapiyalme amo huelis quipiyas yon se tamanti cati amo cuali ipan inintacayo. ⁷ Huan ica nopa becerro huan ica nopa oquich borrego monequi nojquiya quihualicas 20 litros ten harina quej se tacajcahualisti. Huan ica sesen ten nopa pilborregojtzitzi, quihualicas imiyaca harina cati quinequi temacas. Huan ica sesen 20 litros ten harina cati temacas, quihualicas 3 litros ten aceite.

⁸ “Huan quema nopa tanahuatijquet calaquis, monequi calaquis campa nopa sala ipan nopa pasillo huan nopona sempa quisas. ⁹ Huan ipan tonali ten ilhuit quema nopa masehualme calaquise para quihueyichihuase Toteco, cati calaquise ipan nopa caltemit ica norte, quisase ipan nopa caltemit ica sur. Huan cati calaquise

ipan nopa caltemit ica sur, quisase ipan nopa caltemit ica norte. Amo hueli quisase ipan nopa caltemit campa calajque. Monequi quisase ipan nopa seyoc caltemit. ¹⁰ Nopa tanahuatijquet calaquis inihuaya nopa masehualme huan sempa quisas inihuaya ipan nopa tonali.

¹¹ “Ipan sequinoc tamanti ilhuit huan ipan nopa ilhuime cati tatzejzelotlique nopa tanahuatijquet temacas 20 litros ten harina ica sesen becerro huan sesen oquich borrego. Huan temacas imiyaca harina cati yaya quinequi temacas ica sesen pilborrejotzi. Huan ica sesen tacajcahualisti ten harina temacas 3 litros huan tajco aceite ten oliva.

¹² “Quema nopa tanahuatijquet ica ipaquilis quinequis techmacas se tacajcahualisti tatatili o se tacajcahualisti para tayoltalili, quitapose nopa caltemit ica campa hualquisa tonati cati pano ten nopa calixpamit calteno hasta nopa calixpamit cati más calijtic para ma calaqui huan ma temaca itacajcahualis san se quej quichihuaj ipan nopa tonali quema mosiyajquetzaj. Pero quema quisas nopa tanahuatijquet, sempa quitzacuase nopa caltemit.

Tacajcahualisti cati monequi mojmosta

¹³ “Mojmosta ica ijnaloc techmacase se pilborrejotzi cati quipiya se xihuit huan cati amo teno cati amo cuali quipiya ipan itacayo. Huan quitencahuase noixpa, niamoTECO, quej se tacajcahualisti tatatili. ¹⁴ Nojquiya ica nopa pilborrejotzi temacase 7 litros ten harina huan se litro aceite ten oliva para quimanelose ihuaya nopa harina. Ya ni eli se tanahuatili cati monequi quitepanitase para nochipa. ¹⁵ Quena, ni harina huan aceite

temacase mojmosta ica ijnaloc ica nopa pilborre-gojtzi.

Itequi nopa tanahuatijquet ica nopa tali

16 “Ya ni cati na, niDIOS Cati Más Nijpiya Tanahuatili, niquijtohua: Sinta nopa tanahuatijquet quimacas se icone se quentzi ten nopa tali cati iaxca, huajca nopa tali para nochipa elis iaxca nopa icone huan iixhuihua. **17** Pero sinta nopa tanahuatijquet quimacas se itequipanojca se quentzi ten nopa tali cati iaxca, huajca san elis iaxca hasta nopa xihuit ten paquilsti cati 50 xihuit. Huan teipa nopa tali sempa elis iaxca nopa tanahuatijquet huan elis para iconehua para nochipa. **18** Nopa tanahuatijquet amo huelis quicuilis ital yon se masehuali. Sinta quinequis quinmacas iconehua se quentzi tali, monequi quinmacas cati yaya iaxca. Huan quej nopa no-masehualhua amo quipolose inintal.”

Icocinas nopa tiopamit

19 Teipa nopa tacat techhuicac campa nopa caltemit cati eltoc iquespa nopa pasillo huan nechcalaqi ipan nopa pilcuartojojtzitzti cati tatze-jzelotic huan cati eltoc para nopa totajtzitzti huan tachiyaj ica norte. Huan campa itamiya nopa pilcuartojojtzitzti eltoya se lugar cati mocahua más ica campa oncalaqui tonati. **20** Huan nopa tacat cati ihuaya niyahuiyaya techilhui: “Ya ni nopa lugr campa nopa totajtzitzti quiicxitise nopa nacat cati quitencajtoque quej se tacajcahualisti para cati quimajtoc tajtacoli huan cati quitencajtoque

quej se tacajcahualisti para tajtacoli. Nica quiicxitise nopa pantzi cati quichihuaj ica nopa tacajcahualisti ten harina. Nica quiicxitise nochí nopa tacajcahualisti para amo quihuicase tacajcahualisti cati tatzejzeloltic ipan nopa calixpamit cati calteno huan quinmahuase nopa masehualme cati amo totajtzitzi ica tatzejzelolticayot huan quintzacuilis masehualme ica cati hueli quichihuase.”

²¹⁻²² Teipa sempa techhualicac ipan nopa calixpamit cati mocahua más calteno. Huan techhuicac ipan sesen ten nopa nahui esquinas calijtic ipan nopa tepamit cati más calteno. Huan ipan sesen esquina niquitac quej se cuarto cati quipixqui 20 metros ihuehueyaca huan 15 metros ipatajca cati tatzquitoc ipan iesquinas calijtic ten nopa tepamit. ²³ Huan yahualtic nopa cuartos quipixqui itencuayo nopa tepamit cati patahuac quej se mesa ten tet. Huan tatzinta nopa patahuac tencuayot eltoya se lugar para tit. ²⁴ Huan techihui: “Ya ni nopa cocinas campa tequipanohuaj ipan tiopamit para quimolonise nopa nacat cati nopa masehualme temacase quej tacajcahualisti para tayoltalili.”

47

Nopa at cati quipiya chicahualisti

¹ Teipa nopa tacat sempa techhuicac campa caltemit cati calaqui calijtic ipan cati nelía tiopamit. Huan niquitac itantita nopa caltemit ten nopa tiopamit meyayaya at huan nopa at yahuiyaya ica campa hualquisa tonati pampa ica nopona tachixtoya nopa tiopamit. Huan ni at panoyaya

ica inejmat nopa tiopamit, huan pano ica sur ten nopa taixpamit. ² Teipa tipanoque ipan nopa pasillo cati yahui ica norte huan yaya techhualicac calteno ten nopa tepamit cati quiyahualohua cati nelía tiopamit. Huan techchijqui ma nijimaca se huelta ica calixpa hasta campa nopa caltemit cati mocahua ica campa hualquisa tonati. Huan nopona niquitac nopa at cati meyayaya pano ica sur ten nopa pasillo cati eltoc ica campa hualquisa tonati. ³ Huan nopa tacat quihuicayaya se lazo imaco cati ica tatamachijtiyahuiyaya huan quisqui ipan nopa caltemit cati eltoc ica campa hualquisa tonati huan quita-machijtoya 500 metros ihuehueyaca nopa hueyat. Huan teipa techchihualti ma niquixcottona nopa at, huan nopa at ajsiyaya hasta noicxiquechta. ⁴ Teipa quitamachijqui seyoc 500 metros ihuehueyaca huan techchihualti ma niquixcottona sempa. Huan nopa at ajsiyaya hasta ipan notancua. Teipa quitamachijqui seyoc 500 metros huan techilhui ma niquixcottona, huan nopa at techajsiyaya hasta notzinguechta. ⁵ Teipa quitamachijqui seyoc 500 metros ten nopa at, pero nopona niquitac para ya eliyaya se hueyat cati tahuel huejcata huan ayecmo nihuelqui niquixcotonqui sintamo niajquisquía hasta seyoc lado.

⁶ Huan huajca techilhui: “Xiquelnamiqui nochí cati nimitznextilijtoc.” Teipa techchihualti ma nimocuepa iteno nopa hueyat. ⁷ Huan niquitac para ipan nochí ome lados oncayaya miyac cuame cati moscaltijtoyaj. ⁸ Huan techilhui: “Ni hueyat motalos ica campa hualquisa tonati huan panos campa nopa huactoc tali hasta aj-

sis campa nopa tamayamit campa nopa hueyat Jordán huan nopona calaqui ipan nopa Mictoc Hueyi At cati tahuel poyec ica norte. Huan quema aj siti nopona, nopa at ipan nopa Mictoc Hueyi At mocuepas se at cati senquisa cuali huan ajhuiyac para quiise.⁹ Huan campa ajsisquía nopa at huelis itztose nochí tamanti michime huan tapiyalme pampa nopa at cati eliyaya nelpoyec ya mochicajtoc. Huan campa hueli yahui ni at ten nopa tiopamit temacas nemilisti. ¹⁰ Huan michtajtamani itztose campa hueli iteno nopa Mictoc Hueyi At. Itztose ten nopa pilaltepetzi En Gadi hasta pilaltepetzi En Eglaim. Huan nopona atenti quipatahuase inimata para ma huaqui. Huan nochí tamanti michime quitemitise nopa Mictoc Hueyi At quej quitemitíaj nopa Hueyi At Mediterráneo. ¹¹ Pero nopa mantoc at cati mocahua atenti huan quipiya acat huan nopa acomoli, inijuanti amo mochicahuase. Inijuanti quisenhuiquilise quipiyase at cati poyec. ¹² Huan ipan nochí ome lados ten nopa hueyat cati quisa ten tiopamit moscaltise nochí tamanti cuame. Huan nopa cuame inixihuiyo amo quema pilinis, yon amo quema huaquis. Nojquiya temacase inintajca sesen metzti para nochipa pampa ni cuame quiselise nopa at cati meya ipan nopa tiopamit. Huan inintajca ni cuame elis para inintacualis masehualme huan inixihuiyo elis pajti para quinchicahuas cati mococohuaj.

Nopa nepamit ten nopa tali

¹³ “Ya ni cati na, niamoTECO Cati Más Nijpiya Tanahuatili, niquijtohua: Xijtoquili ni tanahu-

atili quema anquinxelhuilise nopa tali nopa 12 huejhueyi familias ten israelitame. Ifamilia José, quiselise ome partes. ¹⁴ Pero nopa sequinoc familias anquinmacase san se parte. Quena, na nitatestigoquetzqui huejcajquiya para ni tali niquinmacasquía amohuejcapan tatahua huan ama elis quej anquiselise ten injuanti.

¹⁵ 'Ica norte inepa ni tali elis ten nopa Hueyi At Mediterráneo hasta altepet Hetlón campa calaquij ipan altepet Zedad. ¹⁶ Teipa panos Hamat, Berota huan Sibraim cati mocahuaj campa inepa tali Damasco huan tali Hamat. Huan teipa nopa nepamit panos hasta ajsis altepet Hazar Haticón campa inepa tali Haurán. ¹⁷ Huajca nopa nepamit ica norte elis ten nopa Hueyi At hasta altepet Hazar Enán ipan nopa nepamit ica Damasco huan tali Hamat ica norte.'

¹⁸ 'Huan nopa nepamit ica campa hualquisa tonati, pejtehuas campa altepet Hazar Enán huan yas ica sur hasta campa nopa tepepet Haurán huan nopona quimacas huelta huan yas ica campa oncalaqui tonati hasta campa hueyat Jordán campa tami nopa hueyi at Galilea. Huan ten nopona ixtemos ica campa hueyat Jordán huan panos tatajco tali Israel huan tali Galaad, huan panos ipan nopa Mictoc Hueyi At huan ajsis hasta altepet Tamar. Ya ni elis inepa ica campa hualquisa tonati.'

¹⁹ 'Nopa nepamit ica sur, pehuas campa altepet Tamar huan yas ica campa oncalaqui tonati hasta ajsis campa nopa mantoc at cati itoca

Meriba Cades. Huan teipa quitoquilis nopa hueyat ten tali Egipto huan yas hasta nopa Hueyi At Mediterráneo.'

20 'Huan nopa nepamit ica campa oncalaqi tonati elis nopa Hueyi At Mediterráneo huan yas ten campa nopa nepamit quiajsic nopa Hueyi At ica sur huan tamis hasta campa pehua nopa nepamit ipan nopa Hueyi At ica norte iixmelac campa calaqui ipan altepet Hamat.'

21 "Huajca ximoxelhuilica ni tali quej quinamiqui ica nopa 12 huejhueyi familias israelitas. **22** Xixxeloca nopa tali quej elisquía se nemacti cati amojuanti anquiselijtoque ten amotatahua. Elis amoaxca amojuanti huan nopa masehualme ten sequinoc talme cati ama itztoque tatajco ten amojuanti ica inifamilias. Nochi injuanti monequi anquinítase quej nojquiya elisquíaj israelitame. Yeca monequi nojquiya anquinmacase cati elis iniaxca. **23** Nochi nopa sequinoc talme ehuani monequi quiselise inintal ipan nopa hueyi familia campa ama itztoque. Quej nopa na, niamTECO, niquijtohua.

48

1 "Nica eltoc intintoca nopa huejhueyi familias huan nopa tali cati quiselis sesen ten injuanti. Nopa hueyi familia Dan quiselis nopa tali cati más ica norte. Inepa ica norte quitoquilis nopa ojti ten Hetlón hasta Hamat huan teipa yahui hasta Hazar Enán cati campa monepantía ica tali Hamat ica norte huan Damasco ica sur. Ya ni inepa Dan ica norte ten se lado tali Israel campa Hueyi At

Mediterráneo hasta campa tami tali Israel campa hualquisa tonati.² Nopa hueyi familia Aser teipa quipiyas ital más ica sur ten Dan ten se lado tali Israel hasta seyoc.³ Teipa nopa hueyi familia Neftalí quipiyas ital más ica sur ten Aser ten se lado tali Israel hasta seyoc.⁴ Teipa nopa hueyi familia Manasés quipiyas ital más ica sur ten Neftalí ten se lado tali Israel hasta seyoc.⁵ Teipa nopa hueyi familia Efraín quipiyas ital más ica sur ten Neftalí ten se lado tali Israel hasta seyoc.⁶ Teipa nopa hueyi familia Rubén quipiyas ital más ica sur ten Efraín ten se lado tali Israel hasta seyoc.⁷ Teipa nopa hueyi familia Judá quipiyas ital más ica sur ten Rubén ten se lado tali Israel hasta seyoc.

⁸ “Ica sur ten ital Judá, mocahuas nopa tali cati monequi xiquiyocatali para nopa tiopamit, huan nopa altepet huan nopa tanahuatijquet. Huan inepa nopa tali nojquiya pehuas ica campa hualquisa tonati ipan tali Israel huan ajsis campa oncalaqui tonati. Huan ipatajca nochí nopa tali taiyocatalili elis 12 kilómetros huan tajco, huan ihuehueyaca elis san se quej inintal sesen ten nopa huejhueyi familias; elis ten se lado hasta seyoc lado ten tali Israel. Huan nopa tiopamit mocahuas tatajco ten ni tali taiyocatalili.

*Nopa tali cati taiyocatalili para TOTECO
(Ez 45:1-6)*

⁹ “Nopa tali cati monequi anquiiyocatalise para na, niamotECO, monequi quipiyas 12 kilómetros huan tajco ihuehueyaca huan 10 kilómetros ipatajca.¹⁰ Huan ipan ni tali oncas se pedazo cati elis taiyocatalili para nopa totajtzitzi cati quipiyas 12

kilómetros huan tajco ica campa hualquisa tonati hasta campa oncalaque tonati, huan 5 kilómetros ica norte hasta ica sur. Huan tatajco ten ni tali mocahuas nopa tiopamit. ¹¹ Ya ni elis para nopa totajtzitzi cati iixhuihua Sadoc pampa injuanti senquisa techtepanitaque huan amo tajtacolchijque quema techtahuelcajque nopa israelitame huan nopa sequinoc levitame. ¹² Yeca nopa totajtzitzi quipiyase inintal ipan nopa tali cati taiyocatalili para na, niamotECO, cati más tatzejzeloltic. Huan inintal elis nechca inintal nopa levitame. ¹³ Huan inintal nopa levitame elis san se ihuexca quej inintal nopa totajtzitzi, quipiyas 12 kilómetros huan tajco ihuehueyaca huan 5 kilómetros ipatajca. Huajca para nochí, nopa tali cati taiyocatalili quipiyas 12 kilómetros huan tajco ihuehueyaca huan 10 kilómetros ipatajca. ¹⁴ Yon se pedazo ten ni tali amo huelis quimacase, yon amo huelis quiixpatase, yon amo huelis quimacase seyoc masehuali pampa ni tali tatzejzeloltic huan noaxca na, niamotECO.

¹⁵ “Huan onca seyoc pedazo cati mocahua cati quipiya 12 kilómetros ihuehueyaca huan 2 kilómetro huan tajco ipatajca huan mopantis ica sur ten nopa tali para nopa tiopamit. Ni pedazo amo elis tatzejzeloltic, pero elis para nochí nopa masehualme. Nopona masehualme quichijchihiuse ininchaj huan ininpotreros para intapiyalhua. Huan nopa altepet mocahuas tatajco. ¹⁶ Nopa altepet quipiyas 2 kilómetros ihuaya 250 metros ihuehueyaca huan ipatajca. ¹⁷ Huan yahualtic nopa altepet oncas se tali pitzactzi cati quipiyas 125 metros ipatajca. Huan ya nopa

quitequihuise para potreros. ¹⁸ Nojquiya mocahuas seyoc piltaltzi calixpa ten nopa altepet, iniixpa nopa talme cati taiyocatalilme para TOTECO. Huan quipiyas 5 kilómetros ica campa hualquisa tonati huan 5 kilómetros ica campa oncalaque tonati. Huan ipan ni tali quitocase tamanti para ica mopanoltise nopa masehualme cati tequitij ipan nopa altepet. ¹⁹ Ipan ni tali tatojtocase masehualme cati itztoque ipan ten hueli hueyi familia cati tequitij ipan nopa altepet. ²⁰ Huan noch ni tali campa eltoc nopa piltaltzi cati taiyocatalili para itiopa TOTECO, huan para nopa levitame, huan para nopa totajtzitzi huan para nopa altepet, noch san sejco elis quej setzi tali huan quipiyas 12 kilómetros huan tajco ipatajca huan ihuehueyaca.

*Ital nopa tanahuatijquet
(Ez 45:7-8)*

²¹ “Huan nopa tali cati mocahua ipan se lado ica campa hualquisa tonati huan ipan seyoc lado ica campa oncalaque tonati ten nopa talme cati tatzejzelotique huan cati para altepet, nopa ome pedazos ten tali elis para nopa tanahuatijquet. ²² Huajca nopa tali para nopa tanahuatijquet pehuas ica norte campa monepantalía ihuaya ital nopa hueyi familia Judá huan ica sur campa monepantalía ihuaya nopa hueyi familia Benjamín. Huan ipan se lado ten nopa tali taiyocatalili quipiyas 12 kilómetros huan tajco ipatajca huan yas hasta ica campa oncalaque tonati. Huan ipan nopa seyoc lado ten nopa tali taiyocatalili nojquiya quipiyas 12 kilómetros huan tajco ipatajca huan yas hasta ica campa hualquisa tonati. Huan

nopa tali para nopa levitame huan totajtzitzí,
huan nopa altepet, mocahuas tatajco.

Inintal nopa sequinoc huejhueyi familias

23 “Nopa sequinoc huejhueyi familias, quipiyase inintal ica sur ten ni tali taiyocatalili. Achtohui nopa hueyi familia Benjamín quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. **24** Teipa ica sur ten Benjamín, nopa hueyi familia Simeón quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. **25** Teipa ica sur ten Simeón, nopa hueyi familia Isacar quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. **26** Teipa ica sur ten Isacar, nopa hueyi familia Zabulón quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati. **27** Huan teipa ica sur ten Zabulón, nopa hueyi familia Gad quipiyas ital cati yas ten se lado tali Israel ica campa hualquisa tonati hasta seyoc lado ica campa oncalaqui tonati.

28 “Pero ica sur ten ital nopa hueyi familia Gad, monepantalis ihuaya tali Tamar huan yas hasta campa nopa mantoc at cati itoca Meriba Cades. Teipa yas campa nopa pilatentzi ten tali Egipto huan quitoquilis hasta ajsis ipan nopa Hueyi At Mediterráneo.

29 “Huajca ya ni eli nopa tali cati quiselise para iniaxca nopa huejhueyi familias ten israelitame. Huan quej nopa monequi anquixelose. Quej

nopa na, niamoTECO Cati Más Nijpiya Tanahu-atíli, niquijtohua.

Icaltehua nopa altepet Jerusalén

³⁰ “Nopa altepet quipiyas se tepamit yahualtic cati quipiyas 2 kilómetros ihuaya 250 metros ipan sesen lado. ³¹ Ipan sesen lado ten nopa tepamit, quipiyas 3 caltemit. Huan sesen ten ni caltemit quihiucas itoca se ten nopa huejhueyi familias ten israelitame. Ica norte mocahuase nopa caltemit cati quinixnextise nopa huejhueyi familias ten Rubén, Judá huan Leví. ³² Nopa caltemit cati mocahuase ica campa hualquisa tonati quihiucase inintoca nopa huejhueyi familias ten José, Benjamín huan Dan. ³³ Huan nopa caltemit cati mocahuase ica sur quihiucase inintoca nopa huejhueyi familias ten Simeón, Isacar huan Zabulón. ³⁴ Huan nopa caltemit cati mocahuase ica campa oncalaqui tonati quihiucase inintoca nopa huejhueyi familias ten Gad, Aser huan Neftalí.

³⁵ “Para nochí ihuehueyaca nopa tepamit cati quiyahualos nopa altepet ipan nochí lados quipiyas 9 kilómetros. Huan nopa altepet quitocaxtise:

TOTECO ITZTOC NICA.”

**Icamanal toteco; Santa Biblia
Bible without Deuterocanon in Nahuatl, Huasteca
Central (MX:nch:Nahuatl, Huasteca Central)**

copyright © 2005 Wycliffe Bible Translators, Inc.

Language: Nahuatl, Huasteca Central

Translation by: Wycliffe Bible Translators, Inc.

Copyright Information

© 2005, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The Bible without Deuterocanon

in Nahuatl, Central Huasteca

© 2005, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

c565d9f9-d202-544b-b78a-3c93df26508e